



UPU FOU
a le ALII

TUSI PAIA
MO SE SUIGA

TUSI FAITAU ASO

2026

IULAI – TESEMA

Ekalesia Faapotopotoga Kerisiano
i Amerika Samoa

Aso Lulu – Iulai 1: “Leiloa ma toe maua” (*Lost and found*)

Tusi Faitau – Luka 15: 1-10

Matua – f. 7: *“Ou te fai atu ia te outou, e faapea fo’i ona tele o le olioli i le lagi i le tagata agasala e to’atasi e salamō, a e itiiti i e amiotonu e to’aivagafulu ma le toaiva e le tusa i ai le salamō.”*

Na fetalai Iesu i nei fa’ata’oto ona o le faitio a le au Faresaio ma le au tusiupu, auā sa latou lē fiafia ona o lona taliaina o tagata agasala ma lona aai faatasi ma i latou. I lo latou manatu, e lē tatau ona faalatalata atu i ē ua sesē ma pulea e le agasala o latou olaga. Ua faamanatu mai e lenei fa’ataoto le uiga moni o le galuega a Iesu i le lalolagi. E le i afio mai o Ia mo ē ua manatu ua amiotonu, ae mo ē o loo mana’omia le Atua. E lē tu’ulafoa’iina e le Atua le tagata ua pa’ū i le agasala, ae saili atu ma le alofa se’ia toe faafo’i mai i le ala o le Ali’i. Faamata e lē tāua le mamoe e tasi pe a faatusatusa i le ivasefulu ma le iva o loo saogalemu, ae i le loto o le leoleo mamoe, e tutusa lava le tāua o mamoe uma. O le mamoe e tasi ua leiloa e le o se numera ua to’esea, ae o se soifua e tāua tele i le loto o le Leoleo Mamoe. O le ata lea o le Atua e lē faatuāoia lona alofa. O le olioli i le lagi ona o le tasi ua salamō, e tatau fo’i ona avea ma olioli i totonu o le ekalesia, o le nuu, faapea aiga.

Tatalo: Le Ali’i e, ia galueaina o matou loto ina a aua ne’i o matou faamasino atu, ae ia tuma pea i lou finagalo. **Amene!**

Aso Tofi – Iulai 2: “Sauni e auuana” (*Ready to serve*)

Tusi Faitau – Luka 12: 35-48

Matua: f. 43: *“Amuia lea auuana, pe a sau lona alii e maua ia o loo faapea ona fai.”*

O le fetalaiga a Iesu i ona so’o e uiga i le mata’ala, fa’amaoni, ma le nofo sauni i taimi uma. O le manuia o le auuana e maua e le matai o loo galue pea ma le faamaoni. E le na o le fa’atalitali ma le filemu, ae o le auuana o loo faia le galuega na tofia i ai. O le matāfaioi a le auuana, o le galue malosi ma tautua lona matai. E faapena foi le auuana ua ofoina e tautua le Atua ma lona finagalo. E tamāoaiga i manatu ma lagona, ma o loo atagia ai le fa’atuatua e galue. O le fa’atuatua e galue e le na o se talitonuga e nofo i le loto, ae o se malosiaga e fa’aosofia ai le tagata e fa’atino lona tiute ma le fa’amaoni i aso uma. O le auuana e moni lona fa’atuatua, e le fa’atali se’ia iloa e lona matai, ae e galue ma le loto malie. O lona ola atoa ua avea ma auuunaga, ma o ana galuega e fa’aalia ai le ususita’i i lona matai.

Tatalo: A’oa’o mai le loto mata’ala, le loto fa’amaoni, ina ia saunia i matou e fa’atino lou finagalo i aso uma o lo matou ola. **Amene!**

Aso Faraile – Iulai 3 : “Finau maua’i” (*Persistence*)

Tusi Faitau – Luka 18: 1-8

Matua – ff. 6, 7: *“Ona fetalai atu ai lea o le Ali’i, “Ia outou faalogo mai i le upu a le faamasino amioletonu. Pe le faia ea e le Atua le faamasinoga mo e na ia filifilia, o loo alalaga ia te ia i le ao ma le po? Pe faatuai ea o ia iā te i latou?”*

E sili atu lava le Atua amiotonu e tali mai i ona tagata pe a latou alalaga atu ia te ia, nai lo le faamasino amioletonu. Sa leai se malosi, se tamaoaiga, po o se pule a le fafine ua oti lana tane, ae sa ia te ia le lototele ma le onosa’i. O lona finau pea na avea ma mea na maua ai lona faamasinoga tonu. O a’oa’oga a le Alii o Iesu i ona so’o e uiga i le mana o le tatalo faifai pea ma le fa’atuatua e le liliu. E i ai taimi e foliga mai e faatuai ona tali mai le Atua pe a tatou feagai ma puapuaga ma faigata. Ae o le feau a Iesu, aua ne’i o tatou faavaivai ai. Ia finau pea i le tatalo, ia tumau pea i le faatuatua, ma ia faalagolago i le amiotonu o le Atua. O le finau maua’i i le tatalo e faailoa ai le malosi o lo tatou faatuatua. O le tagata ua masani i le ola tatalo, e faaalii ai lona talitonu o loo faafofoga le Atua iā tatou talosaga. Auā o Ia o le Atua e faalogo ma e faia

le amiotonu mo ē e valaau atu ia te Ia i le ao ma le pō. O le feau faamanatu mo i tatou, e le faalagolago le malosi o le tatalo i ō tatou tulaga poo le tamāoaiga ua tatou maua, ae i le mana o le Atua o loo tatou tatalo atu i ai.

Tatalo: Ia avea pea le tatalo ma puna o lo matou malosi, ma ia tumau pea lo matou faamoemoe ia te oe. **Amene!**

Aso Toona'i – Iulai 4: "Mamoe ma leoleo mamoe" (Sheep and Shepherd)

Tusi Faitau – Ioane 10:1-21

Matua – ff. 7, 9e, 10e: *"Ona toe fetalai atu lea o Iesu ia te i latou, "E moni, e moni, ou te fai atu ia te outou, o a'u nei o le faitoto'a o mamoe; Afai e ui mai se tasi ia te a'u, e faaolaina ia, e alu atu ma ulufafo, e maua fo'i e ia le mea e 'ai; ua ou sau ina ia latou maua le ola, ia maua atili ai lava."*

O le mafutaga a Iesu ma le tagata ua fa'aaoga ai le ata faatusa o le leoleo mamoe ma mamoe. E faalagolago le lafu mamoe i le tausiga ma le puipuiga a le leoleo mamoe. Ua faatusa le tagata talitonu i mamoe, ae o Iesu o le leoleo mamoe e tausia ma le alofa lana lafu. O mamoe e lauiloa i lo latou vaivai ma lo latou mana'omia o le ta'ita'iga a le leoleo mamoe. Afai e faalagolago mamoe i lo latou leoleo mamoe, e faapena foi le tagata, e mana'omia le ta'ita'iga ma le puipuiga faaleagaga. O Iesu o le faitoto'a ma le leoleo mamoe, e ta'ita'i ma faatonutonu folau o tatou ala. E ui ina tumu le lalolagi i le ese'ese e taumafai e faatosina loto o tagata, ae o le fe'au a Iesu i lenei mau e faamanatu mai ai, o ia lava le faitoto'a e ulu atu ai i le ola faavavau. E lē na o le faalogo i lona leo, ae o le filifiliga ina ia talia ma faaaoga. O i tatou o mamoe a Keriso, ua valaauina e faalogo i lona leo ma mulimuli i lana ta'ita'iga.

Tatalo: Ia e taitai o matou ala ina ia savavali pea i le ala o le amiotonu ma le ola ua e saunia mo i matou. **Amene!**

Faitauga i le Tusi ia Roma (2) – Reading in Romans (2)

Oti i le agasala, ola ia Keriso (Dead through sin, alive through Christ)

Aso Sā – Iulai 5: "O le faatuatua e va'ai mamao ai" (The faith to dream)

Tusi Faitau – Roma 4:13-25

Matua – ff. 19, 21: *"E le'i vaivai fo'i lona faatuatua, e le'i manatu fo'i i lona tino ua oti, po ua selau ona tausaga, ma le manava fo'i o Sara ua oti; e le i masalo vale ia ma le lē faatuatua i le mea na folafolaina e le Atua, a ua malosi tele o ia i le faatuatua ua viv'i atu i le Atua; ua na mautinoa fo'i, e mafai ia te ia ona faia o le mea na folafolaina e ia."*

Ua talitonu Aperaamo e i ai le mana o le Atua e fa'ataunu'u ai lona finagalo. E le gata o se talitonuga i le mafaufau, a'o le faamalosi 'au i le loto. Ua fa'aaoga e Paulo le faata'ita'iga o Aperaamo e faamaonia ai. O le mataupu i le fa'atuatua na amata mai lava i le feagaiga tuai. O la le Aposetolo, o le fa'atuatua moni e le taula'i i mea o loo va'aia, a o le ola mautinoa, e saunia e le Atua le ala e fa'ataunu'uina ai o tatou mana'oga. O Aperaamo ua matua lona soifua, faapea fo'i lana avā o Sara. I le va'ai faaletagata, ua leai se faamoemoe. Ae ui i lea, na folafola e le Atua i ai, o le a faato'ateleina le la fanau e faapei o fetu o le lagi. O ala ia na tofotofoina ai le faatuatua o Aperaamo, pe talitonu i le mea e le mafai e le tagata, ae mafai e le Atua. O le talitonuga o Paulo, ua fai Aperaamo ma faata'ita'iga o le tagata na vaai mamao lona faatuatua. O le faatuatua moni e lē faavaivai pe a fetai'a'i ma faigata o le olaga. E lē fa'alagolago i le malosi o le tagata, ae fa'alagolago ato'atoa i le mana ma folafolaga a le Atua. A fa'atuatua le tagata, e tumau lona loto i le filemu ma le mautinoa e taunu'u mea ua folafolaina.

Tatalo: Ia foa'i mai le loto mautinoa e faalagolago atoatoa ai i lou mana. **Amene!**

Aso Gafua – Iulai 6: “O le gafa o lo tatou faamoemoe”

Tusi Faitau – Roma 5:1-11 (*The geneology of hope*)

Matua – ff. 3, 4: “*E le gata fo’i i lea, a ua tatou mitamita fo’i i puapuaga, ina ua tatou iloa o le puapuaga e tupu ai le onosa’i; o le onosa’i e tupu ai le mautinoa, o le mautinoa e tupu ai le faamoemoe.*”

O le tusi a Paulo i le ekalesia i Roma ina ia faamalosia lo latou faatuatua ma faamanino le tala lelei o le faaolataga. O lea ekalesia sa aofia ai tagata Iutaia ma tagata o nuuese, ma sa iai nisi fe’ese’eseaiga ona o le ese’ese o tu ma aga faalelotu, aemaise lava i le mataupu i le tulafono ma le alofa tunoa o le Atua. O le olioli e lē sau mai puapuaga, ae sau mai le fa’atuatua i le Atua i taimi o puapuaga. Auā ua latou iloa o loo galue le alofa o le Atua. O loo taumafai Paulo e fa’amanino fa’amanuiaga e maua ona o le ta’uamionuina. I totonu o ia fa’amanuiaga, ua fa’aalia ai e Paulo, o puapuaga e lē o se fili o le fa’amoemoe, ae o se vaega o lona gafa. E faaaogā e le Atua puapuaga e suia ma faamalosia ai lo tatou faatuatua. A faigofie le olaga, e filemu le fa’atuatua; a o faigata ma lu’itau o le ola, e aumai ai le avanoa e fetu’una’i ma fa’amausali ai le fa’atuatua. Afai e leai ni tofotofoga, e lē tupu le onosa’i; ma afai e leai se onosa’i, e lē mafai ona loloto le fa’atuatua.

Tatalo: Faafetai ona e lē tuua i matou i taimi o puapuaga, ae e te faaaogā lava tofotofoga e faamalosia ma faamausali ai lo matou faatuatua. **Amene!**

Aso Lua – Iulai 7: “O manatu fete’ena’i mā’ale’ale” (*The vulnerability paradox*)

Tusi Faitau – Roma 5: 12-21

Matua – ff. 20, 21: “*Na faaopoopoina foi le tulafono ina ia faatele ai le agasala; peita’i ua silisili lava le alofa tunoa, ina o faateleina le agasala; O lenei, e pei ona malo le agasala e oo i le oti, faapea foi ona malo o le alofa tunoa e le amiotonu e oo i le ola e faavavau, i lo tatou Alii o Iesu Keriso.*”

Ua fa’apea mai Paulo, e pei ona pule le agasala i le oti, ua fa’apea foi ona pule le alofa tunoa e oo atu ai i le ola e fa’avavau. E le’i tu’uina mai le tulafono e fai ma ala e maua ai le fa’aolataga, ae o se fa’ata’ita’iga e a’oa’o ai le tagata i le amiotonu, ma fa’atonutonu ai lona olaga. O nei manatu e mā’ale’ale auā e le faigofie ona malamalama ai le mafaufau. E mana’omia le fa’atuatua e talia ai le galuega lilo a le Atua. Na talia e tagata le tulafono a le Atua ina ia malamalama i tapula’a, ma iloa ai ala e tatau ona latou ola ai. Peita’i, e to’atele tagata na filifili e lē usita’i i ala o le Atua, ma fa’aauu ai pea ona ola i le agasala.

O le tulafono e avefa ma ta’iala e tupu ai le fa’amoemoe ola o le tagata, ae le o se avanoa e tapunia ai le faitoto’a o le fa’aolataga. O le alofa tunoa o le Atua e ala ia Iesu Keriso, o lē na foa’i mai lona soifua mo le fa’aolataga o tagata. E le o galuega a le tagata e mafai ona ia maua ai le fa’aolataga, ae o le meaalofoa foa’i fua e ala i le alofa tunoa o le Atua. O le a le toe nofo pologa le tagata i le malosi o le agasala, ae ua amata ona ola ma sa’oloto ona o le amiotonu.

Tatalo: Ia e fa’amanatu mai pea ia i matou o lou alofa tunoa e tumau lea mo i matou e faavavau. **Amene!**

Aso Lulu – Iulai 8 : “Oti i le agasala, ola ia Keriso ” (*Dead to sin, alive in Christ*)

Tusi Faitau – Roma 6: 1-14

Matua – f. 13: “*Aua fo’i ne’i tu’uina atu o outou tino i le agasala e fai auupega a le amioleaga; a ia outou tuuina atu outou i le Atua, e pei o e ua ola nai e ua oti, ma ia tuuina atu o outou tino i le Atua e fai ma auupega a le amiotonu.*”

E pei ona i ai le faitauga o lenei aso, ua faaaogā e Paulo le taua fa’aleagaga e fa’amalamalama ai le tāua o filifiliga a le tagata. Ua faatusaina le tino o le tagata i ni

auupega, auā e mafai ona pulea e le agasala, po o le tu'uina atu i le Atua e faatino ai galuega i le amiotonu. Pe a talitonu le tagata iā Keriso, e suia ato'atoa le pule sa ta'ita'iina lona olaga. Sa avea le agasala ma matai e faatonutonuina le mafaufau, a o lenei ua pule le amiotonu ma le finagalo o le Atua. O le "Oti i le agasala" e lē fa'apea ua mou ese tofotofoga ma lu'itau o le ola, ae ua motusia le pule a le agasala. E pei o se tagata na pologa muamua i se matai sauā, ae ua fa'a-sa'oloto ma ua i lalo o le va'ava'aiga a le matai alofa. O le vala'au a Paulo, ia aua ne'i toe tu'uina atu o tatou tino e auauna i le agasala. Ua le toe avea i tatou ma pologa i le agasala, a ua vala'uina e ola mo Keriso. O le tino, le loto ma le mafaufau e tatau ona avea ma meafaigaluega i le amiotonu. O le "oti i le agasala" o se fa'ai'uga tumau e te'ena ai le agasala. O le "ola iā Keriso" o se fa'ai'uga fa'aaauu ia tu'uina atu pea lo tatou ola i le Atua.

Tatalo: Ia fai pea o matou tagata e fai ma auauna o le amiotonu, ae le o le pologa i le agasala. **Amene!**

Aso Tofi – Iulai 9 : "O le faatosina suamalie a le agasala" (The Sweet allure of sin)

Tusi Faitau – Roma 6: 15-23

Matua – ff. 15, 16: *"O lenei, pe faapefea? Tatou te agasala ea, ina ua tatou le nonofo i le tulafono, a'o le alofa tunoa? Aua ne'i faapea; Tou te le iloa ea, o lē tou te tuuina atu i ai outou e fai ma auauna e ana'ana i ai, poo le agasala e oo ai le oti, poo le ana'ana e oo ai le amiotonu?"*

Ina ua tula'i mai se fe'ese'eseaiga i le va o tagata luitaia ma tagata o nu'u ese e fa'atatau i le tulafono ma le alofa tunoa. O le fa'amanatu a le Aposetolo Paulo, o le sa'olotoga i le alofa tunoa, e le o se avanoa e ola ai le agasala, ae o se vala'au e ola i le amiotonu. Ua faaagaina e Paulo le ata o le auauna e faamatala ai le natura o filifiliga a le tagata. Afai ua tu'uina atu le tagata i le agasala, ua avea o ia ma auauna a le agasala. Afai ua tuuina atu lona loto ina ia usita'i i le Atua, ua avea o ia ma auauna i le amiotonu. O le suamalie o le agasala ua pei o se maunu e tosina ai le loto. Afai e sesē a tatou filifiliga, o le a avea loa ma ala e pulea ai e le agasala o tatou olaga. O lenei mau e taulogologo pea i ō tagata le ta'ua o le ola fetu'una'i ma toe mafaufau lelei i a tatou filifiliga, poo fea tonu o loo mautu i ai o tatou loto. Ia avea le alofa tunoa o le Atua e fai ma fa'amalosī 'au i le loto e filifili ai le ala tonu tatou te savavali ai.

Tatalo: Ia fai pea lou alofa tunoa ma ta'iala sili i lo matou ola, aua lava ne'i tosina i matou i le suamalie o le agasala. **Amene!**

Aso Faraile – Iulai 10 : "O le ala fou" (The new way)

Tusi Faitau – Roma 7: 1-13

Matua – ff. 6, 8: *"A o lenei, ua tatalaina i tatou nai le tulafono sa taofia ai i tatou, ina ua tatou oti, o lea ua tatou auauna ai i la le agaga fou, ae le i la le tusi tuai; a ua maua e le agasala se togafiti i le poloa'iga, ona faatupu ai lea i totonu ia te a'u tu'inaanu uma lava. Auā ua oti le agasala, a o leai se tulafono."*

O le olaga faa-kerisiano e le noatia i tulafono, ae o le olaga e ta'ita'ina i ala o le Atua. Faapei ona i ai le autū o lenei aso "O le ala fou," e le o talanoa i suiga o a tatou amioga, ae o le suiga o le ala tatou te feso'ota'i ai ma le Atua. Ua manatu le Aposetolo e le toe avea le tulafono ma mea e noatia ai i tatou i ala tuai. Sa taumafai nisi e fausia le so'otaga ma le Atua e ala i le tulafono. Peita'i, e le mafai e le tulafono ona faola pe suia le loto, a o le agaga e galue pea i totonu e mafai ona liua ai o tatou loto. E lelei le tulafono, ae le mafai ona taofia le malosī o le agasala i le loto o le tagata. O ē ua ia Keriso, e le toe nofo i le pogisa o le olaga tuai, ae ua savali i le malamalama o le ala fou i le agaga. O le a lē toe avea i tatou ma pologa o le agasala, ae ua avea ma tagata sa'oloto e auauna i le Atua.

Tatalo: Le Ali'i e, faafetai ona ua e fa'asa'olotoina i matou mai noataga o le tulafono ma le malosi o le agasala. **Amene!**

Aso Toona'i – Iulai 11: “O le tauiviga ma le agasala” (*The struggle with sin*)

Tusi Faitau – Roma 7: 14-25

Matua – f. 23e-25: “*Ua fai fo'i a'u ma tagata o taua i le tulafono a le agasala o loo i o'u tino; Auē o a'u le tagata malaia! O ai sē lavea'i ia te a'u ai le tino o lenei oti? Ou te faafetai lava i le Atua, auā o Iesu Keriso lo tatou Ali'i. O lenei fo'i, o a'u nei lava ou te auauna i le tulafono a le Atua i lo'u mafaufau, a o le tulafono a le agasala i lo'u tino.*”

O le faitauga o lenei aso, o lo'o tau faamanino mai ai le tauiviga e feagai pea ma le tagata faatuatua. O le fete'ena'iga o le mafaufau e fia tautua i le Atua, ma le tino e tosina atu i le agasala. E faatusa lea i le tagata ua iloa le upu moni, ae o lo'o feagai pea ma vaivaiga faaletagata. O le alaga a Paulo, “Aue, o a'u le tagata malaia!” e faailoa ai, o ia o le tagata puapuagatia, ma ua iloa fo'i lona le ato'atoa i luma o le Atua. Sa tauivi e ususita'i i lona loto fuatiaifo. Na ia iloa le tonu ma le sa'o, ae le i mafai ona ia fa'atinoina. E i ai taimi tatou te iloaia ai mea lelei, ae tatou te le faia. E naunau le tagata e alo ese mai le agasala, a'o o tatou vaivaiga o le a avea ma mailei e pulea ai e le agasala le tagata. E le tu'ua i tatou e le Atua i lo tatou vaivai. Tatou te alalaga fa'atasi ma Paulo e faafetai i le Atua, lea ua aumai ai le tali i le tauiviga ma le agasala, e le o le malosi o le tagata, ae o le alofa lavea'i o Iesu Keriso.

Tatalo: Fa'afetai ona o Iesu, o lē ua avea ma tali i o matou vaivaiga. **Amene!**

Faitauga i le Tusi ia Roma 2 – Reading in Romans 2

Fua o le Agaga o le Atua (*Fruits of Gods Spirit*)

Lotu Talosaga 'Au Toeaina

Aso Sā – Iulai 12: “Ola i le Agaga” (*Life in the Spirit*)

Tusi Faitau – Roma 8: 1-17

Matua – ff. 1, 2: “*O lenei, ua leai se faasala i e o ia Keriso Iesu, o e le savavali i la le tino, a i la le agaga; auā o le tulafono a le agaga, o le ola ua ia Keriso Iesu ua tu'usaunoa mai lea ia te a'u, nai le tulafono a le agasala ma le oti.*”

A'o fa'aaunau pea tusitusiga a le Aposetolo o Paulo, o lea ua fa'amautinoa le leai o se fa'asalaga mo ē ua iā Keriso. Ua fa'asa'oloto e le Atua le tagata mai le malosi o le agasala. Ua le o toe i ai le malosi e pulea ai e le agasala ma le fa'amasinoga le ola o le tagata fa'atuatua. Ua fa'atusatusa e Paulo tulafono e lua, o le tulafono o le agasala o lona taunu'uga o le oti, ma le tulafono o le Agaga, o le ola lea, e fa'asa'olotoina ai le tagata mai le agasala. A taofi mau o tatou manatu ma lagona i le talitonuga a le Aposetolo o Paulo, atonu o le a suia ai auala e mafaufau ai le tagata, o ala e fa'atino ai ā tatou filifiliga, ma ala e feso'ota'i ai ma isi tagata. “Ola i le Agaga” e faatusa i le faitoto'a ua matala ma o loo taula'i i le ola fou. E tasi lava lo tatou ala i le faitoto'a lea, ua na o Iesu Keriso.

Tatalo: Matou fa'afetai ona ua e fa'asa'olotoina i matou mai le tulafono o le agasala, ma ua e vala'auina i matou e ola i le agaga. **Amene!**

Aso Gafua – Iulai 13: “Manuia atalī ma le tigā i nei ona po”

Tusi Faitau – Roma 8: 18-30 (*Future glory and present suffering*)

Matua – f. 18: “*Auā o lo'u manatu e le tatau ona faatusaina le tigā i nei ona po ma le manuia atalī e faaalua mai ia te i tatou.*”

A'o feagai le au Kerisiano ma faigata o le ola sauāina i totonu o Roma, e le'i faigofie le ola fa'atuatua i lenei vaitaimi. Sa malosi le faailoga tagata i ē ua talitonu ia Iesu. A'o

upu a le Aposetolo e faamalosia ai le fa'atuatua i totonu o puapuaga. O loo fa'amamafa pea e Paulo le ola i le agaga ma le mautinoa e i ai lona fa'amoemoe mautu i le lumana'i. O le fuaiupu e 18, o loo fa'amatalina ai le loto ua masani i tigā. Sa feagai Paulo ma sauaga, sa i ai i le falepuipui, ae na tumau lona fa'atuatua auā na ia iloina, o loo i ai se isi la'asaga e sili atu o loo saunia mai e le Atua mo ia. E feagai pea le tagata ma tigā o le soifuaga, a'o tofotofoga fo'i i lo tatou ola fa'atuatua. O le manuia atālī e le o se mea e faigofie ona maua, a o le meaalofo ua saunia e le Atua mo le tagata e le fa'atu'utu'u i ona tigā, ae taula'i i le faamoemoe ola e ala mai ai fa'amanuiaga o le lumana'i.

Tatalo: Vi'ia lau Afio ona o lau upu e faamalosi pea ia i matou i taimi o tigā ma tofotofoga o lenei olaga. **Amene!**

Aso Lua – Iulai 14: “O le alofa e fa'avavau o le Atua” *(God's everlasting love)*

Tusi Faitau – Roma 8: 31-39

Matua – ff. 37, 39: *“A ua tatou manumalo a'ia'i i nei mea uma lava, ona o ia ua alofa mai ia te i tatou; auā ua ou mautinoa, e le mafai e le oti, po o le ola, poo agelu, poo alii, poo e malolosi, poo mea i nei ona po, poo mea atālī; poo o le mauiluga, poo o le loloto, poo se tasi mea na faia e le mafai e ia mea ona faate'aeaina mai i tatou i le alofa o le Atua, o loo ia Keriso Iesu o lo tatou Alii.”*

O le fa'aolataga e afua mai i le alofa tunoa o le Atua, ma e leai se mea e mafai ona vavae'eseina i tatou mai lenei alofa ua faaalua ia Iesu Keriso. O le molimau a Paulo e faapea “E sili atu lo tatou manumalo i nei mea uma ona o lē ua alofa mai ia i tatou”. E ui ina tatou fetai'i pea ma faigata o le ola, ae mautinoa tatou te manumalo ona o le alofa tunoa o le Atua. O le alofa e tumau, o le alofa e tu'u avanoa ai le Atua i le tagata. E ao ina tatou talia ma le agaga fa'afetai, ma e tatau ona faailoa atu i le lalolagi. O le alofa o le Atua e le muta i le aso e tasi, e le faaititia i le taimi o puapuaga, e le motusia ona o sesē ma faaletonu o le tagata. O le alofa e laugatasia ai le fanau faatuatua a le Atua i soo se lanu ma soo se gagana. Na faaalua i le maliu ma le toetu o Iesu Keriso. O ala ia o le manumalo ina ia tatou sao ai i le ola e faavavau.

Tatalo: Ia avea lo matou ola e fai ma molimau o lou alofa tunoa ina ia vi'ia ai lau Afio. **Amene!**

Aso Lulu – Iulai 15: “Filifiliga fai to'atasi a le Atua” *(God's sovereign choice)*

Tusi Faitau – Roma 9: 1-18

Matua – ff. 2, 5: *“E tele lo'u faanoanoa, e le aunoa fo'i le puapuaga o lo'u loto; auā ou te mafai ona fia anatema o a'u ia te'a ma Keriso, ona o o'u uso, o lo'u aiga i la le tino; o sa Isaraelū i latou, o tamafai i latou, ua i ai fo'i le mamalu, ma feagaiga, ma sauniga o le tulafono, ma le tapua'iga, ma upu na folafolaina; o ia te i latou tupuga, mai ia te i latou fo'i le Keriso i la le tino, o le pule aoao ia, o le Atua e viia e faavavau. Amene ”*

Ua amata lenei faitauga i lagona o'otia ma le tigā o Paulo i tagata o Isaraelu. E ui i fa'amanuiaga ua tu'uina atu e le Atua, ae ua iloa e Paulo e le o Isaraelu uma ua latou talia Iesu Keriso. O se mafatiaga o loo nofo i le loto o Paulo i aso uma. Ua filifili le Aposetolo, o le a ia tauaveina le faasalaga mai le Atua ina ia faaolaina tagata Iutaia. Ua le manatu Paulo i sona manuia, ae ua fa'amuumua le manuia mo isi tagata. Sa ia tatalo ina ia tupu le fa'atuatua o tagata Iutaia i le Atua ina ia latou talia Iesu Keriso. E tusa ai ma le autu “Filifiliga fai to'atasi a le Atua”, e le faalagolago le filifiliga a le Atua i galuega poo le malosi o le tagata, ae filifili i le alofa tunoa ina ia fa'ataunu'uina lona finagalo. E moni e malosi lo tatou ola tatalo, ae le suia ai filifiliga a le Atua i le mea sili atu ona lelei mo le tagata.

Tatalo: Ia a'oa'o mai i matou e talia au filifiliga paia, ma ia matou faalagolago pea i lou alofa tunoa. **Amene!**

Aso Tofi – Iulai 16: “O le lē talitonu o Isaraelu” *(Israel’s unbelief)*

Tusi Faitau – Roma 9: 19-33

Matua – ff. 30, 32a: *“O lenei, se a ea sa tatou upu? Ua maua le amiotonu e nuu ese na latou le saili i le amiotonu, o le amiotonu lava lea e maua i le fa’atuatua; a o Isaraelu na saili i le tulafono o le amiotonu, e le i o’o i latou i le tulafono o le amiotonu; ona o le a? ona ua le sailia i le faatuatua, ae peisea’i o le galuega o le tulafono.”*

O le pule silisili ese a le Atua i ana filifiliga, e le o’o i ai le malosi o le tagata. Peita’i, o le tali atu i filifiliga a le Atua, na iloa ai le ese’elega o tagata. O nu’u ese e le i saili i le amiotonu, ae na latou maua ona o le faatuatua. A o Isaraelu, e ui ina latou taumafai e saili le amiotonu e ala i le tulafono, ae latou te le i ausia. E foliga mai ua sesē le fa’amuamua a le nu’u o le Atua. Ua latou saili ina ia fa’ataūa galuega ma le tulafono, ae fa’atuatua’i le ola fa’atuatua ia Keriso. O le mafua’aga lea na avea ai Iesu ma ma’a tautevateva ia i latou, ina ua latou te’ena le ala na saunia e le Atua mo le fa’aolataga. Tatou te le maua le amiotonu ona o galuega ma le tulafono, ae maua ona o le fa’atuatua. “O le lē talitonu o Isaraelu”, e fai pea ma a’oa’oga taūa e le gata mo Isaraelu lava ia, ae faapea fo’i o tatou tagata. E le o le malosi o le tagata e faamaonia ai lana amiotonu i luma o le Atua. Ae o le loto fa’atuatua e talia ma talitonu i le galuega ua mae’a ona faia e Iesu Keriso.

Tatalo: Ia fa’amalositia lo matou fa’atuatua ina ia matou ola i le amiotonu mai lau Afio. **Amene!**

Aso Faraile – Iulai 17: “O le feau o le fa’aolataga mo tagata uma”

Tusi Faitau – Roma 10: 1-13 *(Message of salvation to all)*

Matua – f. 9: *“Afai e te ta’utino i lou gutu i le Alii o Iesu, ma fa’atuatua i lou loto ua toe fa’atuina mai o ia e le Atua nai e ua oti, e fa’aolaina ai oe.”*

Fa’apei ona molimau Paulo “Ia ta’utino i lou gutu le Ali’i o Iesu, ma ia talitonu i le loto ua toe faatuina o Ia e le Atua.” O le faailoga ua tatou talia Iesu e fai ma ta’iala o lo tatou ola. O le talitonuga i le loto e fa’amaonia ai le fa’atuatua e ala i lona maliu ma lona toetu manumalo. O le ta’utinoga e mautu ai le folafolaga, ua fa’aolaina le tagata ona o Iesu. O la le Aposetolo, o le tagata ua fa’aolaina, e avea ma molimau ola e ala i le soifua auuana atu. O le fa’aolataga mo tagata uma e le fa’atapula’aina, auā e le fa’aailoga tagata le Atua. Ua vala’auina i tatou e talitonu ma ta’uta’u, ia fa’aaoga e fai ma ave feau o le tala lelei e faasoa atu i totonu o ekalesia, nu’u, ma aiga. Tatou te le masalosalalo fo’i i le tau i lea tautua. O le fa’aolataga e fa’avae i le fa’atuatua ia Iesu, e le fa’apitoa mo ni nai tagata, ae ua tatala mo so’o se tasi.

Tatalo: Ia tumau pea o matou tagata i le ola faatuatua, ma ia matou manatua pea o lau fa’aolataga e mo tagata uma. **Amene!**

Aso Toona’i – Iulai 18: “O le tatau ai o le tala’iga” *(The necessity of preaching)*

Tusi Faitau – Roma 10: 14-21

Matua – f. 14-15: *“O lenei, pe fa’apefea ona latou valaau atu i le ua latou le fa’atuatua i ai? Pe fa’apefea fo’i ona latou fa’atuatua i le ua latou le faalogo atu i ai? Pe fa’apefea fo’i ona latou fa’alogo atu pe a leai se tala’i atu? Pe faapefea ona tala’i atu pe afai ua le auina atu i latou? Pei ona tusia, E matagofie naua o latou vae o e aumai le tala lelei i le manuia.”*

O le tala’iga e tatau ma onomea i le tagata kerisiano. E pei ona maua i tusitusiga a Paulo le aogā o le tala’iga ma lona feso’otaiga i le ola fa’atuatua. O le galuega ua tofia ma auina atu e le Atua. O i latou ua tofia e momoli atu le tala iā Iesu Keriso, o auuana matagofie i latou i luma o le Atua. Ua fa’aaogā e Paulo fesili e pei ona tusia i le matua o lenei aso, e fa’atupu manatu i le taūa o le tala’iga. E tatau ona tala’i auā e finagalo le

Atua ia faaolaina le tagata. O le tala'iga o le ala lea e faalogo ai tagata iā Keriso. E faigata ona talitonu le tagata pe a fai e le i faalogo i le tala ia Iesu. E le mafai fo'i ona faalogo, pe a fai e leai se tala'i atu. O le ala lea e o'o atu ai le talalelei i loto o tagata. E pei ona tigā Paulo ina ia manuia ona tagata, e tatau fo'i ona tatou tigā mo ē o loo mamao ese ma le Atua. O le tatou matāfaioi, o le fa'aogaina lea o tatou tagata e tala'i atu le talalelei i so'o se nofoaga o loo mana'omia ai. Aua ne'i ō tatou mā i le talalelei, a ia fai tatou ma auauna e faalatelele le tala'iga o le tala ia Iesu Keriso.

Tatalo: Le Ali'i e, faamalamalama o matou loto ina ia matou lagona le taūa o lau galuega tala'i. **Amene!**

Vaiaso o le Fono Tele XXXVI
“O le Fofoaga e Fale i ai le Atua”
(God Takes Residence in Creation)

Sauniga e Tatala ai le Fono Tele XXXVI

Aso Sā – Iulai 19: “O le Fofoaga o le Malumalu o le Atua”

Tusi Faitau –Kenese 1:1-5 *(Creation as God's Sanctuary)*

Matua – ff. 2, 3: *“Sa soona nunumi le lalolagi ma ua gaogao, sa ufitia foi le moana i le pouliuli; na fegaoioi a'i foi le Agaga o le Atua i le fogātai. Ua fetalai mai le Atua, 'Ia malamalama,' ona malamalama ai lea.”*

Na amata le galuega foafoa a le Atua i le fegaoioia'i o lona Agaga i le fogātai ma lana fetalaiiga, 'Ia malamalama.' O mea ia e manino ai: na mamau e le Atua lana fofoaga e fai ma lona afioaga paia – o lona malumalu – e fale i ai lona mamalu e pua'iina ai le ola i mea uma na faia e le Atua. O le lalolagi, o le sami, o le va nimonimo, ma mea ola uma na faia e le Atua i lana fofoaga – o lona malumalu lea – na filifili e le Atua e afio ai. O le fofoaga la, o le mea e paia; e pele i le Atua, ma e tatau ona faamamaluina. Na faia e le Atua le tagata e tausi i lona malumalu lea – ia leoleo, puipui, ma faamamalu. O le tausi i le fofoaga, e faatusa lea o se gaoioiga faale-tapuaiga ua faia e faamamaluina ai le Atua. A o le tagata e faatalalē i le fofoaga, o le faatalalē foi lea i le malumalu o le Atua, aemaise o lona mamalu o lo o nofofale ai.

Mo tagata o le Pasefika e faavae lo latou faasinomaga i le fanua ma le sami, ua latou silafia le taua o le tausiga o le fofoaga. O le sami ma le laueleele sa galueaiina e o tatou tua'ā mo le tausiga o le soifua i aso faisoo, e le na o ni puna'oa, a o molimau ola ia o le malumalu o le Atua lea tatou te nonofo ma soifua ai. O le tausiga la o le malumalu lea, o le matāfaioi faaleagaga lea o tagata uma.

Tatalo: Le Atua foafoa, aumaia lou Agaga matou te manino ai i lou finagalo, o la matou tiute faaleagaga o le tausia lelei o lou fofoaga. **Amene!**

Aso Gafua – Iulai 20: “O le Sami o le Aiga Ola o le Atua”

Tusi Faitau – Salamo 104:24-30 *(The Ocean as God's Living Household)*

Matua – ff. 24, 25: *“Le ALII e, ua matua tele au galuega. Ua e faia ia mea uma i le poto; ua tumu le lalolagi i au oloa. O lenei sami tele ma le lautele, o i ai mea fetolofi e le masino, o mea ola iti atoa ma e tetele.”*

O le sami e le na o se puna'oa e faaogaina, a o le totino o le Aiga Ola o le Atua. E Aiga, auā o le sami, faatasi ai ma mea uma na fofoaina e le Atua, o lona afioaga lea – o le malumalu ua finagalo le Atua e afio ai. E Ola foi, auā o le sami, ma mea uma na faia e le Atua, o lo o nofo fale ai lona mamalu – le mamalu o le Atua o lo o mātāvaina ma pua'iina le ola i mea uma na fofoaina, faapea le sami ma meaola uma o lo o tumu ai. O le aveā o le sami ma totino o le Aiga Ola o le Atua, o le ata lea o le “poto” na faia ai e le Atua lana fofoaga e pei ona pese ai le fai-Salamo, e aofia ai, *“o le sami tele ma*

le lautele; o mea fetolofi ma meaola iti ma meaola tetele.” O le “poto” lea e ta’ele i faiga-faaoala (*ecosystem*) na lalaga e le Atua i totonu o lana foafoaga, e fesootai faatasi ai mea uma. I le sami lava ia, e le gata i i’a ma meaola uma o le sami, ae faapea au ma gataifale, o galu ma peau o le sami – e fegaoioia’i ma fesootai faatasi uma i faiga-fa’aoala na faia e le Atua e faatumauina ma faafaileleina ai le ola i le sami. O le eliina o le ta’ele o le sami (*deep-sea mining*) i gataifale o Tutuila ma Manu’a, o le a oia ai le mamalu o le Atua o lo o nofofale i lana foafoaga, ma lamatia ai faiga-faaoala na faia e le Atua e faatumauina ai le ola i meaola o le sami. O le mau a le ‘au saianisi, faimai e le afaina le sami tele pe a eli mai minerale o lo o taoto i lona ta’ele. Peita’i, soo se taimi lava e oia ai faiga-faaoala (*ecosystems*) na faia e le Atua e faatumau ai le ola i lana foafoaga, e i ai isi vaega o le foafoaga o le a afaina ai.

Tatalo: Le Atua foafoa, aumaia lou Agaga matou te manino ai i lou finagalo, o la matou tiute faaleagaga o le tausia lelei o lou foafoaga. **Amene!**

Aso Lua – Iulai 21: “O Tausimea o le Fale o le Atua”

Tusi Faitau – Levitiko 25:23-28 (*Stewards of God’s Residence*)

Matua – f. 23: *“E le faatauina le fanua, ia faatō; auā e o’u lava le fanua, auā e tagata ese outou ma e aumau ia te a’u. O le nuu uma e fai mo outou, ia outou tuu atu ia toe faatauina le fanua.”*

O le avea o le tagata ma tausimea o le foafoaga, e le faia ai se filifiliga, a o le matāfaioi tumau e faavae i le ola valaauina o le tagata faatuatua ma le tausiga o le feagaiga ma le Atua. I tusitusiga faa-ositaulaga o i le tusi o Levitiko, o lo o manino le feau o le matua o lenei aso: o le Atua e ou le fanua ma le laueleele, a o Isaraelu, o tagata ese o lo o nonofo ai. O se tasi lenei o fuaitau manino i le Tusi Pa’ia o lo o fa’ailoa manino mai ai: o le foafoaga o le fale o le Atua, a o le tiute tauave o le tagata, o le tausimea i le fale lea, ae lē o le e ona.

Ina ua fetalai le Atua, *“e o’u lava le fanua,”* e le gata ua faailoa e le Atua ia Isaraelu lona ‘aiā faale-tulafono e uiga i le fanua, a o le fanua foi – ma le foafoaga atoa – o lona fale lea. O le tagata, ua na o na nofo fua i totonu o le fale, ae le o sana fale. O lana matafaioi la o le tausi lelei o le fale, ua mafai ona nofo fua ai ona o le agalelei o le Atua o Lē e ona le fale. I nei ona aso i le malosi o faiga faatauvala (*consumerism*) ma le naunau o tagata i le pule ‘aia i mea totino (*ownership*), ua faigofie ona galo i le ‘au faatuatua le a’oa’oga lea o lo o aumai e Levitiko e uiga i le foafoaga ma mea uma na faia e le Atua – e le o le tagata e ona, a o le Atua.

Tatalo: Le Atua e, o oe lava e pule i le foafoaga, ae le o le tagata. Ia avea i matou ma tausimea o lou fale, ua e foai mai matou te nonofo ai. **Amene!**

Aso Lulu – Iulai 22: “Ua Oi le Foafoaga – o le Tali a le Ekalesia”

Tusi Faitau – Ieremia 12:1-6 (*Creation Groans — The Church Responds*)

Matua – f. 4: *“Seia afea e faanoanoa ai le nuu, ma magumagu ai le vao iti o fanua uma ona o le amio leaga o e nonofo ai? Ua faaumatia manu vaefa ma manu felelei; auā ua latou fai ane, E le vaaiā e ia lo latou i’uga.”*

Sa’i Ieremia ona ua oi le foafoaga talu le agasala o tagata. Pau lea o le fuaitau i le Tusi Paia atoa o lo o faailoa mai ai le manatu: e lagona e le foafoaga le tiga ma le mafatia ona o le mamafa o le agasala ma le le faamaoni o tagata. O le vaivai o le soifua faaleagaga ma le amio le tonu o tagata i lona vaitau, faimai le perofeta, ua oi ai le foafoaga. O le mea lava e tasi i nei ona aso –ua siitia le maua o le sami, ua faateteleina le malolosi o matagi ma afā, ua matelaina laueleele ona o le soonafai. E pei o se faata lea ua faaali mai e Ieremia, i le tutusa o mea sa tutupu i lona vaitau, ma mea o lo o tutupu i nei ona aso. Afai e aafia le foafoaga ona o le agasala o le tagata, o

lona uiga, e le o se faafitauli e gata i le si'osi'omaga, a o le faafitauli e faaleagaga lona natura, ma e manaomia se tali faale-faatuatua e fo'ia ia. O le sa'i a Ieremia e le o se tagi talatala o se tagata ua leai se faamoemoe, a o le valaau ia Isaraelu ina ia salamo ma toe foi i le Atua; auā pau lea o le auala e mafai ona toe faaleleia ai le foafoaga.

O le tali foi lea a le Ekalesia i aafiaga o lo o mafatia ai le si'osi'omaga i nei ona aso: ia salamo – ia suia le olaga o tagata; ia fultuia mai le olaga e fiafia i faatinoga e afaina ai le si'osi'omaga, ae soifua i se olaga e fiafia e puipui ma tausimea i le foafoaga. Ia fai le Ekalesia ma leo e puipui ai laueleele ma le sami mai le soonafai e tagata. A aafia le fale o le Atua lea tatou te nonofo ma soifua ai, e tatau ona malosi le leo o le Ekalesia e puipui ma leoleo i le fale, e le gata mo nei ona aso, aemaise mo tupulaga o le lumanai.

Tatalo: Le Atua foafoa, ua oi le foafoaga ona o le agasala o le tagata. Ia matou salamo ma fultuia mai faatinoga ua aafia ai lau foafoaga. **Amene!**

Aso Tofi – Iulai 23: “Leoleo o Tupulaga o le Lumanai”

Tusi Faitau – Teutueronome 30:15-20 (*Guardians of Future Generations*)

Matua – f. 19: “*Ou te valaau i le lagi ma le lalolagi i le aso nei e fai ma molimau ia te outou, ua ou tuuina atu i ou luma o le ola ma le oti, o le manuia ma le malaia; o lenei, ia e filifili i le ola, ina ia ola ai oe ma lau fanau;*”

A fale le Atua i le foafoaga, e le gata ua avea le foafoaga ma afioaga o le Atua, ae ua avea foi le foafoaga ma malae e liaiina ai ni filifiliga faale-tagata sa pona i vao. O le valaau a Mose ia Isaraelu—“*ia e filifili i le ola, ina ia ola ai oe ma lau fanau,*”—o lo o faailoa mai ai: o le avea ma tausimea o le foafoaga a le Atua, o le matafaioi e sopoloa tupulaga; o lona uiga, o filifiliga tatou te faia nei, e aafia ai o tatou fanau i le lumana'i (*intergenerational justice*). O lo tatou faamaoni po o lo tatou faatamala e fai ma tausimea o le foafoaga, e luluina ai laueleele, o le sami, o le tau, ma nu'u o le a tuufaasolo i o tatou fanau pe a mavae atu i tatou.

“*Ia e filifili i le ola,*” o lona uiga, ia filifili i ala o le Atua; o ala e laualuga i le alofa, o le usita'i, ma le pipii i le Atua. O le filifili i le ola, o le filifili lea o ala e manuia ai o tatou fanau i le lumana'i, e pei o le puipuiga o le foafoaga ua tuuina mai e le Atua tatou te tausimea ai. O le filifili foi i le ola, o le naunau e 'aua ne'i tutupu ni mala poo ni faaletonu e ala mai i ni filifiliga tatou te faia i le taimi nei, ae mafatia ai o tatou fanau i le lumanai. E pei o le feau a Mose ia Isaraelu a o sauni e sopoia le Ioritana ma ulufale atu i le nuu folafolaina: o filifiliga tatou te faia i le taimi nei, e fua i ai le “ola” o tatou fanau i le lumanai.

Tatalo: Le Atua alofa e, ia matou filifili e avea ma tausimea o lau foafoaga, e leoleo ma puipui ai lau foafoaga mo matou fanau i le lumana'i. **Amene!**

Aso Faraila – Iulai 24: “Ola Faamaoni i totonu o le Aiga o le Atua”

Tusi Faitau – Efeso 2:11-22 (*Living Faithfully Within God's Household*)

Matua – f. 19: “*O lenei, e le toe tagata ese outou, po o ē ua āumau, a ua nuu faatasi ma le 'au paia, o le aiga foi o le Atua;*”

Tautala le Aposetolo i le suiga o le faasinomaga o le tagata ua faatuatua ia Keriso: suia mai le avea ma tagata ese, i le avea ma tagata moni o le aiga o le Atua. Faaaoga e le Aposetolo le gagana fa'a-osifeagaiga e masani ai mafutaga vavalalata e faailoa atu ai, o le faatuatua ia Keriso, ua avea ai i tatou ma totino moni o le Aiga o le Atua. E le o se tofiga, a o le avea ma totino o le Aiga o le Atua, o le valaauina – o le valaau ina ia ola faamaoni i ala e ta'uleleia ma viia ai Lē e ona le Aiga. O totino o le Aiga o le Atua e tatau ona atagia ai uiga o Lē e ona le Aiga: o le alofa, loto maualalo, onosai, faamagalalo, amiotonu, ma le ola faapaiaina. E le o ni uiga e filifili ai le tagata pe fai pe leai. A o tu ma aga masani ia o le Aiga o le Atua.

O le ola faamaoni i totonu o le Aiga o le Atua, e aofia ai le fetausia'i o le tasi i le isi, ola i le loto gatasi ae le o le fevaevaea'i, ma le faaalolo o le tasi i le isi. O le malosi ma le vaivai o le Aiga, e faalagolago i le tausiga o le va tutunonofo o totino o le Aiga. E faapea foi i le foafoaga, o se tasi o totino o le Aiga o le Atua. O le ola faamaoni i le Aiga o le Atua, e aofia ai le tasi lelei o le foafoaga, ae le o le tafili saunoa ma ola soonafai.

Tatalo: Fa'asino mai e lau afio ala tonu, e tatau ona matou faia ai la matou auaunaga o le tausia o lau Foafoaga ina ia manuia. **Amene!**

Aso Toona'i – Iulai 25: "Feagaiga ma le Foafoaga"

Tusi Faitau – Kenese 9:8-17 (*Covenant with Creation*)

Matua – ff. 9, 10: *"Faauta fou, o a'u, ou te faatumauiina la'u feagaiga ma outou, ma a outou fanau pe a mavae outou, atoa foi ma mea ola uma o ia te outou, o manu felelei, o manu vaefa fanua, ma manu o le vao uma o ia te outou, o mea uma ua ulufafu i le vaa e oo i manu uma ole lalolagi."*

E le gata ia Noa ma lona aiga, a o le feagaiga na osi ma amatamea ai le Atua, e aofia ai ma le foafoaga atoa. E tusa ai ma le molimau a le Tusi Paia, o le ulua'i feagaiga lea na osi ma amatamea ai le Atua, ma o lo o manino mai ai, ua fuafuaina faapitoa le lautele o lenei feagaiga ina ia aofia ai le foafoaga atoa. E aofia ai foi le tagata, ae le o faapitoa se tulaga o le tagata e luga a'e o isi meaola, ae tumua'i tutusa tagata ma meaola uma. O le feagaiga ua fusifusia ai e le Atua lona mamalu silisiliese i le ola o lona foafoaga atoa.

O meaola ma mea uma o le foafoaga na faia e le Atua, e le o ni puna'oa e tafilisaunoa ai tagata, a o paaga na filifilia ma finagalo le Atua e osi feagaiga ai. O lona uiga, e le pule le tagata i le foafoaga, ae paaga tutusa i le feagaiga na amatamea ai le Atua. O le tagata ua na o ni tausimea i le fale o le Atua, a o le fale e nonofo faatasi ai le tagata ma le foafoaga. E le o i ai foi se 'aia e tafilisaunoa ai le tagata i le foafoaga ua fusifusia e le Atua i lona mamalu na te puipuia. O le faaleagaina o le foafoaga, o le solia lea o le feagaiga na amatamea ai le Atua.

Tatalo: Le Atua osi feagaiga, a'oa'o mai ina ia matou iloa lo matou tulaga tutusa ma lau foafoaga i le feagaiga na e amatamea ai. **Amene!**

O LE EVAGELIA A MATAIO (4) – THE GOSPEL OF MATTHEW (4)

O le pule a Iesu (fesiligia ma le faamautuina

(The authority of Jesus (Questioning and Establishing it)

Aso Sa – Iulai 26: "Te'ena Iesu" (Jesus rejected)

Tusi Faitau – Mataio 13: 53-58

Matua – ff. 55, 57a: *"E le o le atali'i ea lenei o le tufuga? E le o Maria ea le igoa o lona tinā, o ona uso fo'i o Iakopo, ma Iosefa, ma Simona, ma Iuta? E le o ia te i tatou ea ona tuafafine uma? Po o fea foi na maua ai e lenei tagata nei mea uma? Ona latou tausuai ai lea ia te ia."*

O a'oa'oga a Iesu e ala i fa'ataoto, na atagia ai le loloto o lona tomai i mea lilo i le malo o le Atua. Ina ua toe fo'i i lona nu'u o Nasareta, sa iloa e tagata o Ia o le atali'i o le tufuga, o le tama a Maria. Na latou malamalama i ona tala'aga, ma vavega na Ia faia. O le va'aiga a le to'atele ia Iesu, o Ia o se tagata ua masani ai lo latou va'ai i aso ta'itasi. Peita'i, ua pogisa lona nu'u i le va'aiga e sili ona ta'ua, "O Iesu o le Alo o le Atua". Ua avea lo latou masaniga ua liliu ai o latou manatu, ma ua faatauva'a ai lo latou va'ai i le Ali'i o Iesu. Ua galo ia Nasareta e le fuaina Iesu i le va'aiga fa'alelalolagi, a o le va'aiga ua mausalī ona o le fa'atuatua moni i le Atua. O le ola fa'amaualuga e afua ai le va'ai maualalo ma le lē amanaia o le isi uso-a-tagata. Fa'apei o le va'ai a Nasareta ia Iesu,

na mafua ai ona latou te'ena le Faaola. A fai ua te'ena e le tagata Iesu, ua ia te'ena fo'i faamanuiaga a le Atua.

Tatalo: A'oa'o mai i matou ina ia aua ne'i faatauva'a la matou va'ai i lau galuega tala'i e afua mai ai o matou manuia. **Amene!**

Aso Gafua – Iulai 27: “Fa’atumaaina e Herota lana ta’utinoga”

Tusi Faitau – Mataio 14: 1-12 (*Herod keeps his oath*)

Matua – ff. 7, 9: *“O le mea lea na ia matuā fai atu ai ia te ia ma le augani na te avatu ia te ia se mea na te ole mai ai; a o ia, ua faaosoina e lona tinā, ua fai atu, Ia e aumai iinei ia te a’u le ulu o Ioane le Papatiso i se tanoa; ona tigā ai lea o le tupu; a ona o le augani, ma e ua tao’oto e a’ai fa’atasi ma ia, ua ia poloa’i atu e avatua.”*

O folafolaga a le tupu o Herota na fai i le tama teine a Herotia ona o lona fiafia, ae galo ai o lona taunu’uga o le a toe a’afia ai o ia i se taimi mulimuli mai. Ua avea le fiafia o le tupu ua ia faia ai se faai’uga na te le’i mafaufauina. Le tupu e tausi mamalu, o lona ola fia sili ma le fia iloa, na i’u i le maliu o Ioane le Papatiso. E foliga mai o le lē fiafia o Herotia, a’o lea ua fa’atino e le tupu o Herota. O le fesili fa’atupu manatu, o le ta’utinoga a le tupu o Herota e vi’ia ai le Ali’i, po’o se ta’utinoga e vi’ia ai le tagata? E faigata le fa’amalieina o le loto o le isi tagata ina ia tumau pea lona mamalu i le va’aiga faa-le-tagata. Ua sili atu le popole o Herota i le manatu o ē sa nonofo fa’atasi ma ia, nai lo le amiotonu ma le finagalo o le Atua. E tatau ona tatou fa’aete’ete iā tatou filifiliga e fai. Auā e toe a’afia ai tatou i le lumana’i. O se a’oa’oga lelei fo’i mo i tatou ina ia iloa e le tagata ona pulea lona loto, ae aua ne’i pulea i tatou i le va’aiga ma mafauauga o isi tagata.

Tatalo: Foa’i mai le malosi matou te tumau ai i le amiotonu. **Amene!**

Aso Lua – Iulai 28: “O le agalelei o Iesu” (*Jesus’ generosity*)

Tusi Faitau – Mataio 14: 13-21

Matua – ff. 13, 14: *“Ua fa’afofoga i ai Iesu, ona maliu ese ai lea o ia i lea mea i le va’a i le mea tu’ufua ua na o ia. Ua faalogo ai le motu o tagata, ona latou mulimuli atu ai lea ia te ia, ua ui a uta mai aai. Ua maliu atu Iesu, ua na silafia le motu o tagata e to’atele, ona mutimuti vale ai lea o lona alofa ia te i latou, ua fa’amalolō fo’i e ia o latou ma’i.”*

O Ioane o le auauna fa’amaoni a le Atua, o lē na saunia le ala mo Iesu, ae na maliu ona o le loto vale o Herotia, ma le vaivai o Herota e tete’e atu i fa’ai’uga sesē. Ina ua fa’alogo Iesu i lenei tala, sa la mana’omia se nofoaga tu’ufua e nofo to’atasi ai. O sina taimi e mafuta ai ma lona Tamā. Peita’i, ina ua mulimuli atu ia te Ia le motu o tagata, sa fa’aalia lona loto alofa ma lona agalelei i tagata puapuagatia ma ē na latou mana’omia lana fesoasoani. Ua silafia e Iesu i latou o ē mama’i, fa’apea fo’i i latou o ē o loo mafatia. E ui i lona faanoanoa i le tala ua o’o mai e uiga i le maliu o Ioane le Papatiso, e le i avea lea ma ala e taofia ai lona alofa ma lona agalelei i tagata o loo saili fesoasoani atu iā te Ia. O le agalelei o Iesu Keriso, e fa’aolaina ai le tagata i le itu fa’aletino ma le itu fa’aleagaga. E feagai pea le tagata ma puapuaga, tigā ma fa’anoanoaga o le olaga, ae le tatau ona mou atu ai lo tatou agalelei ma lo tatou alofa i isi tagata. Ia fa’apei i tatou o Iesu Keriso, e le i avea lona fa’anoanoa e taofia ai lana galuega fa’amalolō i ē mama’i ma lana fesoasoani i ē o mafatia.

Tatalo: Faafetai i lou agalelei e le gata mai, lea ua e faaalua ia Iesu Keriso. **Amene!**

Aso Lulu – Iulai 29: “Ua amata ona lē mautonu Peteru” (*Peter start to frown*)

Tusi Faitau – Mataio 14: 22-36

Matua – ff. 29, 31: *“Ona fetalai atu ai lea o ia, “Ina sau ia.” Ona alu ifo ai lea o Peteru nai le va’a, ua savali i luga o le vai e alu ia Iesu; Ua va’ai o ia i le matagi ua tetele, ona*

fefe ai lea; ona afua ai lea ona goto, ua alaga mai, "Ali'i e, faaola mai!" Ona aapa atu lea e Iesu o lona a'ao, ua tago ia te ia, ua faapea atu ia te ia, "O oe na, le fa'atuatua itiiti, se a le mea ua e masalosalo vale ai?"

O le ola lē mautonu o le tagata e amata mai i le masalosalo, o le fefe ma le lē mautinoa. Faapei o le so'o ia Peteru, ua avea lona fefe i le telele o matagi ua lē mautonu ai, ma ave'esea ai lona ola talitonu i le Ali'i. O le ola lē mautonu o Peteru ma le au so'o, e le i amata ona o le telele o matagi ma le sou o le sami, ae na amata ina ua vaivai lo latou ola faatuatua i le Ali'i. I totonu lava o lenei mata'upu, na saunia e le Alii le vavega na fafagaina ai le motu o tagata, a'o lenei lava e ola masalosalo lona au so'o. E feagai pea i tatou ma fa'afitauli e fotua'i mai o lenei olaga. E i ai taimi e lagona ai e le tagata le lē mautonu ma lē mautinoa. Ae tatou te le nofoa'i i ia lagona. E pei o Peteru na alaga i le Ali'i e faaola mai ia ia, faapea fo'i o tagata. Tatou te augani ma fa'atauana i le Alii e fesoasoani mai i lo tatou vaivai. E le sili a'e le malosi o lu'itau ma fa'afitauli o lenei olaga, nai lo le mana faaola o le Ali'i o Iesu Keriso.

Tatalo: Pe a tetele fa'afitauli ma fesoua'iga o lenei olaga, matou te to'omaga pea i lau Afio e maua ai lo matou malosi. **Amene!**

Aso Tofi – Iulai 30: "Mamā ma le lē mamā" (Clean and unclean)

Tusi Faitau – Mataio 15: 1-20

Matua – ff. 1, 3: *"Ona o mai ai lea ia Iesu o tusiupu ma faresaio mai Ieruselema, ua faapea mai, "se a le mea ua soli ai o ou so'o upu tu'u a ē anamua?" Auā ua le fafano o latou lima pe a latou a'ai; a ua tali atu ia, "Se a le mea ua soli ai e outou fo'i le poloa'iga a le Atua ia outou uputu'u?"*

O tu ma aga fa'a-lutaia, o loo aumai ai le talitonuga a le au faresaio ma le au tusiupu e tau fa'amatala ai le mamā i le va'aiga fa'ale-tagata. Ua latou tu'ua'ia le au so'o i le lē fafanoina o o latou lima, ona o loo tau sailia se auala e molia ai le Ali'i o Iesu. Ua latou fua le mamā i le va'ai atu i le itu i fafo e ala i galuega fa'atino ma aga masani. Ae peita'i, ua liliu e Iesu lenei manatu, e mafai ona sa'o ma lelei galuega fai a le tagata, ae a le mamā le loto na mafua ai ona fa'atino le galuega, e leai sona aogā. O le a le aogā o le mamā o lima pe a ele'elea le loto? O fetalaiga a Iesu e fa'amanatu mai ai o le loto, o le totonugālemu lea o le tagata soifua. E afua mai ai filifiliga ma fa'ai'uga lelei. O se a'oa'oga lelei fo'i lea mo tatou uma. O le faataūaina o Afioga a le Atua e tonu ma maua'a ai loto o lana fanau faatuatua, ae le o tu ma aga faa-le-tagata ua na o se va'aiga e fa'afoliga, ae le tutusa ma le loto.

Tatalo: Ia matou fa'aaogaina lau upu e tapena ai o matou loto e afua mai ai manatu lelei. **Amene!**

Aso Faraile – Iulai 31: "O tala i uiga o fafine Kanana"

Tusi Faitau – Mataio 15: 21-39 (The reputation of Cananaite women)

Matua – ff. 22, 23a: *"Faauta fo'i, o le fafine o Kanana ua sau mai i lea lava itu, ua alaga mai ia te ia "Le Alii e, le alo o Tavita, ia e alofa mai ia te a'; ua leaga lava la'u tama teine i le temoni ua i ai." A ua leai se upu na ia tali atu ai ia te ia. Ona o mai ai lea o ona so'o, ua aoi mai ia te ia, ua faapea mai, la e tu'uina atu ia te ia e alu."*

O le fafine Kanana sa tofotofoina lona fa'atuatua ina ua fa'atuai ona tali atu Iesu i lana augani, ia fa'amalolō lana tama teine ua tigaina i le temoni. O le fafine e talitonu tagata lutaia e aumau i se nofoaga o loo fa'amautu ai tagata ese. I tusitusiga a Mareko o lo'o ta'ua ai lenei fafine o le "Suria Foinie" (Mareko 7:26). O lona loto finau sa fa'aaau ai ona mulumuli ia Iesu, e ui ina le tali mai o Ia. O lona alofa faa-tinā sa saili fesoasoani ai i le Ali'i Faaola, e ui ina te'ena o ia e le au so'o. E le i saili manuia mo ia lava, a o le manuia mo le isi tagata, o lana tama teine lea. O le sailiga e le'i faigofie, tele

pa puipui sa tau asa mai ai. O le tagata ese e le amana'ia, e talitonu tagata Iutaia e le aofia i le latou feagaiga ma le Atua. Ae peita'i, o lona fa'atuatua na ia maua ai le lotu maualalo e lafoa'i atu i le Ali'i ona tigā. E le i tu'ulafoa'ina e le Atua lenei tinā e tatalo, finau ma saili i le Ali'i.

Tatalo: Le Alii e, ia matou maua pea le ola fa'atuatua e tatalo, finafinau ma saili i lau Afio. **Amene!**

Aso Toona'i – Aukuso 1: “Fesiligiaina ma fa'amaoniaina le pule a Keriso”

Tusi Faitau – Mataio 16:1-20 (*Questioning and affirming the authority of Christ*)

Matua – ff. 15-17 : *“Ona fetalai atu lea o ia ia te i latou, ‘A o outou, pe se a la outou upu ia te a’u, po o ai?’ Ona tali mai ai lea o Simona Peteru, ‘O oe o le Keriso, o le Alo o le Atua soifua.’ Ona tali atu ai lea o Iesu ia te ia, ‘Amuia oe Simona Paiona; aua e le se tagata na ia fa’aali atu ai ia te oe, a o lo’u Tama o i le lagi.’”*

I le vaitau o Iesu, sa manatu le to’atele o tagata Iutaia, o le a afio mai le Mesia e fa’ato’ilaloina le pulega sau a le malo Roma. Ae peita'i, na molia Iesu i le tulafono e ta'ita'i o le lotu Iutaia, e le au Faresaio ma le au Satukaio. Ma na i'u ai lava i le fa'asatauroina e fitafita Roma o Iesu i lalo o le va'ava'aiga a Pilato. Na fia iloa e Iesu po'o silafia e ona so'o o ia. Ae tali atu Simona Peteru, “O oe o le Keriso, o le Alo o le Atua soifua.” Ona fa'a-amu'ia lea o Iesu ia Peteru, ona e le o se tagata na fa'aali atu ia te ia le tali o lana fesili, ae o lona Tama o i le lagi. O lona uiga, ua fa'ailoa atu e Iesu i ona so'o, o ia lava o le Mesia, le Alo o le Atua Soifua. E taua le tali a Peteru mo so'o se tagata lava e talitonu ia Iesu. Aua o le ta'utinoga a Peteru ua fai ma papa ma ogatotonu o le fa'atuatuga o le Ekalesia Fa'apopotoga Kerisiano i Amerika Samoa. Ma e mana'omia e tagata uma ua fa'akerisianoina, le talitonu ia Iesu Keriso, o le Mesia, ma o ia lava o le Alo o le Atua soifua.

Tatalo: Iesu e, ua fai lava lou Suafa Paia ma fa'avae o lenei ekalesia. **Amene!**

EVAGELIA A MATAIO (4) – GOSPEL OF MATHEW (4)

2. Malamalama i mea taua (*Understanding what is important*)

Aso Sā – Aukuso 2: “O le liua” (*The Transformation*)

Tusi Faitau – Mataio 17:1-13

Matua – f.2 : *“Ona liua ai lea o ia i o latou luma, ua pupula mai ona fofoga e pei o le la, ua sisina mai fo'i ona ofu e pei o le la.”*

Ua liua Iesu i o latou luma, ua pupula mai ona fofoga ma sisina mai ona ofu e pei o le la. O le fa'ailoga lea o lona mamalu ma lona paia atoatoa, na fa'ailoa ia Peteru, Iakopo ma Ioane i luga o le mauga. Ma o le liua o le fa'ailoga lea o Iesu Keriso, o le Alo o le Atua Soifua, e sili atu o ia nai lo Mose ma Elia. O lona uiga e sili atu Iesu nai lo Mose ma le tulafono ma Elia ma perofeta uma. Ua na o se pupula na vaaia i foliga o Mose i luga o le mauga, a'o Iesu, ua pupula mai ona fofoga ma sisina mai ona ofu e pei o le la. Ma o Mose ua na o se auauna, a o Iesu, o le Alo o le Atua. E le mafa'atusatusaina fo'i Iesu, aua o Elia ua na o se perofeta, ae o Iesu o le Alo o le Atua. E le gata i lea, a e na fa'alogo fo'i i latou i le siufofoga mai le ao na si'osi'omia ai i latou, ua fa'apea mai, “O lo'u Atali'i pele lena, ou te fiafia ia te ia; ia outou fa'alogo ia te ia.” Ua matatau ai i latou, ma fa'apau'u i lalo ma ua latou iloa o Iesu e sili atu nai lo i latou. O le liua fo'i o se vaaiga i le lumana'i pe'a toetu manumalo o ia i le aso tolu. Ma o le a taunu'u ai ia te ia perofetaga uma lava ma tulafono a le Atua.

Tatalo: Le Atua e, ia e liua o matou lotu. Amene!

Aso Gafua – Aukuso 3: “E mafai mea uma i le fa'atuatua”

Tusi Faitau – Mataio 17:14-23 (*Faith makes all things possible*)

Matua – f. 20: *“Ona fetalai atu ai lea o Iesu ia te i latou, “... aua e moni, ou te fai atu ia te outou, afai e tusa lo outou fa’atuatua ma le fua o le sinapi, e fai atu outou i lenei mauga, Alu atu ia oe i lela mea; ona alu atu ai lea; e leai fo’i se mea tou te le mafaia.”*

O le fa’atuatua, e mafai ai mea uma e o’o lava i mea e foliga mai e le mafai ona fa’atinoina. O a faigata, o luitau, ma’i o le tino, fa’amai pepesi ma ma’i temoni, o fa’alavelave tutupu, o le le tagolima, ma le vaivai o le tino ma le loto, ua fetalai Iesu, e mafai mea uma lava i le fa’atuatua. O lona uiga o le fa’atuatua o lou fa’alagolago lea i le Atua ma lou loto atoa, ma e talitonu e mafai mea uma lava e le Atua. Ua fetalai Iesu, “afai e tusa lo outou fa’atuatua ma le fua o le sinapi, e fai atu outou i lenei mauga, ‘Alu atu oe i lea mea;’ ona alu atu ai lea; e leai fo’i se mea tou te le mafaia.” Aua o le fa’atuatua, o le fa’alagolago lea i mea ua fa’amoemoe i ai, o le mautinoa lea o mea e le o vaia. Aua na fetalai foi Iesu, “Amuia o e le vaai mai, ae talitonu atu pea ia te ia.” Ua a’oa’o atu Iesu i ona so’o, aua le fa’alagolago i latou ia i latou lava i lo latou malosi a e fa’atuatua i le Atua o le ana le malosi uma lava. O le mea lea, Ia ave ese ai o tatou mata mai o tatou lava fa’afitauli ae taula’i la tatou vaai i le Atua e maua mai ai lo tatou fesoasoani. O le fa’atuatua, o le mealofa a le Atua, tatou te fesili fo’i i le Atua e foa’i mai ia i tatou le faatuatua.

Tatalo: Fa’afetai tele le Atua e, i le fa’atuatua ua e aumai. **Amene!**

Aso Lua – Aukuso 4: “Lafoga mo le malumalu ma le Keriso le Alo o le Atua”

Tusi Faitau – Mat17:24-27 (*Temple tax and Christ’s identity as the Son of God*)

Matua – f f. 24, 25a : *“Ua latou o’o atu i Kapanaumi, ona o mai ai lea ia Peteru o e ao lafoga o le malumalu, ua fa’apea mai, ‘E le faia ea le lafoga o le malumalu e lo outou a’oa’o?’ Ua fai atu ia, ‘E fai lava.’”*

E ese foi le mata’utia ma le ofoofogia o a’oa’oga a Iesu Keriso. Ua fesiligia nei e le au ao lafoga Peteru pe faia e Iesu le lafoga o le malumalu. A ua tali atu Peteru i lena lava taimi, “E fai lava.” O le tali fa’avavevave lena a Peteru ae le i mautinoa e ia pe faia e ia le lafoga o le malumalu. Ae ua silafia e Iesu mafaufauga o le au ao lafoga. Ona fesili lea o Iesu ia Peteru, “E ao lafoga a tupu o le lalolagi mai fea? O a latou fanau ea po o tagata ese?” Ua tali Peteru, “O tagata ese.” Ona tali lea o Iesu, “O le mea lea ua sa’oloto ai le fanau.” O lona uiga, afai e sa’oloto le fanau a tupu uma o le lalolagi, e sa’oloto fo’i o ia mai lafoga o le malumalu, aua o ia o le Alo o le Atua. Ae fa’auta ua fetalai Iesu ia Peteru, ina ne’i tausuai i latou, alu e matau, o le i’a muamua lava na te maua, fafasi i lona gutu, ona ia maua ai lea o le tupe siliva, ona ave lea e fai ma la’ua lafoga. O le mata’utia ma le ofoofogia lena o Iesu, e pule o ia i i’a o le sami, ma mea uma na faia.

Tatalo: Fa’afetai tele Le Atua e, i le pule ma le mana na e foa’i mai. **Amene!**

Aso Lulu – Aukuso 5: “O tamaiti laiti” (*The little ones*)

Tusi Faitau – Mataio 18:1-14

Matua – f. 3, 4 : *“Ua fa’apea atu Iesu, E moni, ou te fai atu ia te outou, a le liua outou, ma aveia ia pei o tamaiti, tou te le sao lava i le malo o le lagi. O lenei o se fa’amaulalo o ia ia te ia e pei o le tamaitiiti nei, e sili lea i le malo o le lagi.”*

Sa fesili Iesu i le au so’o po o ai e sili i le malo o le Atua, ae tali Iesu, “O le loto maualalo e pei o se tamaitiiti e sili i le malo o le Atua.” O lona uiga, e le o se tagata e maualuga sona fa’ailoga ma sona tulaga pe lauiloa fo’i, a e o le tagata e maualalo lona loto e sili atu ia i le malo o le Atua. O le mea lea na fetalai atu ai Iesu, “A le liua outou, ma aveia ia pei o tamaiti, tou te le sao lava i le malo o le lagi.” Aua o le tamaitiiti e fa’alagolago ma tuu atu uma lona fa’atuatua i lona tama ma lona tina mo lona saogalemu, ma le fafagaina o ia. O le loto maualalo, e faigofie ai ona talia le upu a le

Atua, ma aveese ai le manatu fa'amauuluga ma le fa'asausili. O le tagata loto mauulalo, ua fa'agaogaina o ia mo le a'oa'o mai o le Agaga Paia ia te ia. E le fa'amauuluga i lona poto, ae fa'atuatua o ia i le Atua o le ana le poto. Ma e inoino le Atua i e fa'amauuluga a e fiafia o ia i e loto mauulalo. O le taua lena o tamaiti, e mama o latou loto, ma loto mauulalo, ma e fa'alagolago foi i o latou matua. O lea, la liua i tatou e pei o tamaiti lo tatou ola fa'atuatua i le Atua.

Tatalo: Le Atua e, fa'afetai tele i le loto mauulalo ua matou maua. **Amene!**

Aso Tofi – Aukuso 6: “Tausiga o le va feagai ai ma isi”

Tusi Faitau – Mathew 18:15-35 (*How to treat others*)

Matua – f. 21, 22 : *“Ona alu ane ai lea o Peteru ia te ia, ua fa'apea ane, Le Alii e, e agaleaga mai faafia ea lo'u uso ia te a'u, ma ou fa'amagalo ia te ia? Seia atu fitu ea?” Ua fetalai atu Iesu ia te ia, “Ou te le fai atu ia te oe, se'ia atu fitu, a ia fitugafulu ni fitu.”*

Ia fa'amagalo atu pea, e le fa'atapulaaina pe fia ni taimi e te fa'amagalo atu ai i e ua agaleaga mai. O le tali lena a Iesu ia Peteru pe fa'afia ona fa'amagalo atu. O le tali a Iesu ia fitugafulu ma le fitu, o lona uiga, ia fai fai pea, fa'amagalo atu pea, e le fa'atulafonoina le alofa. Aua e le fa'atapulaaina le alofa tunoa o le Atua. E alofa mai pea le Atua ma fa'amagalo mai pea ia i tatou o tagata agasala. E le mafai ona tatou faitauina a tatou agasala i lea aso ma lea aso. Afai o le Atua e gata lona alofa, ma faatapulaaina le taimi e fa'amagalo mai ai ia i tatou, o lona uiga ua leva ona tatou fano. Ae fa'auta i le alofa silisili ese o lo tatou Atua, e fa'amagalo mai pea le Atua ia i tatou. E fa'apea lava Peteru ia, a fa'afitu ona ia fa'amagalo atu, ua matua tele lava lona alofa, aua o a'oa'oga a le au Faresaio, ua na o le fa'atolu ona e fa'amagalo atu. Ae ua fetalai Iesu, aua nei e faitauina pe fa'afia ona fa'amagalo atu. Ae mana'omia le loto fa'amagalo i taimi uma. Aua le toe fa'aleleia o mafutaga ua fa'aleagaina. O le to'atele ua mama'i ai lava i le loto fa'amagalo. Aua o lo'o nofo ma se avega mamafa i lona loto, a umi ona teu i lona loto, ona ave lea ma kanesa e afaina ai lona soifua, i lona loto le fa'amagalo.

Tatalo: Le Atua e, fa'afetai tele i le loto fa'amagalo. **Amene!**

Aso Faraille – Aukuso 7: “Fa'ate'a” (Divorce)

Tusi Faitau – Mataio 19:1-12

Matua – f. 3: *“Ona o mai ai lea ia te ia o faresaio, ua tofotofu mai ia te ia, ua fa'apea mai, “Pe sa ea i se tasi ona fa'ate'a o lana ava ona o mea uma?”*

Ua tali atu Iesu i le fesili tofotofu a le au faresaio pe sa i le tulafono a Mose ona fa'atea o le ava e lana tane. A ua fa'amanatu atu e Iesu le foafoaga i le amataga. Na faia ai e le Atua o le tane ma le fafine, ma tu'u fa'astasi. Ona tu'ua lea e le tane o lona tama ma lona tina, a e fa'atasi atu ma lana ava. Ona ave lea o i laua o le tino e tasi. O lea e le toe to'alua ai, a o le tino e tasi i laua. O le mea lea, o e ua fa'atasia e le Atua, e le mafai ona fa'atete'aina e se tagata. A ua finau atu le au faresaio, “Aisea na poloai mai ai Mose e avatu ia te ia le tasi alei e fa'ate'a ai ia te ia?” Ona fetalai atu lea o Iesu, “Ona o lo outou loto ma'a'a. A e le i fa'apena i le amataga. Ae fa'auta, ou te fai atu ia te outou, o ai na te fa'ate'a lana ava ae le'i mulilua lana ava, ona ua fia fai se isi ana ava, ua mulilua lava.” Aua o le fa'aipoipoga ua uma ona fa'apaiaina ma fa'au'uina e le Atua. O le fa'aipoipoga e le o se mea taalo, e fai nei ae toe te'te'a nanei. O le finagalo o le Atua ia savavali le tane ma lana ava i ala o le Atua ma ia umi le la mafutaga se'ia o 'o i le oti. Ma ia fa'avae le la mafutaga i le Atua aua o le Atua o le alofa lava ia.

Tatalo: Fa'afetai tele le Atua e i lou fa'amanatu mai o lou alofa. **Amene!**

Aso Toona'i – Aukuso 8: “Fesuia'i tulaga: tamaiti laiti ma le mauoa talavou”

Tusi – Mat. 19:13-30 (*Reversing status: little children and the rich young man*)

Matua – f. 13b-15 : *“...ona vavao atu ai lea o ona so’o ia te i latou. A ua fetalai atu Iesu, ‘Ina tu’u mai ia o tamaiti e o mai ia te a’u, aua le vaoia i latou; aua e fa’apei o i latou nei o e o i le malo o le lagi.’ Ua fa’ae’e ona aao ia te i latou, ona maliu ese ai lea o ia i lea mea.”*

O le uiga o le fetalai a Iesu, e fesui ai tulaga o le mauoa ma tamaiti i le malo o le lagi. E maua tupe a le mauoa, ma e muamua fo’i le mauoa i lona tulaga i le lalolagi ae mulimuli le mauoa i le malo o le lagi. A o tamaiti, e muamua i latou i le malo o le lagi ae fa’amulimuli i latou i le vaai a le to’atele o tagata o le lalolagi. O lea ia fa’apei ai i tatou o tamaiti, aua o tamaiti e loto mama, loto maualalo, loto fa’alagolago, talitonu ma fa’atuatua e pei o tamaiti uma i o latou matua. E le o le tele o tupe, e le o le potu, e le o le maualuga o le tulaga i le lalolagi, ae o le loto maualalo ma le fa’atuatua e pei o le tamaitiiti i le Atua tatou te sao ai i le malo o le lagi. O le aganu’u fa’alutaia i le seneturi muamua e leai ni aia tatau o tamaiti, e leai ni o latou leo, e leai fo’i ni o latou tulaga taua i le aiga po’o le nu’u. O lea na tuli ese ai e so’o o Iesu tamaiti nei o latou fa’alavelave ia Iesu, a e peita’i, ua vavao atu Iesu, tu’u ai pea tamaiti e o mai ia te ia. Aua a le pei i tatou o tamaiti tatou te le sao i le malo o le lagi.

Tatalo: Fa’afetai tele le Atua mo tamaiti. **Amene!**

VAITAU O LE OLAGA – SEASONS OF LIFE

1. Fa’afailele (Nurture)

Aso Sā – Auk. 9: **“Ua pisi tele ua le fia galue ai; ua pisi tele ua le malolo ai”**

Tusi Faitau – Failauga 3:1-8 (*Too busy to be bored; too busy to stop*)

Matua – f. 6, 7: *“o ona po e saili ai, ma ona po e tu’u ai ua le iloa; o ona po e tausi ai, ma ona po e lafoa’i ai; o ona po e saei ai, ma ona po e su’i ai; o ona po e fa’alologo ai, ma ona po e tautala ai”*

Ua uma ona fa’atulaga e le Atua vaitau o le olaga e fa’afailele ai le soifua o le tagata. E i ai le taimi e galue ai ma le taimi e malolo ai. A e peita’i, ua galulue fa’asoloatoa tagata i le ao ma le po i le vaiaso atoa, a ua leai se taimi e malolo ma moe lelei ai. E le leaga le toaga e faigaluega, ae tatau lava ona i ai se taimi e malolo ai. E taua le galue malosi. A e taua fo’i le malologa i le tino, le mafaufau, aemaise le agaga. E i ai tagata ua pisi tele i galuega ma ua le vaivai ai e faigaluega. E i ai fo’i nisi ua pisi tele e le mafai ona nofonofo. A e peita’i, e i ai le taimi e pisi ai, e i ai fo’i le taimi e nofonofo ai. O lona uiga, ia o fa’atasi le taimi ma le finagalo o le Atua. O le ao na faia e le Atua e galulue ai i feau ma tiute. A o le po, e malolo ai le mafaufau ma le tino mai galuega. A ua le mafai e le to’atele ona malolo. A ua ala fa’asolo atoa mata i le ao atoa ma le po. Ona maua lea i le ma’i, ona ua le mafai ona moe, ma tata vave le fatu i le popole. Ona saili togafiti lea i le fomai mo se fualaau e mafai ai ona moe ma malolo. Talu ai le le mulimuli i le taimi ua uma ona fa’atulagaina e le Atua e galue ma malolo.

Tatalo: Fa’afetai tele le Atua i le malologa ua matou maua. **Amene!**

Aso Gafua – Aukuso 10: **“E le oti, e lē vaايا, ae o loo galue i mea uma”**

Tusi Faitau – Hosea 11:1-11 (*Immortal, invisible but involved*)

Matua – f. 3e-4: *“...a ua le iloa e i latou ona ou fa’amaloloina o i latou. Na ou tosina i latou i maea a le tagata, o maea alofa lava; na ou i ai ia te i latou e pei o e si’i a’e le amo ai o latou aulamu, na a’u tu’uina atu fo’i mea e ‘ai ia te i latou.”*

O le Atua o Isaraelu o se Atua e alofa pea. Ua fa’atusa e le perofeta o Hosea le alofa o le Atua i le alofa o matua i a latou fanau. E a’oa’o e matua a latou fanau ina ia iloa ona savavali. Latou te fafaga ma tā’ita’i i o latou lima ma si’i atu i latou i luga o

latou tauau, ma afisi i latou i o latou fatafata. Ma o le fa'ailoga lea o le alofa mutimuti vale o le Atua i le fanauga Isaraelu, lona nu'u, i le amataga. A e peita'i, e ui lava i le tele o lona alofa ma lona fa'amaoni i le tausiga o Isaraelu, ae ua le iloa ma ua le lagonaina e Isaraelu le alofa o le Atua ia te i latou. Ua latou fa'atuiese ma fouvale ai i le Atua, ua latou fai taulaga ia Paala, ma ifo atu i tupua ua ta. Ua le manatua e Isaraelu le alofa o le Atua na ia si'i a'e ai i latou i ona alafau e pei o matua i a latou fanau, ma tu'u atu ia i latou mea e 'ai. Ua latou le iloa o le Atua na fa'amaloloina i latou. E ui lava ina ua le o vaai o ia, o lo'o soifua pea o ia, ma o lo'o auai atu pea le Atua ia te i latou. Ma o lo'o fa'atalitali pea le Atua i le fanauga Isaraelu ia salamo ma toe fo'i atu ia te ia.

Tatalo: Le Atua e, fa'afetai tele i lou alofa mutimuti vale ia i matou. **Amene!**

Aso Lua – Aukuso 11: “Fa’alogo ma a’oa’oina”

Tusi Faitau – 1 Samuelu 3:1-21 (*Listen and Learn*)

Matua – f. 10, 11: *“Ua afio mai le Ali'i, ona tu lea ma valaau, pei ona lua'i fai, Samuelu e, Samuelu e! Ona tali atu lea o Samuelu, Fetalai mai ia, aua o lo'o fa'alologologo atu lau auauna. Ona fetalai mai lea o le Ali'i ia Samuelu, Fa'auta, o le a a'u faia se mea i Isaraelu, e ta'itasi uma o e fa'alologologo ai ma ta'alili ai ona taliga uma e lua.”*

O le mata'utia ma le ofoofogia o lea tala ia Samuelu, ona o le mealofa o le fa'alogologo na avatu ia te ia e le Atua a'o tamaitiiti. Na lagona ai e le tama o Samuelu le leo o valaau mai ia te ia i lona igoa a'o taoto o ia i le malumalu o lo'o i ai le ato laau. Ua fa'atolu ona fa'alogologo Samuelu i le valaau ma alu ia Eli ma fai i ai, “O a'u lenei.” A e tali atu Eli, e le o ia na valaau atu. Ona a'oa'oina ai lea o le tama o Samuelu e Eli, a toe fa'alogologo atu i le leo o valaau atu i lona igoa, ia e tali atu i ai, “Fetalai mai ia, le Ali'i e, aua o lo'o fa'alologologo atu lau auauna.” Ua fa'apea lava ona fai. Ua tali atu fa'apena le tama o Samuelu i le leo o valaau mai. Ona fa'apea mai lea o le Ali'i, “Fa'auta, o le a a'u faia se mea i Isaraelu, e ta'alili ai o latou taliga.” O le aso lava lea ua ta'utino mai ai le Ali'i o le a ia fa'asalaina ai le aiga o Eli. Ona o le agasala matuia a ona atali'i o lo'o faia i le malumalu paia o le Atua. A ua le a'oa'oina e Eli ona atali'i. Ua feoti ai i laua. O se a'oa'oga taua lea mo i tatou. Ia lelei la tatou fa'alogologo, tatou te lagona ai lona valaau mai. Ia tatou talia fo'i ma le fiafia le valaau mai o lo tatou Atua.

Tatalo: Le Atua e, fa'afetai tele i lou fa'amanatu mai. **Amene!**

Aso Lulu – Aukuso 12: “O le a se mea ou te mana’omia e tali ai le valaau?”

Tusi Faitau – Ieremia 1:4-10 (*What do I need to answer the call?*)

Matua – f. 7, 8: *“Ona fetalai mai lea o le Ali'i ia te a'u, Aua e te fa'apea, O a'u o le tamaitiiti; aua o i latou uma ou te auina atu i ai oe, e te alu lava i ai, o mea uma fo'i ou te fai atu ai ia te oe, e te fai atu ai lava. Aua e te fefe ia te i latou; aua ou te ia te oe e lavea'i ia te oe, ua fetalai mai ai le Ali'i.”*

E le mana'omia ni alofaga faapea, “ua na o a'u o se tamaitiiti, ou te le iloa tautala,” e tali atu ai le valaau mai o le Atua. A valaau mai loa le Atua, tu loa i luga ma savali, aua le fefe, auā o lo'o fa'atasi mai le Atua. O le Atua fo'i na te lavea'i mai. 'Aua nei taulaia la tatou vaai i lo tatou le atoatoa ma lo tatou vaivai. A ia sili atu lo tatou fa'atuatua i le Atua. E mafaia mea uma i le mafuta mai o le Atua. E gata lo tatou malosi ma lo tatou iloa, ae sili atu le malosi ma le silafia o le Atua. E le fa'atali le valaau a le Atua se ia tatou sauni. E fa'afuase'i lava ona sau le valaau a le Atua i lona lava taimi. A ia tatou iloa o tatou vaivaiga ona tatou tatalo lea i le Atua na te fa'aatoatoaina. E mana'omia e le Atua lo tatou naunau atu, ma lo tatou tali atu i le usitai, ma lo tatou ola fa'atuatua ia te ia, aua e mafai mea uma i le fa'atuatua.

Tatalo: Fa'afetai le Atua i le fa'atuatua. **Amene!**

Aso Tofi – Auk 13: “Tumau i lou fa'asinomaga e ui ina faatonuina oe e suia”

Tusi Faitau – Tanielu 1:1-27 (*Keeping your identity when told to change*)

Matua – ff. 3, 4: *“Ona fai atu lea o le tupu ia Asepenasa, le ali'i e pule i ana eunuka, ia te a'u mai nisi o le fanauga a Isaraelu, o le fanau lava a le tupu, atoa fo'i ma nisi ali'i; o tama e le pona lava, a ua aulelei, o e ua atamamai lava, ma ua iloa mea uma, o e ua popoto lava, ma ua tatau ona latou tutu i le maota o le tupu, ia a'oa'oina fo'i i latou i tusi ma le gagana a Kaletaia.”*

E ui ina ua sui e le tupu o Kaletaia igoa o Tanielu, Hanania, Mesaelu, ma Asaria ia Peletisara, Sataraka, Mesako, ma Apoteniko. Ma a'oa'oina foi i latou i tusi ma le gagana a Keletaia. E lei suia ai lava lo latou talitonuga i lo latou Atua. Ma ua le aai foi i latou i mea taumafa pe inu i le uaina a le tupu o Kaletaia. Ua taofi mau lava i latou i lo latou talitonuga i le Atua. O le uiga tonu lena o le taofi mau o lou fa'asinomaga ma lou fa'atuatua i le Atua. Ia tete'e atu i talitonuga fa'apaupau, a ia taofi mau i lo tatou fa'atuatua i le Atua. E ui i le tele o fa'asoosoga mai le tele o talitonuga eseese o lo'o taumafai e suia lo tatou talitonuga i lo tatou Atua, ia tumau pea lo tatou fa'atuatua i le Atua. Ia tatou mataala foi i le tele o talaiga sese ua o'o mai i Samoa. E i ai le tupulaga o lo o talanoa i ma'a ma laau ma le sami i luga o le taligalu o Apia. O nei tamaiti talavou ua le toe o i o latou aiga. A ua nonofo fa'amalosia i totonu o nofoaga o nei talaiga sese o lo'o faia i Apia. Ia mata'ala ai lo tatou atunu'u o Samoa i talaiga eseese o lo'o aumaia e tagata mai fafo e pei o Nigeria ma atunuu tu ogatotonu i Saute.

Tatalo: Faafetai tele le Atua i lo matou ola tutumau. **Amene!**

Aso Faraile – Aukuso 14: “Ua talia le tatalo ma le fa'amoemoe ua taunu'u”

Tusi Faitau – 1 Samuelu 1:9-20 (*Prayer answered and hope fulfilled*)

Matua – f. 15e-17: *“...a ua ou momoli atu lo'u loto i le Ali'i. Aua e te ta'ufa'atasia lau auaua ma fafine ulavavale; aua o le tele o lo'u mafaufau ma lo'u tiga ua ou tautala ai ua o'o i lenei itu aso. Ona tali mai ai lea o Eli, ua fa'apea mai, Alu ia oe ma le manuia; ia foa'i mai e le Atua o Isaraelu le mea na e fa'atoga atu ai ia te ia.”*

Ua tali le Atua i le tatalo a Hana ma fa'ataunu'uina lona fa'amoemoe mo sana tama. Aua na augani o ia ma tagi atu i le Atua i lona mafatiaga ma lona tiga i le taufaifai mai o Penina le ava lona lua a lona tu'alua o Elekana. Ona ua to'atele le fanau a Elekana ia Penina, ae le fanau Hana. A e fa'auta, ua tali fa'aaliali mai le Atua i le tagi a Hana, ma fa'amautuina lona mana'o i le fa'amanuia atu o le ositaulaga o Eli i ona manaoga. Ua fanau mai ai ia Hana se tama tane ua na fa'aigoa ia Samuelu, o lona uiga, “Aua na ou fa'atoga i le Ali'i mo ia.” Ua liua le fa'anoanoa o Hana i le olioli. Ina ua tali fa'aaliali mai le Atua ia te ia ina ua sasa'a atu uma lona loto atoa i lana fa'atoga. O se a'oa'oga lelei foi lea mo i tatou. A tatou ole atu i le Atua ia tatou ole atu ma o tatou loto atoatoa. Aua nei o tatou fa'afoliga i luma o le Atua i a tatou tatalo.

Tatalo: Fa'afetai tele le Atua e, i lou tali mana'o. **Amene!**

Aso Toona'i – Aukuso 15: “Ua tele naua. Ua e mana'omia le fesoasoani”

Tusi Faitau – Exodus 18: 9-27 (*It's too much. You need help*)

Matua – ff. 17,18 : *“Ona fai mai lea o le tama o le ava a Mose ia te ia, E le lelei le mea o lo'o e faia. O le a matua tigaina oe atoa ma lenei nu'u o lo'o ia te oe; aua e mafatia oe i lenei mea, e te le lava ona e faia to'atasi.”*

Ua fautua atu letero le tama o le ava a Mose ia Mose, e fa'asoa atu lana avega i isi tagata o le nu'u o le a ia filifilia e fai ma ta'ita'i o vaeveaga o le nu'u. Ia vaeveaina le nu'u i ni vaega: e ta'ito'aafe, ta'ito'aselau, ta'ito'alimagafulu, ma le ta'ito'asefulu. Ona

tu'u lea i ai o ta'ita'i latou te fa'amasinoina i mea iti. A o mea tetele ia avatu ia Mose na te fa'amasinoina. Ona mama ai lea o lana avega. A ia filifilia ni ta'ita'i e loto tetele, o e matata'u i le Atua, o tagata fa'amaoni, ma e inoino i le manumanu. E fa'ailoa atu fo'i e Mose fa'atonuga ma tulafono ma ala latou te savavali ai ma mea latou te fai. O Mose fo'i na te taulogologo mea uma i le Atua. O se faiga lena e te'a ai le vaivai ma le lava o Mose, mai lona fa'amasinoina to'atasi o le nu'u atoa i le aso atoa ma aso uma o le vaiaso. Aua, e to'atele le nu'u ma ona fa'afitauli i aso uma. O se fa'ata'ita'iga lelei lea mo se fa'auluuluga o se ekalesia. Ia fa'asoa atu a latou avega i isi tagata o le aulotu ua latou filifilia e fai ma ta'ita'i o vaega ta'itasi o le ekalesia. Ina ia aua ne'i amoina e se tagata e to'atasi le avega, ae o le tele o tau'au e mama ai se avega.

Tatalo: Fa'afetai tele le Atua i lau upu fa'asoa mai. **Amene!**

VAITAU O LE OLAGA – SEASONS OF LIFE

2. Ua matua (Maturity)

Aso Sā – Aukuso 16: “E tatau le fa'aaloaloga i le galue malosi”

Tusi Faitau – 1 Timoteo 4: 7e-16 (*Hard work deserves respect*)

Matua – f. 7e-8 : *“...a ia e fa'amasani i le amio Atua. Aua e aoga fo'i le fa'amasani i la le tino; a o le amio Atua e aoga lea i mea uma lava, o lo'o i ai le mea ua folafolaina mai i la le olaga nei atoa ma le atali.”*

O le vaitau o le olaga ua matua ai le soifua o le tagata i lana savaliga ma Iesu. E tatau i ai le fa'aaloalo. O le uiga o lea manatu, “E tatau le fa'aaloalo i e galulue malosi,” e fa'atatau i e fa'amasani i le amio Atua, aua e aoga le amio Atua i mea uma lava. Aua o le tagata e ola a'oa'oina ma faamasani i mea fa'aleagaga, e fa'atupuina ai pea lona malosi fa'aleagaga. E pei lava o tagata fa'amalosi tino i fale ta'aalo. Latou te si'isi'i u'amea mamafa e fateleina ai lo latou malosi. E fa'apea foi e galulue malolosi ia amio Atua, e fa'atupuina pea lona malosi i le fai o le amiotonu a le Atua. E vavalalata fo'i lana mafutaga ma lona Atua. Ma o le sini o lona fa'amoemoe o le ola fa'apaiaina, aua e paia le Atua. E le sili atu le fa'amalosi o le tino nai lo le fa'amalosi o le agaga. A ia galulue fa'atasi le au fa'atuatua i le fa'amalosi ina o le tino, faapea le agaga. O se toleniga aupito sili lea ona taua, ma o se tamoeaga fo'i e fai fa'atasi mo Iesu, ina ia tatou maua le ola e fa'avavau.

Tatalo: Fa'afetai tele le Atua, mo le fa'amalosi tino aemaise le agaga. **Amene!**

Aso Gafua – Aukuso 17: “Tuputupu a'e ia Keriso” (*Growing up in Christ*)

Tusi Faitau – Efeso 4: 11-16

Matua – ff. 15, 16 : *“Peita'i, a o tautalatala fa'amaoni i le alofa, ia tutupu i tatou ia te ia i mea uma, o le ulu lava ia, o ia fo'i o Keriso; e mai ia te ia ona tupu o le tino uma lava, o lo'o o fa'atautauina ma fa'aso'oina i ua uma lava e fesoasoani i ai, e tusa ma le galuega i le fua o itu tino ta'itasi, ia i'u ina atiina ae le tino e ia lava i le alofa.”*

Ia tutupu a'e i tatou ia Keriso i le tautalatala fa'amaoni i le alofa. Ia matutua foi fa'aleagaga i le ta'uta'u pea o le upu moni a le Atua ma le alofa. Ma ia galulue fa'atasi le tino o Iesu Keriso, aua o ia lava o le ulu o le tino. Aua o Iesu lava e to'atasi na su'ia ma soso'o faatasia itutino ta'itasi uma lava o lana ekalesia. Ma fa'aa'upegaina itutino ta'itasi uma e atina'e ma galulue fa'atasi ina ia soifua maloloina ma ola lauusiusi le galuega a le Atua i lona alofa. O lona uiga ia ola lana ekalesia i le fa'amaoni ma le alofa mutimuti vale o le Atua. Ma ia tumau pea lana ekalesia i le alofa ia Iesu Keriso ma lana tala lelei. Ma ia alofa le tasi i le tasi i le fetausia'i ma le fefa'apalepalea'i. Ina ia fa'apei i tatou uma o Iesu Keriso, o le ana mealofa fa'aleagaga uma lava ua tatou maua e atina'e ai lana galuega.

Tatalo: Le Atua e, ia matou tautalatala pea i lou alofa fa'amaoni. **Amene!**

Aso Lua – Aukuso 18: “Talavou ma le matua” (*Youth and age*)

Tusi Faitau – Failauga 11:9-12:7

Matua – ff. 11:10, 12:1 : *“O lenei, ina fa'ate'a ese atu ia le tiga i lou loto, ma tu'u ese atu le leaga i lou tino; aua o le tama itiiti ma le taulealea e faatauavaa ia. O lenei, ia e manatua le na faia oe i ona po o lou taulealea, a o le'i o'o mai aso leaga, a o le'i o'o mai fo'i tausaga e te fa'apea ai, E lei so'u fiafia i ai.”*

O lo'o fautua atu le failauga i ta'ulele'a ma le au talavou, ia latou manatua le Atua o le na faia i latou a'o le'i o'o mai aso faigata pe a matutua. Ina ia aua nei ma'imauna lo latou taule'ale'a i mea fa'atosina a lenei lalolagi, aua e le aoga. A ia fa'aaogaina lo latou malosi mo le Atua. O le mea lea ia olioli ma fiafia ai a'o latou taule'ale'a ma tama ititi ma malolosi. Ma ia aua lava nei galo ia i latou le taimi e o'o mai ai le fa'amasinoga a le Atua. Aua a o'o mai le taimi e matutua ai, e sau ai foi ma le vaivai. Ona galo lea o le tele o mea sa ia mafaufau i ai, e le lagona e ona taliga ni tala, e nenefu fo'i lana vaai. O le taimi fo'i lena e mana'omia ai le to'oto'o e savali ai, pe le mafai foi ona toe savali i le tiga o ona ivi. Ma faigata ona toe fa'atinoina ni fe'au i ona lima aua ua tagata matua. O lea ua fautua atu ai le failauga i taulele'a ia fa'aaogaina lelei lo latou malosi i le taimi e taulealea ma malolosi ai, e auauna atu ai i le Atua, ae aua nei fa'atalitali se'i matua, aua e faigata ona auauna i le Atua pe a o'o mai tiga ma vaivai le tino ona ua tagata matua. O le mea lea, fai mai le failauga, ia ola le tagata ma mafaufau i lona iuga.

Tatalo: Le Atua e fa'afetai tele mo le fa'amanatu. **Amene!**

Aso Lulu – Aukuso 19: “Auaunaga ma le loto maulalo” (*Service and humility*)

Tusi Faitau – 1 Peteru 5:1-11

Matua – f. 5e : *“...ma ia oofu outou uma lava i le loto maulalo o le tasi i le tasi; aua, E tete'e atu le Atua i e fa'amauululuga, a e foaina mai le alofa tunoa i e fa'amaulalo.”*

Ua apoapoa'i atu Peteru i le au toeaina ia latou leoleo i le lafu mamoe a le Atua ua ia i latou. Ia latou tausi atu foi i le lafu mamoe a le Atua ma le faamaoni ae aua le fa'atauanauina. Aua fo'i ne'i o latou faia ma le fia fai oloa. A ia fiafia o latou loto e auauna atu ona o le Ali'i o Iesu. Ia aua foi ne'i o latou pule fa'asua i e ua tofia i ai i latou. A ia fai i latou ma fa'aaa'oa'o i le lafu mamoe. Ia latou auauna atu fo'i ma le loto maulalo. Ia maulalo le loto o le tasi i le tasi. Aua e inoino le Atua i e fa'amauululuga, ae foai mai e ia lona alofa tunoa i e loto maulalo. Ua aumai e Peteru le ata o le pologa e auauna atu ai ma le loto maulalo. Aua e ofu e le pologa le ofu talieleele e auauna atu ai i lona matai. E iloa i lona ofu tali eleele lona loto maulalo. O le ofu tali eleele lena o lo'o fai mai Peteru, ia fa'apena ona oofu ai le au toeaina ma le aufaigaluega a le Atua. Ina ia latou auauna atu ai i le Atua ma le loto maulalo.

Tatalo: Le Atua e, fa'afetai tele mo le loto maulalo. **Amene!**

Aso Tofi – Aukuso 20: “Tautua ua afu (Ana)” (*Long service (Anna)*)

Tusi Faitau – Luka 2:36-40

Matua – ff. 36-38 : *“Sa i ai foi le perofeta fafine o Ana...ua loomatua o ia...E le'i alu ese o ia i le malumalu, a ua auauna o ia i le Atua i anapogi ma talosaga i le ao ma le po. O lea lava itu aso, ua sau ai o ia, ua fa'afetai atu i le Atua, ma tautala ia te ia i tagata...”*

O le perofeta fafine o Ana, ua fai ma fa'ata'ita'iga o se tina e moni lona alofa i le Atua ma ua matua lana auaunaga i le Atua. O lona alofa i le Atua na ia auauna atu ia ia te ia i tausaga e 84 talu ona oti lona to'alua. E lei vaivai le loto o Ana i le maliu o lana tane. Aua ua na o le 7 tausaga talu ona la fa'aipoipo. Ae ua ofoina atu lona soifua

e auauna atu ai i le Atua ma le fa'amaoni. E le'i alu ese lava o ia ma le malumalu. A ua ia auauna atu i le Atua i le tatalo ma le anapogi. E 84 tausaga o tatalo ma anapogi ma tapua'i pea i le Atua. Se'ia o'o lava i le fanau mai o le Mesia. Fai mai sa vaai Ana i le tupu tupu a'e o le tama o Iesu. Ma ua malosi lona loto, ua tumu i le potu; ma ua ia te ia fo'i le alofa o le Atua. Ua fa'amaonia ia Ana le alofa o le Atua i tama ma tina. E le fa'ailogaina e le Atua se tagata, ae fa'aogaina uma e le Atua fafine ma tamaloloa i le atina'eina o lana galuega.

Tatalo: Le Atua e, fa'afetai tele i lau auauna fafine o Ana. **Amene!**

Aso Faraile – Aukuso 21: “Tauluga i le manumalo” (*Victory at last*)

Tusi Faitau – 1 Koronito 15:50-58

Matua – ff. 54-55: *“Pe a ofu fo'i lenei tino i'u vale i le tino ola pea, a ofu fo'i lenei tino oti i le tino le oti lava, ona taunu'u ai lea o le upu ua tusia, Ua fa'aumatia le oti i le manumalo. Le oti e, o fea o i ai lou tui?”*

Mulimuli ane, ua tatou manumalo fa'atasi ma Iesu Keriso i lona toetu manumalo i le tuugamau ma le oti. Ua le mafai e le agasala ma le oti ona taofia Iesu i le tuugamau. Aua ua pule aoao le Atua i le oti, ina ua toetu manumalo mai Iesu i le aso tolu. O se vavega pito sili lea ona ofoofogia ma le mata'utia, na faia e le Atua i le toetu manumalo o Iesu Keriso. I lona toetu manumalo, ua liua ai lenei tino i'u vale i le tino ola pea. Ua taunu'u ai le upu, “Ua fa'aumatia le oti i le manumalo.” O le mea lea na fesili ai Paulo, “Le oti e, o fea ea o i ai lou tui?” O lona uiga, ua fesili tau faifai Paulo i le oti, aua e le mafai e le oti ona aveese i tatou mai le alofa tunoa o Iesu Keriso, ua ia laveaina ai i tatou ai le oti. O ai lava se e fa'atuatua ia Iesu Keriso, i lona maliu ma lona toetu manumalo i le oti, e maua e ia le ola e fa'avavau.

Tatalo: Fa'afetai tele Iesu i lou toetu manumalo. **Amene!**

Aso Toona'i – Aukuso 22: “Ua fa'afouina mea uma” (*All made new*)

Tusi Faitau – Faaaliga 21:1-5a

Matua – ff. 1-3: *“Ona a'u iloa lea o le lagi fou ma le lalolagi fou; aua ua mavae atu le ulua'i lagi, ma le ulua'i lalolagi...Na ou fa'alogo fo'i i le leo tele mai le lagi, ua fa'apea mai, “Fa'auta, ua i ai le afioaga o le Atua fa'atasi ma tagata...e fai fo'i i latou ma lona nu'u...”*

Ua toe fa'afou ma toe fa'afo'i e le Atua mea uma lava na ia faia i le lelei e pei ona ia faia i le amataga i lana foafoaga. Ua le toe i ai se oti, ma se agasala, ua le toe mamao ese foi tagata ma le Atua. O le a le toe i ai ni mea tiga, ni ma'i o le tino, fa'apea le agaga. O le a soloisea e le Atua loimata uma i o latou mata; e leai foi se fa'anoanoa, pe aue, e leai foi se puapuaga. A e o le a fai tagata uma lava ma ona tagata, o le a fai fo'i le Atua ma o latou Atua. Ua toe fa'afouina foi e ia lana mafutaga vavalalata ma lana tagata na ia faia, e pei ona ia faia i le amataga. Aua ua faia e le Atua le afioaga na te afio fa'atasi ai ma tagata, i le lagi fou ma le lalolagi fou, pe a mavae atu le ulua'i lagi ma le ulua'i lalolagi. Na fetalai mai foi le Atua ia Ioane, “Fa'auta ou te faia ia fou mea uma lava.” Ua fetalai mai foi o ia ia te a'u, “Ia e tusi; aua o upu nei e moni ma le fa'amaoni ia.” Aua o a'u o le Alefa ma le Omeke, o le amataga ma le gataaga. O le fia inu ou te foa'ifuaina atu ia te ia ai le puna o le vai ola. O le lagi fou e tusa ma le tino fou. E le toe i ai se sami o lona uiga ua le toe i ai ni fita ma ni faigata. Ua fa'afouina mea uma lava ia Iesu Keriso i lona maliu ma lona toetu. O ai lava se tasi e fa'atuatua ia te ia, e maua e ia le ola e fa'avavau.

Tatalo: Fa'afetai tele le Atua ua fa'afouina mea uma e ala i lou Alo Pele o Iesu Keriso, i le faaolataga na ia saunia mo i matou. **Amene!**

Aso Sā – Aukuso 23: “O se loto e saili i le poto” (*A heart seeking wisdom*)

Tusi Faitau – Salamo 119: 33-40

Matua – ff. 33, 34: *“Le Alii e, ia e a’oa’o mai ia te a’u i le ala o au tulafono, ona ou anaana lava lea i ai seia o’o i le gataaga. Ia e a’oa’o mai ia te a’u, ona ou anaana lea i lau tulafono, ma ou tausia ma lo’u loto atoa.”*

O le loto o lo’o saili i le poto, o le naunauta’ina loloto lea o le fai salamo i le a’oa’o mai o le Ali’i i le ala o ana tulafono. Ona olioli ma anana ai lea o ia, se’ia o’o i le gataaga, i le loloto ma le ofoofogia o ana tulafono. E le’i fa’alagolago le fai salamo i lona lava poto, aua ua silafia e ia, o le poto mai i le Atua, o le poto sili lea. O lana tatalo lea i le Atua, ina ia liliueseina e le Ali’i ona mata, nei matape’ape’a pe vaai fo’i i mea le aoga. A ia fa’atumauina ma fa’aolaina lona loto i le mana o lana afioga. O le olega lea a le fai salamo ma lona loto maulalo, ina ia aveese e le Atua ia te ia le fefe, a ia mata’u ma fiafia lona loto i le Ali’i i aso uma. Ma ia savali o ia i le ala o le amiotonu. O le naunautaiga foi lea o le fai salamo, ina ia olioli moni lona loto ma usiusita’i i tulafono a le Atua. A ia aua nei fa’atosinaina lona loto i mea fa’atauva’a a le lalolagi. O le tatalo lea a le fai Salamo ina ia sua e le Atua lona loto i le fiafia e faitau ma mafaufau loloto i lana tulafono i aso uma o lona ola. O le mea lea ia tatou fa’alagolago ai i le a’oa’o mai o le Agaga o le Atua. Aua o le poto i mea fa’aleagaga e mana’omia ai le a’oa’o mai o le Agaga Paia. Ma o le Atua fo’i na te foa’i mai le naunau ma le fiafia i o tatou loto, tatou te faitau ai lana Tusi Paia.

Tatalo: Fa’afetai tele le Atua i le a’oa’o mai o lou Agaga. **Amene!**

Aso Gafua – Aukuso 24 : “E o’o mai le oti i tagata uma” (*Death comes to all*)

Tusi Faitau – Failauga 7:1-14

Matua – ff. 2-4: *“E sili ona lelei o le alu i le fale o i ai le fa’anoanoa, i le alu i le fale ua fai ai le tausamiga; aua o le iuga lea o tagata uma; e manatua fo’i e le tagata ola i lona loto...O le loto o le tagata poto ua i le fale ua i ai le fa’anoanoa...”*

O le i’uga o tagata uma lava o le oti. E leai se isi e sao mai ai. Ae o upu a le failauga, “E sili ona lelei o le alu i le fale o i ai le fa’anoanoa, i le alu i le fale ua fai ai le tausamiga.” Aua o le oti, e a’oa’oina ai le loto ma le mafaufau, po o fea e alu i ai le agaga o le tagata pe a oti lona tino. Pe alu le agaga i le ola e fa’avavau, pe alu i le mea o i ai le taufaitagiaue ma le lilivau o nifo i le afi e fa’avavau. O le oti e poto ai le mafaufau. E mafaufau ai i mea lelei e tatau ona soifua ai ae le i o’o mai le oti. Fai mai le failauga, “E sili atu fo’i le aso e oti ai nai lo le aso fanau ai.” O lona uiga, o le aso e oti ai, o le aso ua uma ai galuega a le tagata, o le aso e ta’uleleia ai, e fai ai molimau a tagata o lona aiga i lona soifua. O le tele o molimau o tala o mea lelei sa faia e le tagata ua maliu. E se a se a ona fa’alogo o fai se molimau i ni mea e leaga ai le tagata lea ua oti. E misia uma lava e tagata le tagata ua oti, tusa lava po’o se tagata sa fa’asoesa ma fa’alogogata. E manatua na o mea lelei sa ia faia.

Tatalo: Fa’afetai tele le Atua i le poto ua e foa’i mai. **Amene!**

Aso Lua – Aukuso 25 : “Poto i le amataga ae le’i fa’avaeina le lalolagi ”

Tusi Faitau – Fa’ataoto 8: 1-36 (*Wisdom at the dawn of time*)

Matua – ff. 22, 29e-31: *“O le Ali’i e ona lava a’u, o le amataga o lona ala...a’o tusia e ia fa’avae o le lalolagi; na ou i ai ma ia, o a’u o le tufuga; na fai fo’i a’u ma ona fiafia i lea aso ma lea aso; sa ou olioli i ona luma i aso uma lava.”*

O Iesu o le poto nai le amataga o le foafoaga ae le i fa’avaeina le lalolagi. O ia o le tufuga ma le tusi ata na i ai fa’atasi ma le Atua, i le amataga. Na fesoasoani fo’i o ia i le

Atua i le amataga. Na fai fo'i le potu (*Iesu*) ma fiafiaga o le Atua i aso uma lava. Sa olioli foi Iesu i luma o lona Tama, Le Atua, i aso uma lava o le foafoaga. Na fiafia foi le potu i le tagata na faia e le Atua i le amataga. O le potu fo'i, e le'i ma nofonofo, ae na galulue fa'atasi ma le Atua i le foafoaina o le lagi ma le lalolagi ma mea uma lava na i ai. Aemaise ai le fausia ina o le tagata. O le potu (*Iesu*) e avanoa o ia mo so'o se tagata. O le potu e le nana ina. O lo'o valaau atu le potu i tagata uma. O e o lo'o nonofo i mea mauualuluga ma e o nonofo i aai, ma i latou uma o e fia mau o ia, o lo'o fa'aloaloa atu ona lima mafala, mo e o lo'o fiafia e sailili ma su'esu'e atu ia te ia. O Iesu foi o le upu na i le amataga. E sili atu lona taua nai lo auro ma ario ma ma'ataua uma o le lalolagi. E le mafa'atusatusaina le potu i se isi lava mea fa'atosina a le lalolagi. Aua o le mata'u i le Atua, o le amataga o le potu. E inoino foi le potu i e amio leaga, i le tagata fa'amaualuga, ma le tagata fa'asausili ma vaai mauualo i le isi tagata. A e amuia lava se tagata ua na mau le potu (*Iesu*). O le tagata lena ua na mau le ola e fa'avavau.

Tatalo: Fa'afetai tele le Atua e i le potu ma lou atamai. **Amene!**

Aso Lulu – Aukuso 26: “Ole atu mo le mealofa o le potu”

Tusi Faitau – 2 Nofoaiga Tupu 1:7-12 (*Asking for the gift of wisdom*)

Matua – ff. 7-10 : *“Ua fa'aali mai le Atua i lea lava po ia Solomona, ma fa'apea mai ia te ia, Ia e fai mai se mea ou te avatu ai ia te oe. Ona fa'apea atu ai lea o Solomona i le Atua, O lenei, ia e foa'i mai ia te a'u le potu ma le atamai, ina ia ou fealua'i i luma o le nu'u nei; aua o ai ea se na te mafaia ona fa'amasinoina lou nu'u nei ua tele?”*

Ua ole atu le tupu o Solomona i le Atua mo lana mealofa, o le potu ma le atamai, ina ia mafai ona ia fa'amasino atu i lona nu'u. Aua ua silafia e Solomona e sili atu lava le potu e foa'i mai e le Atua. E mafai ai ona ia fa'amasinoina lona nu'u ma le amiotonu. I le mafuta ma le fesoasoani mai o le Agaga o le Atua ia te ia. O le mea lea, e le i fa'alagolago ai le tupu o Solomona i lona lava potu. A e na ia fa'alagolago ma lona loto atoa i le Atua. Ina ia matala lana fa'alogu ma manino lana vaai i le taimi e fa'amasinoina ai lona nu'u. Ua na 'oa'oina fo'i lona loto, e fai le amiotonu a le Atua, ae aua nei faia e ia le fa'amasinoga mo sona tau, po o sona viiga, pe mauola ai fo'i, i lana galuega. A ua silafia e le Atua le naunautaiga o le loto ma le manaoga o Solomona, ona ia foai atu ai lea ia te ia, e le gata o le potu ma le atamai, ae ua ia foai atu foi le oloa, ma le tamaoaiga, ma le mamalu o le Atua e faatino ai lana galuega. O lea ia tatou ole atu ai i le Atua, mo le potu ma le atamai, tatou te iloa ai fa'amasino le lelei ma le leaga, ma tatou iloa ai lo tatou le atoatoa, se'i vagana ua mafuta mai lona Agaga Paia.

Tatalo: Fa'afetai tele le Atua e i le potu ma le atamai. **Amene!**

Aso Tofi – Aukuso 27: “O le ala i le potu” (*The way to wisdom*)

Tusi Faitau – Iopu 28: 20-28

Matua – ff. 20, 23, 28 : *“O lenei, pe sau mai fea le potu? Po o ifea fo'i le mea o i ai le mafaufau...Ua silasila le Atua i lona ala, o ia lava ua silafia le mea o i ai...Na fetalai mai fo'i o ia i le tagata, Fa'auta, o le mata'u i le Alii, o le potu lava lea; o le 'alo ese i le amio leaga, o le mafaufau lea.”*

O le ala i le potu, o le mata'u lea i le Ali'i. Ma o le potu fo'i, e 'alo ese ai le tagata i le amio leaga. O le tali lea a Iopu i le fesili, po'o fea e sau ai le potu. Ioe, o le potu o a le Atua ia. Ma o le potu foi, o le mealofa foa'i fua mai lea a le Atua. E le mafai ona fa'atauina le potu i ni tupe. E le mafa'atusatusaina fo'i le potu i ni auro ma ni ario. Aua, e sili atu le potu i penina ma oa taugata uma a lenei lalolagi. Aua, o le Atua, e ana le potu. O lona uiga, e fa'aleagaga le potu, ae le fa'aletagata. Aua, e le iloa se potu o le tagata i lona le ava ma lona le usita'i i le Atua. A e iloa le potu o le tagata i lona ava ma lona mata'u i le Atua. Tusa lava pe o'o atu ia te ia ni puapuaga o lenei olaga. Aua, o le

poto, e 'alo ese mai ai le tagata i le leaga, a e usita'i o ia i le Atua. Ua na o le Atua lava na te silafia le nofoaga o le poto. Ma e fia afio le poto i totonu o lou loto, pe a mama ma tumu i le alofa i le Atua.

Tatalo: Fa'afetai tele le Atua e i le poto ua e foa'i mai. **Amene!**

Aso Faraile – Aukuso 28: “O Keriso na fa’asatauroina, o le poto o le Atua”

Tusi Faitau – 1 Koronito 1:18-25 (*Christ crucified, the wisdom of God*)

Matua – f. 18 : *“Aua o le mataupu i le satauro, o le valea lea i e o malaia; a o le mana o le Atua ia te i tatou o lo’o fa’aolaina.”*

O Iesu, o le Keriso, po o le Fa'aola na fa'asatauroina. O Iesu foi o le poto o le Atua. O le upu “Keriso” i le gagana Eleni, o le “fa’auuina po o le fa’aola.” O le upu lava lea e tasi o lo o ta’ua o le “Mesia” i le gagana Eperu. A e uiga tutusa ma e tutusa foi lona fa’aaogaina. O le poto o le Atua ua ia fa’aaogaina ai mea vaivai a le lalolagi e fa’amaina ai mea malolosi. Ua filifilia ai foi e le Atua mea valea i le lalolagi e fa’amaina ai e popoto. Ua filifilia ai fo’i e le Atua mea maulalo ma le fa’atauva’a i le lalolagi e fa’amaina ai mea o lo’o fa’asausili ma fa’amauualuluga ai. Aua o le mata’upu i le satauro, o le valea lea i e o malaia, ae o le mana lea o le Atua mo e ua fa’aolaina. O lona uiga, E valea le saturo i le vaai a tagata o le lalolagi. Aua, e mafai ea e se tagata ona fasioti ma fa’atautau le Atua i le satauro? I le mafaufau o tagata o le lalolagi, e valea lena mea. Aua o le Atua e le mafai ona fasioti e se tagata. A o lea e pepese ma tapuai i ai tagata Kerisiano. O le mea lena e le mafai ai e tagata o le lalolagi ona latou talia Iesu, o se Atua. A e o le mata’utia ma le ofoofogia lena o le talalelei ia Iesu, aua ua auala mai ia te ia le fa’aolataga o le lalolagi. O Iesu lava o le poto o le Atua, ma o ia fo’i o le amiotonu a le Atua. E le gata i lea, o Iesu foi o le fa’apaiaina mai. Ma o Iesu foi o le togiola. Aua ua ia totogiina a tatou agasala i lona ola ina ia le fano se tasi e fa’atuatua ia te ia.

Tatalo: Fa'afetai tele Iesu e i lau fa'aolataga. **Amene!**

Aso Toona’i – Aukuso 29: “Poto mai luga” (*Wisdom from above*)

Tusi Faitau – Iakopo 3:13-18

Matua – ff. 17-18 : *“A o le poto mai luga e muamua ona mama, i le ua filemu, e agamalu, e ganagofie, e tumu i le alofa ma fua lelei, e le alofa faapito, e le faataga fai. Ua luluina fo’i le fua o le amiotonu ma le filemu e i latou o e fa’atupuina le filemu.”*

O ai se ua i ai le poto ia fa’aali mai ia i lana amio lelei. E agamalu, ma e pei o ia o Iesu. Aua o Iesu o le poto mai luga, o le mealofa foai fua mai lea a le Atua mo ona tagata, mo e fa’atuatua ma talitonu ia te ia. O Iesu Keriso, o le poto o le Atua. E muamua ona mama, e leai se mea e agasala ai o ia. E filemu, e ui lava i le tu’ua’i leagaina, sasa, feanu, tauemu, fa’apale tuitui, ma tutu’i ona aao i fao, e le’i tau’i atu e ia i le leaga, a e na ia tatalo atu i lona Tama, e fa’amagalo i latou, aua ua latou le iloa le mea ua latou faia. O Iesu e agamalu ma filemu. E ganagofie ma e le finau vale. E tumu i le alofa, na ia foai mai ai lona ola e fai ma togiola mo le fa’aolaina o le lalolagi atoa. Ma ua fua mai ia te ia ni fua lelei. Ua auala mai ai le fa’aolataga ma le ola e fa’avavau. E le alofa fa’apito o ia ae alofa o ia i tagata uma lava na faia e le Atua lona tama. E alofa Iesu ia i tatou uma.

Tatalo: Fa'afetai tele le Atua mo Iesu Keriso lo matou Ali'i Fa'aola. **Amene!**

ISAIA MATAUPU 1-39 (2) – ISIAH CHAPTERS 1-39 (2))

1. Fa'alumaga mai le Atua (*Provision from God*)

Aso Sā – Aukuso 30: “Vivi’i atu i le Ali’i”

Tusi Faitau – Isaia 25:1-12 (*Praise to the Lord*)

Matua – f.9: *“O lea aso e fa’apea ai, Faauta, o lo tatou Atua lenei; sa tatou fa’atalitali ia te ia, ua ia fa’aolaina fo’i i tatou; o le Ali’i lava lenei, sa tatou fa’atalitali ia te ia; tatou te fiafia ma olioli i lana fa’aolataga.”*

“Vivi’i atu ia i le Ali’i” o se pese i le lumana’i. O le a pepese fiafia ai ma alalaga ai tagata nu’u uma o le Atua, o le a toe fa’aolaina mai i latou ai sauaga a le malo Asuria na fa’apologaina i latou. Sa latou fa’atalitali a o lea ua lavea’i mai le Atua ma o le a mavae atu o latou mafatiaga ma soloieseina e le Atua o latou loimata. O le Ali’i lava lenei na latou fa’atalitali i ai ua latou fiafia ma olioli i ai i lana fa’aolataga. Aua ua fa’aumatia foi e ia le oti e fa’avavau ma le agasala. O le a saunia fo’i e le Atua le faigaai ma le tausamiga o mea ua silisili ona lelei. O lo o vivii atu ai le perofeta o Isaia i le fa’amaoni o le Atua, mai lava i le vavau, se’ia o’o i le fa’avavau. Aua e le liua o ia, o ananafi, o le aso, e o’o foi i le fa’avavau. O le tali fa’aaliali mai lea o le Atua, latou te iloa ai lona alofa fa’amaoni ia i latou. Ua latou olioli ai i lo latou Atua, aua o lo’o soifua pea o ia. E le pei o atua o tagata o nu’u ese e fai i laau ma ma’a ma mea e leai ni ola. E fai o latou mata ae le vaai, e fai o latou taliga ae le fa’alogo. Ma o le a fa’ataunu’uina ma taunu’u lenei valoaga ia Iesu Keriso, o le na toetu manumalo i le tuugamau. Ua le mafai e le oti ona taofi o ia i le tuugamau. O le mea lenei tatou te vivi’i ai pea i le Atua, ona o lana fa’aolataga e ala ia Iesu Keriso, ua tatou maua ai le ola e fa’avavau.

Tatalo: Faafetai tele le Atua e i lau fa’aolataga. **Amene!**

Aso Gafua – Aukuso 31: *“Ua mana’o lo’u loto ia te oe” (My soul yearns for you)*

Tusi Faitau – Isaia 26:1-13

Matua – ff. 8, 9: *“E moni, le Ali’i e, ua matou fa’atalitali ia te oe i le ala o au fa’amasinoga; o le mana’o o matou loto o lo’o i ai lea i lou suafa, ma le fa’amanatuga ia te oe. Ua mana’o lo’u loto ia te oe i le po; e moni, e ala saili ia te oe lo’u agaga i totonu ia te a’u; aua e a’oa’oina e o nonofo i le atu laulau, pe a faia au fa’amasinoga i le lalolagi.”*

O lea pese e pepese ai le fanauga a Iuta pe a o’o atu le fa’aolataga. Ua latou vivii ai i le Atua aua sa latou fa’atalitali i le laveai mai o le Atua. O lea ua taunu’u lana fa’amasinoga. Ua tali mai le Atua i o latou mana’oga ma ua fa’asa’olotoina. Aua sa sauaina i latou e Asuria i le tausaga e 8 seneturi ae lei fanau mai le Mesia. Ua fa’apea atu ai upu o le pese, “Ua mana’o lo’u loto ia te oe i le po.” O lo o fa’atusa le po i puapuaga ma tiga o lo’o fetaia’i ma i latou. Fai mai e “ala saili ia te oe lo’u agaga,” O le naunautaiaga lea o latou loto, ia o’o mai loa lana fa’aolataga. A o’o mai loa lana fa’amasinoga ona latou manatua ai pea lea o lona Suafa ma latou salamo ai. O lea ia latou fa’atuatua ai pea i le Atua. Ma tatalo pea i le Atua. O le eseese lea o e amiotonu ma e le talitonu i le Atua. E tumau pea e amiotonu i le Atua, ae le fia talitonu i latou ua amioletonu, tusa lava pe vaai i latou i le alofa o le Atua. O lea ia tatou manatua ai pea le alofa o le Atua, ma fa’afai pea ia te ia le viiga. Ma ia tumau pea lo tatou fa’atuatua ia te ia, nei ma se’ia o’o i le fa’avavau.

Tatalo: Fa’afetai tele le Atua i le fa’atuatua ua e foa’i mai. **Amene!**

Aso Lua – Setema 1: *“O se tovine fuatele” (A fruitful vineyard)*

Tusi Faitau – Isaia 27:2-13

Matua – f. 6: *“O ona po o amuli e sosolo ai aa o Iakopo; e fuga mai ma matala o Isaraelu, ona tumu ai lea o le fogaelele uma i ona fua.”*

O se fa’au fa’amalosi lenei a le Atua mo le nu’u o Isaraelu ma Iuta. O le a o’o atu le aso latou te pepese ai i le tovine. Aua o le a fa’aumatia e le Atua lo latou fili, le nu’u o Asuria, sa faatafunaina Samaria, ma latou fa’amata’u ia Iuta. O lo’o fa’aigoaina e le perofeta o Isaia le nu’u o Asuria o le leviatana, le gata tele vave i le fuaiupu 1. O le a fa’asa’olotoina i latou ma latou toe vivii ai i latou i le Atua. Aua o le Atua o le galue

vine ia, na te fa'asusuina, ma leoleoina Isarelu, le tovine a le Atua. O le a liua lo latou fa'anoanoa i le fiafia. O le a toe fa'afoi mai ona tagata sa fa'ataapeina i Asuria ma Aikupito. Ma o le a fa'atafunaina e le Atua nu'u tua'oi uma ma o latou tupua. O se vaaiga lea i le lumana'i pe a afio mai le Mesia. Lea na fa'ataunu'uina i le afio mai o Iesu Keriso. Ua fa'ataunu'uina ai le valoaga Isaia. O Iesu o le vine moni, a o la i tatou. O le tumau ia Keriso, e fua tele mai o ia. A tatou le tumau i le Ali'i, e vavaeeseina ma lafotuina i tatou i le afi. Ua fetalai mai ai Iesu.

Tatalo: Fa'afetai tele Iesu aua o lau afio lava o le vine moni. **Amene!**

Aso Lulu – Setema 2: “O se pale matagofie” (*A beautiful wreath*)

Tusi Faitau – Isaia 28: 1-6

Matua – f. 5: *“O lea aso e avea ai le Ali'i o 'au ma paleali'i e matagofie, ma pale lalelei i e ua totoe o lona nu'u...”*

O lea aso o le a o'o mai, o le a avea ai le Alii o 'au ma paleali'i matagofie, ma pale lalelei i e ua totoe o lona nu'u. Ua fa'atatau lea i le aso o le a o'o mai ai le fa'aolataga i tagata o lo'o totoe mai le fa'atafunaga o le aai o Samaria e le malo Asuria. Ma o le a toe fa'asa'olotoina ai i latou ma toe fa'aleleia mea uma lava na fa'atafunaina. E ui lava i le oona ma le tiga o puapuaga o le a o'o mai ia Efaraima, le malo o Isarelu, ona ua latou o ese ma le Atua. Aua ua onana o latou ta'ita'i i le uaina, ma ua faiaina ai i latou i le fa'amaualuga, ma ua mamae ai lo latou matagofie. Ua o'o atu ai le fa'amasinoga a le Atua. Ae o lo'o alofa pea le Atua ma toe laveai ia i latou. O le mea lea, ia aua lava ne'i galo ia i tatou le Atua, pe a maua e i tatou le manuia. Aua ua tatou manuia ia Iesu Keriso, o ia lava o le paleali'i matagofie ma le pale lalelei tatou te pale ai. Aua o ai lava ua na taliaina Iesu e fai ma ona Ali'i Fa'aola. Ma talitonu i lona maliu ma lona toetu manumalo, ma fa'atuatua ia te ia, e maua e ia le ola e fa'avavau. A e oi talofa i e ona i le uaina ma fa'amaualuga i le oa ua latou maua, o lona iuga lava o le fa'atafunaina i le fa'amasinoga a le Atua.

Tatalo: Fa'afetai tele Iesu mo le pale matagofie ua matou maua. **Amene!**

Aso Tofi – Setema 3: “O le a fa'alogu tutuli” (*The death will hear*)

Tusi Faitau – Isaia 29: 13-24

Matua – f. 18: *“O le aso lava lea e lagona ai e o tutuli i upu a le tusi, e fa'apupulaina fo'i mata o e ua tauaso ina ua te'a le pouliuli ma le pogisa.”*

O le valoaga lea a Isaia e fa'atatau i le aso o le a lagona ai e tutuli upu a le tusi. E fa'apupulaina ai mata o le fanauga a Isarelu. O le a le toe tauaso o latou mata i upu a le Atua. O le a te'a atu le pouliuli ma le pogisa i o latou mafaufau. O le aso foi lena o le a afio mai ai le Mesia. O le a maliu ma toetu ma toe afio a'e i le lagi ae auina mai lona Agaga Paia e fa'amalalamaina ma fa'apupulaina mata fa'aleagaga o tagata uma lava. Ina ia manino upu uma o le Afioga Paia a le Atua. Aua ua na ona latou vivii atu i le Atua, ua na o latou laugutu, ae ua mamao ese o latou loto ma ia. Fa'apea lava i latou e le o silasila mai le Atua. E le o iloa mai e le Atua a latou amio leaga o lo'o fai. O le mea lea ua fetalai mai ai le Alii. O le a ia faia lava le vavega ma le aso e ofo tele ai, o le a fa'apupulaina ai o latou mata. E o'o lava i tagata matitiva o le a olioli i latou aua o le a mavae atu aso o le sauaga, o le a fa'aumatia ai e tauemu, ma fasiotia e fai mea leaga. A e o le a o'o mai le aso e a'oa'oina ma popoto ai le fanau a le Atua i upu o lana Afioga Paia. O le mea lea ia tatou mataala ai. Aua nei o tatou fa'atalale i le faitauina o lana Tusi Paia. A ia tatou tapuai atu i le Atua ma o tatou loto atoatoa. Ma ia ofoina atu o tatou tagata atoa mo ia ma lona finagalo.

Tatalo: Fa'afetai tele le Atua e i lau vavega i le mana o lau upu. **Amene!**

Aso Faraille – Setema 4: “O se Atua fa’amasino tonu”

Tusi Faitau – Isaia 30:15-26 (*A God of justice*)

Matua – f. 18 : *“A e ui lava i lea e fa’atalitali le Ali’i ina ia alofa fua mai ia te outou; o le mea lea e tula’i ai o ia e alofa ia te outou; aua o le Ali’i, o le Atua e fa’amasino tonu ia; amuia i latou uma o e fa’atalitali ia te ia.”*

O le Atua e fa’amasino tonu ia. E fa’atuatua i lana fa’amasinoga, ma fa’atalitali ia salamo tagata uma, ona o lona alofa tunoa ma lona alofa mutimuti vale i ona tagata. Ae amuia lava i latou o e fa’atalitali ia te ia. O lana fa’amasinoga tonu e le o se fa’asalaga, a e finagalo o ia, ia fa’amaloloina, ma fofoina o latou manu’a, ma toe fa’aleleia le mafutaga vava lalata a le tagata ma ia, ma liligi mai lana fa’amanuiaga mo tagata uma lava, o e fa’atalitali atu ia te ia, i le taimi a le Atua, ae le o le taimi a le tagata. Ma o le taimi o lana fa’amasinoga o le a fa’aumatia ai ona fili ma e o lo’o fouvale ia te ia, e pei o le malo Asuria. O le a fa’atafunaina i latou e le Atua aua ua fa’afofoga le Atua i le auega a ona tagata i a latou sauaga. E ui lava i lona alofa i lona nu’u, ae o lana fa’amasinoga tonu o le a fa’aumatia ai e fouvale ia te ia ma toe fa’afai mai ona tagata ia te ia, i le fa’atuatua. O ai lava e liliu mai ma le filemu ia te ia, e fa’aolaina i latou.

Tatalo: Fa’afetai tele le Atua e, i lau fa’amasinoga tonu. **Amene!**

Aso Toona’i – Setema 5: “O le malo o le amiotonu”

Tusi Faitau – Isaia 32:1-8 (*A kingdom of righteousness*)

Matua – f. 1-2 : *“Fa’auta, e pule le tupu ma le amiotonu, e pule fo’i ali’i ma le tonu. E fai fo’i le tagata e pei o se lafitaga i le matagi, ma se mea e malu ai i le afa; e pei o vaitafe i le nu’u naumati, e pei o le paolo fo’i o le papa tele i le nu’u ua le o i ai se vai.”*

O lo o fa’amatala e le perofeta o Isaia se malo amiotonu i le lumana’i o le a afio mai ai le tupu e pule ma le amiotonu. O le vaitau lena e pule ai fo’i ali’i ma le tonu. E avea ai fo’i le tagata ma lafitaga i matagi ma malu ai i afa. E avea ai foi le tagata ma vaipuna e feiunu ma malilie ai. E fai ai fo’i le tagata ma paolo i le mu tinitini o le la. Ua fa’ataunu’uina lea valoaga ia Iesu Keriso. Aua o Iesu Keriso lava ua fai ma o tatou lafitaga i afa. Ma ua feinu ma malilie ai fo’i tagata uma e talitonu ia te ia. O ai lava e talitonu o Iesu o le Alo o le Atua, na maliu ma toetu manumalo, ma fa’atuatua atu ia te ia, e le toe fia inu lava. O ai lava ua talia Iesu e fai ma ona Ali’i Fa’aola, ua le toe agasala o ia, a ua fai e ia le amiotonu a le Atua. Aua ua fa’apea lava ona alofa mai o le Atua i le lalolagi, ua ia auina mai ai lona Atali’i Pele e to’atasi, ina ia le fano lava se tasi e fa’atuatua ia te ia. A ia maua e i tatou uma, o e fa’atuatua ia te ia, le ola e fa’avavau.

Tatalo: Fa’afetai tele le Atua e, ia Iesu Keriso lo matou Ali’i Fa’aola. **Amene!**

ISAIA MATAUPU 1-39 (2) – ISAIAS CHAPTERS 1-39 (2)

2. Ua na o le Atua na te laveai (*Delivery through God alone*)

Aso Sa o le Tala Lelei

Aso Sā – Setema 6: “Filemu ma le manuia”

Tusi Faitau – Isaia 32:9-20 (*Qiteness and peace*)

Matua – f. 17 : *“O le mea e tupu i le amiotonu o le manuia lea; e tupu mai fo’i i le amiotonu le filemu ma le saogalemu e fa’avavau.”*

O le amiotonu e tupu ai le filemu, le manuia ma le saogalemu e fa’avavau. O le amiotonu fo’i, e fa’asagatonu ai le ola o le tagata i le Atua. E le maua se filemu i le manatu fa’apito ma le manatu fa’amauualuga. Ae maua le filemu i le Atua. Tusa lava pe fetai’i le tagata ma puapuaga ma faigata, e maua pea e ia le filemu pe a fa’atasi ma le Agaga o le Atua. O le filemu lea e ta’ua e Isaia, e le mafai ona fa’atauina i oa a le lalolagi. A e foai mai e le Atua pe a ususita’i, tausi ma mulimuli i ana poloaiga. E avea

ai le vao lafulafua ma fanua lafulemu o le vaomatua. O le filemu lea e maua i le amiotonu ae le o le ola fa'atalanoa. Mo i tatou, o le filemu e maua lea ia Iesu Keriso. Pe a ola Keriso i totonu o tatou loto. Aua o Keriso o le amiotonu lava lea a le Atua na ia foa'i mai mo i tatou ina ia tatou maua le filemu ma le manuia e fa'avavau. Afai e ola Keriso i totonu o tatou loto, ua le o toe tagata tuai i tatou, a o tagata fou ua fa'aolaina.

Tatalo: Fa'afetai tele le Atua e, i lou filemu ma lou manuia. **Amene!**

Aso Gafua – Setema 7: “Ua matou fa’atalitali atu ia oe” (*We long for you*)

Tusi Faitau – Isaia 33:2-13

Matua – f. 10: *“Ua fetalai mai le Alii, Ou te tula’i atu nei lava; e viia nei lava a’u; e fa’asilisiliina nei a’u.”*

Ua fetalai mai le Ali'i, o le aso lava lenei ou te lavea'i atu ai lona nu'u 'ai le sauaga a le malo Asuria. O le a viia o ia e ona tagata. Ma o le a fa'asilisilina fo'i o ia e ona tagata. Ma o le a fa'aumatia e le Atua le fili o lona nu'u. Ona ua le mafai e ona tagata ona fa'asagatau atu i o latou fili. O le a le toe gugu le Atua. O le a lagona e tagata uma o le lalolagi lona si'ufofoga. E fa'ailoa atu ai i ona tagata e le o moe pe tulemoe o ia i le leoleoina o lona nu'u. Ma ua fa'ailoa atu fo'i e le Atua i ona tagata, o lo'o tau o ia mo i latou. E tula'i malosi mai le Atua i le taimi latou te vaivai ma mafatia ai ma le mafai ona tete'e atu i o latou fili. Ua vaaia lea alofa ia Iesu Keriso, i lona maliu ma lona toetu manumalo. Ua fa'ia e le Atua le auala e toe lavea'i ai le tagata agasala ma toe fa'afoti atu ai lana tagata na fai, ia te ia.

Tatalo: Fa'afetai tele Le Atua e i lou lavea'i mai. **Amene!**

Aso Lua – Setema 8: “Olioli o e ua togiolaina/e maimoa ou mata i le tupu”

Tusi Faitau – Isaia 33:14-17 (*Joy of the redeemed/your eyes will see the king*)

Matua – f. 14: *“O e agasala i Siona ua fefefe i latou; o e fa'alemata'u ua maua i latou i le mata'u. O ai ea so tatou na te mafaia ona nofo i le afi mu tele? O ai ea so tatou na te mafaia ona nofo i le afi e fa'avavau?”*

Ua valoia e le perofeta o Isaia le aso e o'o mai ai le mata'u ma le fefe i tagata agasala o Siona. O i latou uma o e le talitonu i le Atua. E fa'ataua lea aso i le aso e o'o mai ai le fa'amasinoga a le Atua e pei ona fa'ataunu'uina i le fa'aumatiaina o vaega 'au a Asuria. Na fasiotia ai le afe o ona fitafita tau, i le 701 tausaga ae lei fanau mai le Mesia. Ole afi mu tele o lo'o fa'atusaina i le mamalu o le Atua. A o le afi e fa'avavau o lo'o fa'atusaina i le afi e mu pea i le aso o le fa'amasinoga. E fefefe ai e agasala, aua e mu pea se'ia o'o i le fa'avavau. E leai se isi e fia nofo ai. Ae o le aso fo'i lena e olioli ai e ua togiolaina, o e ua amiotonu, ma e ua tautalatala i le upu tonu, ma e inoino i oloa e maua i le fa'asaua. O le aso lava lena e maimoa ai o latou mata i le tupu o le a afio mai, o Iesu le Mesia ma le Ali'i Fa'aola o le lalolagi atoa. O le a maua ai e i latou uma le filemu. Ma o ai lava e fa'atuatua ma talitonu ia te ia ma taliaina o ia e fai ma ona Ali'i Fa'aola, e maua e ia le manuia e fa'avavau. E ta'ua ai i latou o le fanau a le Atua.

Tatalo: Fa'afetai tele le Atua i le togiola na e saunia mo i matou, e ala ia Iesu Keriso lo matou Alii ma lo matou Faola. **Amene!**

Aso Lulu – Setema 9: “O ai tatou te fa’atuatua i ai?”

Tusi Faitau – Isaia 36:13-20 (*Who do we trust?*)

Matua – f. 19: *“Po o ifea atua o Amato ma Arepa? Po o ifea atua o Sefavaima? Po o ua latou laveaina ea Samaria ai lo’u lima?”*

Ua tau fa'amata'u atu nei Ravesaki, le ta'ita'i 'au o Asuria i ana fa'asalalauga tau fa'afefe i le nu'u o Iuta, ina ia aua ne'i o latou fa'alogi i lo latou tupu o Esekia. Ma ia aua nei o latou fa'atuatua atu i lo latou Atua. Aua e leai lava se tasi na te mafaia ona

laveaina i latou ai le lima fa'asaua o Asuria. O le fesili tau faifai lea a Ravesaki ia Iuta ua fai ma matua. Afai e le'i mafai e atua o Amato ma Arepa ma Sefavaima ona laveaina i latou mai ia Asuria. O lona uiga, e fa'apena fo'i Iuta, e le mafai fo'i e le Atua o Iuta ona laveaina i latou mai le malosi o le malo Asuria. Ae fa'auta i le tali a le Atua, e le'i taunu'u le osofaiga a Asuria ia Iuta aua na fasiotia le tupu o Asuria e ona atali'i i Nineveh. O le mata'utia ma le ofoofogia lena o lo tatou Atua. O le mea lena e tatau ai lava ona tatou fa'atuatua i lo tatou Atua. Aua o ia o le Atua o atua uma lava. Ma e le mafa'atusatusaina lo tatou Atua i atua ese. Aua o atua ese e fai i ma'a ma laau, a o lo tatou Atua na faia le lagi ma le lalolagi ma mea uma lava o lo'o i ai.

Tatalo: Fa'afetai tele le Atua e i le fa'atuatua ua e aumaia. **Amene!**

Aso Tofi – Setema 10: “O le tatalo a Esekia” (*Hezekiah's prayer*)

Tusi Faitau – Isaia 37:9-20

Matua – f. 20: *“O lenei, le Ali'i e lo matou Atua, ia e fa'aola mai ia te i matou ai lona lima, ina ia iloa ai e malo uma o le lalolagi, o oe lava o le Alii, na o oe lava.”*

Ua tatalo Esekia i le Atua ina ia fa'aola mai Iuta ai le lima o Sanerivi le tupu o Asuria, ina ia iloa ai e malo uma o le lalolagi, o le Atua o Iuta, o le Atua o atua uma lava. Ua talia e Esekia le tusi savali a Sanerivi ma faitau i ai, ona ave lea e esekielu ua fofola atu i luma o le Atua i totonu o le malumalu ma tatalo. E le'i fa'alogo Esekia i le taufa'amata'u mai o Ravesaki, i lona tauvalaau atu ia Iuta, e fa'aumatia fo'i i latou e le tupu o Sanerivi. Aua ua fa'atafunaina e Asuria nu'u uma e fa'asaga tau atu i ai. Na muamua lava tatalo Esekia le tupu o Iuta. E le'i fefe Esekia pe to'ilalo fo'i i le taufa'amata'u mai o Asuria. Aua o lo'o soifua lona Atua ma o lona Atua fo'i o le Atua o atua uma lava. O se a'oa'oga lelei fo'i lea mo i tatou. Aua lava nei o tatou fefefe i le taufa'amata'u mai o Satani. A ia tatou mua'i tatalo atu i le Atua o le pule i mea uma lava. E o'o lava i tupu uma o le lalolagi, e pule ai le Atua.

Tatalo: Fa'afetai tele le Atua e, i lou a'oa'o mai pea. **Amene!**

Aso Faraille – Setema 11: “O le a se tala ou te fai atu ai?” (*What can I say?*)

Tusi Faitau – Isaia 38:1-21

Matua – f. 19: *“O le ua ola, o le ua ola, o ia lava e vivi'i atu ia te oe, e pei o a'u lava i le aso nei; e fa'ailoa lou fa'amaoni e le tama i lana fanau.”*

O le tatalo fa'afetai lea a le tupu o Esekia i le Atua ina ua toe fa'afai atu e le Atua lona malosi ma toe fa'aopoopo ia te ia ni tausaga se tele o lona soifua, aua sa ma'i tigaina o ia, a tali oti. “O le a se tala ou te fai atu ai?” O le fesili lea a Esekia aua ua ia talitonu, e pule aoao le Atua i lona ola, i lona malosi, ma lona toe fa'amaloloina o ia. E na o lona talitonu lava ma fa'atuatua i le Atua, au o le Atua e ana le pule ma le malosi uma lava. Ua a'ea ai se lagona ia te ia, Ia ia vivi'i atu i le Atua a'o soifua o ia, ma fa'ailoa atu lona fa'amaoni, aua e le toe mafai e ia ona toe vivi'i atu i le Atua pe a o'o mai le oti. E pei lava o le alofa o le tama i lana fanau, e fa'apena foi le alofa o le Atua ia te ia. O lona uiga, e tatau foi ia i tatou ona tatou fa'ailoa ma a'oa'o a tatou fanau i le alofa o le Atua. O lea ia tatou fa'aavanoaina ai o tatou taimi e vivi'i atu ai le Atua ma a'oa'o a tatou fanau i le fa'amaoni o le Atua.

Tatalo: Fa'afetai tele le Atua e i lou alofa fa'amaoni. **Amene!**

Aso Toona'i – Setema 12: “O ave fe'au mai Papelonía” (*Envoys from Babylon*)

Tusi Faitau – Isaia 39:1-8

Matua – f. 1: *“O ona po ia na aauina ai e Merota-palata le atali'i o Palata, le tupu o Papelonía, nisi e au mai tusi ma le mea alofa ia Esekia; aua na ia fa'alogo, na ma'i o ia, a ua malolo.”*

Ua asia nei e ave fea’u a le tupu o Papelonia le tupu o Esekia i ni mealofa se tele lava ona o lona gasegase ua toe fa’amaloloinaa. Ua manatu ai Esekia, e fa’aali ana auro uma, ma ana ario, ma ana fale oloa, ma mea manogi uma ma u’u lelei i ave fe’au Papelonia. E leai se oloa e le’i fa’aalia e Esekia ia i latou. Ona fetalai atu lea o Isaia ia Esekia, e sau le aso e ave fa’amalosi ai i Papelonia ana mea uma na latou vaai i ai. E leai se mea e tasi o lona fale e totoe, e o’o lava i lana fanau ma ana meaola. O le a fai faamalosia fo’i lana fanau ma eunuka i Papelonia. O le mea lea ia tatou maua le loto maualalo tatou te fa’apea ifo ai, o mea uma ua tatou maua, o tupe, ma oloa, ma fale, ta’avale, o meaalofoa uma ia na aumai i le Atua. Aua ne’i o tatou manatu fa’amauualuga i oa ma tupe ma mea totino ua tatou maua. Ae ia tatou manatua o mea uma lava, o a le Atua ia. O le malosi ma le ea o lo’o tatou manavaina, o mealofa foa’i fua mai lea e le Atua. Ia tatou manatua ai fo’i le alofa o le Atua ia i tatou i taimi uma, i lona Alo Pele o Iesu Keriso, na ia auina mai ina ia maua e i tatou uma o e fa’atuatua le ola e fa’avavau.

Tatalo: Fa’afetai tele le Atua e mo le fa’amanatu. **Amene!**

PULE MA LE PULEGA – AUTHORITY AND GOVERNANCE

Aso Sā – Setema 13: “Muamua i e tulaga tutusa” (*First among equals*)

Tusi Faitau – Teuteronomie 17:14-20

Matua – f. 14 : *“Pe a o’o atu foi i le nu’u e foaina mai e le Ali’i lou Atua ia te oe, ma e fai mou, ma e mau ai, ma e fa’apea ane, Ou te faia se tupu mo’u, e pei o nu’u uma lava e vagavagai mai ia te a’u.”*

O le upu lenei na apoapoai atu ai Mose i le fanauga a Isaraelu ae le’i o atu i latou i le nu’u folafolaina. Afai latou te o’o atu i Kanana, ma latou fa’apea ane, e fia fai so latou tupu, ia fa’apea lava ona latou filifilia se tupu e mua’i alofa i le Atua. Aua a mua’i alofa le tupu i le Atua, e fa’apena fo’i ona alofa le tupu ia ia i latou. Ia muamua lava i lea tupu ona ia fa’apea ifo ia te ia lava, ua na o ia lava o se auauna le aoga, ae le o ia o se tupu saua ma le fa’asausili. Ia auauna atu o ia i tagata ae le o le auauna mai o tagata ia te ia. Ia tusia fo’i e le tupu upu uma lava o le Tusi Paia, ma ia faitau i ai i aso uma o lona ola, ina ia mata’u ai i le Atua, ma ia aua nei fa’amualugaina lona loto. Ma ia ta’ita’ina ai e ia le fanauga a Isaraelu i ala uma o le Atua. Ia filifilia mai se tupu mai o latou uso, a e aua lava ne’i filifiliga se tupu mai tagata o nu’u ese. Ia aua lava ne’i filifilia se tupu e fiafia e fa’ateleina ana auro, ma ana ava, ma ana mea totino, nei toe fa’apologaina i latou e pei ona faapologa i latou i Aikupito. O le mea lea e fa’atauaina ai le faitauina o upu uma o le Afioga Paia a le Atua i aso uma, e fa’apoto ai, ma mata’u ai i le Atua, ma ave ai i tatou ma ta’ita’i lelei, e loto maualalo ma anaana i le Atua. A tatou mua’i alolofa i le Atua, e fa’apena fo’i ona tatou alolofa atu i isi tagata.

Tatalo: Fa’afetai tele le Atua e, i le ta’ita’ina o i matou i lau upu. **Amene!**

Aso Gafua – Setema 14: “Fa’agaloina ma le manatuaina”

Tusi Faitau – Faamasino 2:6-19 (*Forgetting and remembering*)

Matua – f. 6: *“Sa tu’u atu e Iosua le nu’u e o, ona o ai lea o le fanauga a Isaraelu e ta’itasi i lona tofi, e fai mo latou le nu’u.”*

Ua fa’agaloina e le tupulaga fou le Atua ina ua mavae atu le tupulaga a Iosua. Ua le toe manatua le Atua. A’o le’i maliu Iosua ma toeaia na totoe o le nu’u, sa tu’uina atu e ia le fanauga a Isaraelu e o, ina ia ta’itasi i latou ma faatino i lona tofi. Ae fa’auta, ua le a’oa’oaina e i latou le tupulaga fou i le Ali’i ma ana galuega na faia mo Isaraelu. I le laveaiina o i latou mai Aikupito ma le fafagaina o i latou i tausaga e 40. A ua amio leaga le tupulaga fou a Isaraelu i luma o le Ali’i, ma ua latou auauna atu i atua ese o Paala ma Asaira, ma latou fa’aoono ai i le Ali’i. Ona to’asa ai lea o le Ali’i ma tu’uina

atu i latou i lima o e vete mea ma e o lo'o ita ia te i latou. Na fa'atuina foi e le Atua ni fa'amasino e fa'aolaina i latou ai lima o e vete mea, ae ua le fa'alogo lava i latou i fa'amasino. A e ua mulimuli ma mulilulua i latou i atua ese. O le mea lea e tatau ai lava ona tatou a'oa'o i a tatou tupulaga fou i Afioga Paia uma lava a le Atua. E ola mai ai le tamaititi, e iloa ona ava ma mata'u i le Atua.

Tatalo: Fa'afetai tele le Atua e, i lou a'oa'o mai pea. **Amene!**

Aso Lua – Setema 15: “O le a le ituaiga pule?” (*What kind of authority?*)

Tusi Faitau – Luka 22:24-30

Matua – f. 27: *“Aua po o ai le sili; o le taoto ea e ‘ai, po o le auauna mai? E le o le taoto e ‘ai ea? A o a’u nei, o lo’o ia te outou pei o le auauna lava.”*

Ua a'oa'o atu Iesu i ona so'o ina ua finau i latou po'o ai e sili. Ua fetalai atu ai o ia, “O le sili, ia avea o ia ma auauna, ma e pito itiiti, ma ia ia te ia le loto maulalo.” Aua e le mafai e le tagata fa'amualuga ona auauna atu i isi tagata. Ua fa'amanatu atu fo'i e Iesu, o ia o le auauna, na sau e auauna atu i isi tagata, ae le i sau e auauna mai isi tagata ia te ia. O le ituaiga pule lena e fiafia i ai le Atua, o le pule ma le loto maulalo e mafai ai e ia ona auauna atu i e o fia maua se fesoasoani. Aua a maua e i latou le loto maulalo e maua foi e i latou le avanoa latou te ta'ita'ia ai le to'atele o tagata. O le mea lea ia maua ai e i tatou uma le loto maulalo. Tatou te auauna atu ai i tagata ma lona. Ona o le finagalo lea o le Atua mo i tatou. Aveese ia i tatou le manatu fa'amualuga ma le fa'aususili. Aua e le fiafia i ai le Atua. A ia tatou ofo ina atu o tatou ola e auauna ai i le Atua ma le loto maulalo. Ona fa'amanuiaina lea o i tatou i mea tetele.

Tatalo: Fa'afetai tele le Atua e, i lau pule ma le loto maulalo. **Amene!**

Aso Lulu – Setema 16: “I le a le pule?” (*By what authority?*)

Tusi Faitau – Mataio 21:23-27

Matua – f. 23 : *“Ua ulufale atu ia i le malumalu, ua a'oa'o, ona o mai ai lea ia te ia o ositaulaga sili, ma toeaina o le nu'u, ua fa'apea mai, “O le a ea le pule e te fai ai na mea? O ai fo'i na na tu'uina atu ia te oe lenei pule?”*

Ua tali atu Iesu i le fesili a le au ositaulaga sili ma toeaiina o le nu'u, i le fesili, ina ua fesiligia o ia po o le a lea pule ua na fai ai ia mea. Ua latou fesiligia le pule a Iesu ina ua tulia uma i fafo e Iesu e na fefa'ataua'i i le malumalu, ma fuli i lalo laulau a e na sui tupe, ma nofoa a e na fa'atau lupe. Ma fa'apea atu, “Ua tusia, e ta'ua lo'u fale, o le fale tatalo; a ua faia e outou ma ana o e fao mea.” Ua tali atu Iesu i la latou fesili, a outou tali mai i la'u fesili lea, ona ou tali atu lea i la outou fesili. “O le papatisoga a loane e mai fea? Mai le lagi, pe mai le tagata?” A ua mumusu i latou e tali atu, ne'i maasiasi i latou i la latou tali. Ona fa'apea atu lea o i latou, latou te le iloa. Ona fa'apea atu lea o Iesu, ou te le ta'ua atu fo'i ia te outou po'o ai e ana le pule. Mo le tatou silafia, o Iesu lava o le ana le pule uma lava. Ua uma fo'i ona aumai e Iesu le pule ia i tatou uma lava tatou te tutuli ai temoni ma fa'amalolo ai ma'i. O le mea lea, ia maua lava e i tatou le loto maulalo tatou te talia, ma talitonu, ma fa'atuatua ai ia Iesu Keriso, e pei ona ia a'oa'o mai ia i tatou.

Tatalo: Fa'afetai tele Iesu mo lau upu fa'amalosi mo i matou. **Amene!**

Aso Tofi – Setema 17: “Lalo o le pulega” (*Under authority*)

Tusi Faitau – Eperu 5:1-10

Matua – f. 9 : *“...ua fa'aatoatoaina fo'i o ia, ona avea ai lea o ia ma tupuga o le fa'aolataga fa'avavau ia i latou uma o e ususita'i ia te ia...”*

Ua ta'ua e le Atua Iesu o le ositaulaga sili e fa'avavau, e uiga fa'atasi ma Mekisateko. O lona uiga, O le pule fai to'atasi a le Atua na avea ai Iesu ma ositaulaga

sili se'ia o'o i le fa'avavau. O le tele o ositaulaga na tofia e tagata, a e ese mai ai Iesu. O Iesu na tofia e le Atua aua ua fa'aatoatoaina o ia e avea ma tupuga o le fa'aolataga e fa'avavau mo e usiusita'i ia te ia. E pei ona usiusita'i Iesu i le finagalo o lona Tama, e fa'apena fo'i i tatou. Ia tatou usiusita'i i le finagalo o le Atua lo tatou Tama. E ui lava ina faigata ma tiga puapuaga na o'o i a Iesu, ae na alu lava o ia i le satauro ona o lona usita'i i lona Tama. E fa'apena fo'i i tatou, ia tatou usiusita'i i le finagalo o lo tatou Tama, tusa lava pe o'o mai puapuaga ma le oti, ona o Iesu ma lana fa'aolataga.

Tatalo: Fa'afetai tele Iesu mo lau fa'aolataga. **Amene!**

Aso Faraile – Setema 18: “Pule fa'alelalolagi” (*Worldly authority*)

Tusi Faitau – 1 Peter 2:13-25

Matua – f. 17: *“Ia outou ava i tagata uma; ia alolofa atu i le au uso; ia matata'u i le Atua; ia ava i le tupu.”*

O lo'o apoapoa'i atu Peteru i Kerisiano uma o lo'o sauaina i nuu uma o le atu Asia o lo'o pulea e Roma ona o lo latou talitonuga ia Iesu. O lea ia latou ava ai i tagata uma. E le na o tagata amio lelei latou te fiafia i ai, ae ia fiafia fo'i i tagata amio pa'aa, aemaise o latou matai, ma ta'ita'i o le nu'u, ma le tupu. O i latou lava ia o lo'o fai ma pule fa'alelalolagi. Ina ia fa'ailoa atu ai le lelei o Iesu i la latou amio, tusa lava pe sauaina i latou. A ia latou mua'i matata'u i le Atua. E tupu ai ma fa'ateleina le onosai pe a sauaina i latou. A ia fai Keriso ma fa'ata'ita'iga ia i latou. E leai se mea na agasala ai o ia. Ae fa'auta, na mua'i tigaina, ma fa'asauaina, ma fa'atautauina i luga o le satauro, mo le fa'amagaloina o a tatou agasala, ae le'i gagana atu lava o ia pe tau'i ma sui atu i lo latou agaleaga. A ua pei o ia o se tamai mamoe a fasia, ona o a tatou agasala, ina ia faaolaina i tatou uma lava, o e fa'atuatua ma alolofa atu ia te ia.

Tatalo: Fa'afetai tele Iesu i lou alofa ia i matou. **Amene!**

Aso Toona'i – Setema 19: “Au-aiga o le Atua” (*God's household*)

Tusi Faitau – Kolose 3:12-4:1

Matua – f. 3:15 : *“Ia pule fo'i le filemu mai ia Keriso i o outou loto, o le mea lea ua valaauina ai outou e fai ma tino e tasi; ma ia outou saga fa'afetai.”*

O le apoapoaiga lea a Paulo i Kerisiano uma ma ua liua ma ua fa'afouina ma ua taliaina Iesu e fai ma o latou Ali'i Fa'aola. Ma ua ta'ua i latou o le auaiga a le Atua. Ina ia iai le filemu o le Ali'i i o latou loto, ma ia fai i latou ma tino e tasi, e ala i le fefa'amagaloa'i ma le fefa'apalepalepa'e'i. Ia ave ese ia i latou le faitaaga, ma le amio leaga, le fa'amataitu, ma le tuinanau leaga, ma le matapeapea. Aua o le ifo i tupua lava lea. E inoino i ai le Atua ma o'o mai ai lona to'asa. A o le auaiga o le Atua e oofu i latou i le alofa mutimuti vale, ma le agalelei, ma le loto maulalo, ma le agamalu, ma le onosa'i. Fa'apei o e ua filifia e le Atua, o e ua paia ma ua alofaina. Ia fusia foi i latou i le tino e tasi i le alofa ma ia latou fai pea le viiga o le Atua ma le loto fa'afetai i aso uma. Ma pepese i latou i salamo ma pese ma siva fa'aleagaga ma le fa'afetai tele i le Atua i o latou loto. Ia tautala fo'i latou uma i upu o le potu i le Suafa o le Ali'i o Iesu. E o'o lava i fafine, ia usiusita'i i a latou tane. A o tane, ia alolofa ia a latou ava. O tama foi aua nei fa'a'ita i a latou fanau nei fa'apalapala i latou. A o fanau, i latou fa'alogu ma ava i o latou matua. O apoapoaiga lelei uma lava ia e ta'ita'ina ai le auaiga o le Atua. E tausi ai le filemu ma nonofo lelei ai, i se aiga e fiafia e fa'amafuta pea i le Agaga o le Atua.

Tatalo: Fa'afetai tele le Atua e mo lau upu. **Amene!**

**MAUA MAI LE ATUA: NOFO POLOGA(1)
STOLEN FROM GOD: SLAVERY (1)**

Aso Sā – Setema 20: “Nofu pologa - O le aafiaga o taua”

Tusi Faitau – Teuteronomo 20: 1-14 (*Slavery-the cost of war*)

Matua – f. 1 : *“A e alu atu e tau ai se taua ma lou fili; a e iloa atu solofanua, ma kariota, ma le nu’u e sili ona to’atele ia te oe, aua ne’i e fefe ia te i latou; aua o ia te oe le Ali’i lou Atua, o le na aveina ae oe ai le nu’u o Aikupito.”*

O le aafiaga o taua, o le nonofo fa’apologaina. O upu fa’amalosia ia a le au faitaulaga ma le au faipule i le nu’u o Isaraelu pe a latou o i le taua. Ina ia aua le fefefe pe matata’u pe a latou vaai atu i solofanua, ma kariota, ma le to’atele o le au tau a le fili. A ia latou iloa ma le mautinoa o lo’o fa’atasi atu ia te i latou le Ali’i le Atua, e tau foi le Atua mo i latou, e fa’aolaina fo’i e le Atua i latou, e pei ona ia fa’asa’aolotoina mai i latou ai Aikupito. E fa’apena foi ona tu’u avanoa ta’ita’i ‘au i tagata o lo’o fa’aluafesasi o latou mafaufau. Afai e i ai se tasi o lo’o alu lona mafaufau i lana faaipopoga e le’i faia, e tatau lava ona nofo e fa’aipoipo muamua ne’i oti o ia, ona fai lea o lana ava fa’aolioli ma ava a se isi tagata. Afai e i ai se tagata e fefe ma fa’avaivai lona loto, ia alu o ia i lona fale, ne’i fa’avaivai ai loto o ona uso, e pei o lona loto. Ia tu’u avanoa foi i o latou fili o lo’o mamao ese o latou nofoaga, a malilie mai e fai i latou ma pologa, ae aua le’i faia le taua, ona fai lea o i latou ma auauna e maua mai ai a latou taulaga. A o nu’u tuaoi o lo’o fai ma o latou fili, ia latou fa’aumatia tane ae ave fa’apagotaina o fafine ma tamaiti ma a latou meaola ma oa mo latou. Mo i tatou, ia aua lava ne’i o tatou fefefe i le taua fa’aleagaga o lo’o feagai ma i tatou. Aua o lo’o ‘au fa’atasi ma i tatou lo tatou Atua.

Tatalo: Fa’afetai tele le Atua e i lou fa’atasi mai. **Amene!**

Aso Gafua – Setema 21: “Nofu pologa ma le tulafono” (*Slavery and the law*)

Tusi Faitau – Levitiko 25:39-55

Matua – ff. 43, 46e, 48a, 53e-55e: *“Aua e te pule ia te ia ma le fa’asaua, a ia e mata’u ia te ia...a e peitai o outou uso o le fanauga a Isaraelu, aua tou te pule fa’asaua le tasi i le tasi...a uma ona fa’atauina o ia e mafai ona toe fa’atauina mai...aua le pule o ia ia te ia ma le fa’asaua i ou luma...Afai fo’i ua le toe fa’atauina mai o ia i nei tausaga, ona alu ese ai lea o ia i le tausaga o le iupeli...o a’u auauna lava i latou na ou aumaia mai le nu’u o Aikupito; o a’u o le Ali’i lo outou Atua.”*

E ese lava le alofa o le Atua i ona tagata, ua ia avatu ai ia Mose o tulafono e ta’ita’ina ai ona tagata, aemaise e ua le mafai ona latou maua ni tupe, po ua lima vaivai ma matitiva. E le mafai ona nofo pologa le isi Isaraelu i le isi Isaraelu, aua o i latou uma o le fanau a le Atua, na fa’asa’olotoina mai i latou mai Aikupito e le Atua. O i le mea lea e le ta’ua ai i latou o pologa, a’o tagata faigaluega. Pe afai ua matitiva ma fia maua se tupu, e mafai ona faigaluega le isi Isaraelu i le isi Isaraelu e totonu ai lana aitalafu. Aua e iai le taimi e leaga ai le fa’atoaga, e fia aai ai, ma fia maua ni tupe e tausi ai o latou aiga. O le mea lea ua faia ai le tulafono, a fa’atauina atu se tasi Isaraelu i le tasi Isaraelu, e mafai ona toe fa’atau mai. Afai foi e fa’atau atu se Isaraelu i se tagata o nu’u ese, e mafai ona toe fa’atau mai e se isi o lona aiga. A’o le tulafono tumau, e fa’asa’olotoina pologa uma i le tausaga o le Iupeli. Tusa lava pe na fa’atau atu i se tagata o nu’u ese, pe nofo faigaluega i le isi tagata Isaraelu. O le aano ma le taua o lea mea, ina ia toe fa’afai le tagata mativa i se tulaga lelei e mafai ai lava e le tagata lava ia ona ola lava ia i ona lima. O se galuega lelei lea ma le alofa. Aua e alofa le Atua i ona tagata uma. Ma e finagalo foi le Atua e ola sa’oloto ona tagata. Se Atua ina alofa, lo tatou Atua. E le finagalo le Atua e fano i tatou, pe ola fa’aloloina. Ae finagalo le Atua ia tatou ola sa’oloto ma aai i fua o tatou lava galuega.

Tatalo: Fa’afetai tele le Atua e, i lou alofa fa’amaoni mo i matou. **Amene!**

Aso Lua – Setema 22: “Pa’u atu i le nofo aitalafu”

Tusi Faitau – 2 Tupu 4:1-7 (*Falling into debt*)

Matua – ff. 1-2 : *“Ua valaau ia Elisaia le ava a le tasi so’o o le au perofeta, ua fa’apea mai, Ua oti lau auaua o la’u tane, ua e silafia fo’i sa mata’u lau auaua i le Ali’i, a ua sau le ua matou aitalafu i ai, o le a na ave i a’u tama tane e to’alua e fai mona pologa. Ona fai atu lea o Elisaia ia te ia, Se a ea se mea ou te faia ia te oe? Ina ta’u mai ia te a’u, pe se a se mea o ia te oe i le fale?”*

Ua mafatia lava se tasi tina, o le ava a le tasi o le au perofeta a Elisaia, ona o le a ave fa’amalosia lana fanau tama e to’alua, e le tagata na aitalafu i ai lenei tina. A uma loa ona totogi lana aitalafu, ona toe fa’afoi atu lea o lana fanau. Aua o le tulafono lea o lo’o tusia i le tusi o Levitiko 25:39. Ua saili fesoasoani lenei tina i le auaua a le Atua, o Elisaia. Ona fa’apea atu lea o Elisaia, “Se a se mea ou te faia mo oe? E i ai se mea e ono fa’atau o i lou fale?” Ona tali atu lea o le tina, “Ua na o le tamai fagu suau’u o lo’o totoe.” Ona fa’apea atu lea o Elisaia, “Ina alu ia e ao mai uma ni upu o iai, ona e liligi ai lea o lau fagu suau’u se’i tutumu. Ona e alu lea e fa’atau uma ipu sua’uu na, ma totogi ai lau aitalafu.” O se vavega ofoofogia lea na faia e le Atua mo sia tina. Aua ua tutumu uma ipu na utuina i lenei tamai fagu suau’u e tasi. O se a’oa’oga taua fo’i lea mo i tatou. E le tu’ulafoaina lava e tatou e le Atua. O i tatou uma o e alolofa ia te ia. E pei o lenei tina mativa, ia tatou mua’i saili i le auaua a le Atua mo se fesoasoani. Ona fa’asino mai lea e le auaua a le Atua le auala e mafai ona fa’afo’ia ai o tatou fa’afitauli. Ua na o le Atua lava e to’atasi matou te mapu ai.

Tatalo: Fa’afetai tele le Atua e, i au vavega. **Amene!**

Aso Lulu – Setema 23: “Tulafono mo le aiga”

Tusi Faitau – Esoto 21: 2-11 (*Rules for the family*)

Matua – f.2: *“Pe a e fa’atau se auaua Eperu, e auaua o ia ia te oe i tausaga e ono; a o le fitu o tausaga, e te fa’asaoloto fua ia te ia.”*

E mata’utia fo’i le alofa o le Atua i ona tagata. Ua ia faia ai lenei tulafono. Afai e fa’atau se auaua Eperu, e auaua atu o ia i tausaga e ono, a e fa’asa’olotoina o ia pe a o’o i le tausaga fitu. O le finagalo lena o le Atua, ina ia aua ne’i fa’apologina pea ona tagata. A ia ola sa’oloto. Aua, e i ai le taimi e matitiva ai, ma leaga ai fua o fa’atoaga, pe’a o’o mai mala fa’alenatura, e mafua ai ona fa’atau atu le tagata Eperu e fai ma auaua a le isi tagata, e totogi ai lana aitalafu. Tusa foi pe le uma ona totogi lana aitalafu, a o’o loa i le tausaga fitu, ona fa’asa’olotoina ai loa lea o ia. O le mata’utia lena o le Atua. E alofa le Atua i ona tagata. O i tatou uma o auaua a le Atua. A ua mua’i alofa mai le Atua ia i tatou e ala i lona Alo Pele o Iesu Keriso. Na te fa’asa’olotoina i tatou, ai lo tatou nonofo fa’apologaina i a tatou agasala. Ua fa’amamaina ai i tatou i le mana o lona toto, na liligi mai i luga o le satauro, ina ia leai lava se tasi e fano, a ia maua e i tatou uma, o e fa’atuatua atu ia te ia, le ola e fa’avavau.

Tatalo: Fa’afetai tele le Atua e i lou alofa fa’aola ia i matou. **Amene!**

Aso Tofi – Setema 24: “O aia tatau o pologa”

Tusi Faitau – Esoto 21: 20-27 (*Rights of slaves*)

Matua – ff. 23-25 : *“A e afai e tigaina ai le fafine, ia e sui atu le oti i le oti; o le mata e sui a’i le mata; o le nifo e sui a’i le nifo; o le lima e sui a’i le lima; o le vae e sui a’i le vae; o le mu e sui a’i le mu; o le manu’a e sui a’i le manu’a; o le ta e sui a’i le ta.”*

O aia tatau a pologa o lo’o tusia i le “Tusi o le Feagaiga” na tusia e Mose i luga o le mauga o Sinai, ina ua uma na auina mai Tulafono e Sefulu. Mo le ta’ita’ina o le fanauga a Isaraelu. Ina ia alolofa atu matai i a latou pologa. Aua na faia tagata uma lava e le Atua, e o’o lava i pologa. O lea ua tu’u ina atu ai tulafono e puipuia ai le va nonofo ai o le pologa ma lona matai. Ina ia aua ne’i sauaina fa’alemigao e lona matai lana pologa.

A ia fa'aeteete o ia, nei o'o atu lona lima i lana auaua ma oti ai, pe ivi foi le mata, pe gau ai fo'i lona nifo. O le mea ua fa'apea atu ai le tulafono, ia sui le mata i le mata, sui le oti i le oti, nifo i le nifo, lima i le lima, vae i le vae, mu i le mu, manu'a i le manu'a, ta i le ta. O lona uiga, ia tutusa le sala ma le agasala. Aua nei sili atu le fa'asalaga nai lo le agasala. Ma e fa'aeteete foi le matai nei ivi le mata pe gau le nifo o lana auaua, nei alu ese lana auaua ma ia, ae le i uma ona totogina lana aitalafu. E fa'apena foi ona fa'aeteete le matai ne'i o'o lona lima i le pologa ona oti lea o ia, pe oti fo'i lana pepe o lo'o tauave i lona manava, aua e fa'asalaina ai o ia. O le mata'utia lena o le Atua. E alofa le Atua i tagata uma lava. E o'o lava i pagota, e alofa i ai le Atua.

Tatalo: Fa'afetai tele le Atua e, mo lenei a'oa'oga. **Amene!**

Aso Faraile – Setema 25: “Fa’aaliga o le agalelei”

Tusi Faitau – Teuteronomi 15:12-18 (*Showing generosity*)

Matua – ff. 12-14: *“Afai e fa'atauina mai ia te oe lou uso, o se Eperu o le tane, po o se Eperu o le fafine, a auaua o ia ia te oe i tausaga e ono; a o'o i lona fitu o tausaga e te tu'u fa'asaolotoina atu o ia e oe. Pe a e tu'u fa'asa'olotoina atu o ia e oe, aua e te tu'uina atu o ia ma le leai o sana mea; a ia e matua foaina atu ia te ia ni au mamoe, ma ni mea mai le mea e soli ai lau saito, ma lau tu'ugauaina; o mea ua fa'amanuia ai oe e le Alii lou Atua e te foaina atu ai ia te ia.”*

Ua faia e le Atua se tulafono e fa'ali atu ai le agalelei o le matai i lana auaua na ia fa'atauina. A o'o loa i le tausaga fitu, ona fa'asa'olotoina loa lea o le pologa po'o lana auaua. A ia aua ne'i alu na o ona lima, a ia matua i foa'i atu ia te ia ni mea totino, ni mamoe, saito, uaina, po'o a lava mea ua fa'amanuia mai ai le Atua, ia avatu mo le auaua po'o le pologa. Ina ia aua ne'i toe o'o o ia i le fa'apologaina ma le mativa. A 'o mea ua foa'i, e toe amataina ai lona aiga, ina ia sologa lelei mea uma ma toe atia'e lona aiga i se amataga fou. Aua e iai le taimi e le tagolima ai le tagata, ona mana'omia lea e ia o se fesoasoani. Fai mai le Atua, ia e manatua le taimi na e nofo pologa ai i Aikupito. Afai tou te manatua, ia aua ne'i toe o'o i ai se tasi o i latou i lena olaga. A ia fesoasoani le tasi i le tasi i taimi e le tagolima ai. E mafai fo'i e le auaua ona nofo tumau i le fale o lona matai pe a le fia alu ese i le tausaga fitu, a ia tutu'i lona taliga i le faitoto'a. O le fa'ailoga lena o lona fia nofo pea i le fale o lona matai. E ese fo'i faiga a le Atua, e finagalo le Atua ia ola sa'oloto ona tagata. O lea, ia manatua pea e i tatou le taimi na tatou fia maua ai fo'i se fesoasoani, ona tatou fesoasoani lea ma agalelei atu i isi tagata. Ia viia pea le Atua o le na aumaia le loto ma le fiafia tatou te agalelei atu ai pea i e ua fia maua se fesoasoani.

Tatalo: Fa'afetai tele Le Atua e, i lou a'oa'o mai pea. **Amene!**

Aso Toona'i – Setema 26: “O se faufautua fa'atuatuaina”

Tusi Faitau – 1 Samuelu 9:5-10 (*A trusted advisor*)

Matua – f. 6e: *“Fa'auta mai ea, o lo'o i le aai nei le tagata o le Atua, o le tagata e ta'uleleia, e matua taunu'u lava ana upu uma; ina ta o ia i ai, atonu na te ta'u mai ia te i ta'ua so ta ala ta te ui atu ai.”*

Ua auala atu i le auaua a Saulo, e le o ta'ua lona suafa, le finagalo o le Atua, e fai o ia ma tupu. O le auaua a Saulo o se faufautua fa'atuatuaina. Na fa'aaogaina e le Atua e ta'ita'ina atu ai Saulo ia Samuelu, ina ia fai o ia ma tupu o Isaraelu. O lenei tala o lo'o fa'ailoa mai ai, o lo'o galue pea le agaga o le Atua. Ua avea le leiloloa o asini a le tama o Saulo, ma avanoa e auala atu ai le fesoasoani a lana auaua na la o e su'e i asini ua leiloloa. Sa popole le loto o Saulo, e le gata i le popole mai o lona tama ia i la'ua, ae o le popole foi o lona loto i asini ua leiloloa po'o fea le mea o le a su'e agai i ai. Ae fa'auta i le alofa o le Atua, ua ia fa'aaogaina ai le auaua fa'atauva'a a Saulo, e avatu ai se

fautuaga e fa'amalosi ai Saulo. Muamua, ua fai atu le auauna ia Saulo, ia la saili muamua i le tagata o le Atua, la te fesili i ai, aua e taunu'u upu uma lava e tautala i ai. Lua, O lo'o ia te ia le kuata sekeli ario e ave ma le tagata o le Atua. Ina ua popole le loto o Saulo i le leai o mea e ave ma le tagata o le Atua. O lo'o fa'amatala mai e lenei tala, o lo'o galue pea le Agaga o le Atua mo i tatou. Po'o le a lava le faigata o le fa'afitauli o lo'o feagai ma i tatou. E fai lava e le Atua le auala e fa'ataunu'uina ai lona finagalo, e pei ona faia i le fa'au'uina o Saulo e fai ma tupu. A ua avea ai lana auauna ma mea faigaluega a le Atua, na te taitaina atu ai Saulo ia Samuelu mo lona fa'au'uina.

Tatalo: Fa'afetai tele le Atua e, e te le tu'ulafoaina lava i matou. **Amene!**

MAUA MAI LE ATUA: NOFO POLOGA (2) – (STOLEN FROM GOD: SLAVERY(2))

Aso Sā – Setema 27: “O se pologa po o se uso peleina?”

Tusi Faitau – Filemoni 1:8-18 (*A slave or a beloved brother?*)

Matua – ff. 15,16 : *“Aua atonu o le mea lea na te'a ese ai o ia i sina itu aso, ina ia e toe maua o ia e fa'avavau; e le toe fa'apei o se pologa, a e sili i le pologa, o le uso pele ia te a'u lava; e le sili ea ona fa'apea ia te oe ?”*

O se li'utau lea a Paulo mo lona uso fa'aleagaga o Filemoni, ina ia sili atu ia te ia le alofa, nai lo lona fia tau ma sui atu ia Onesemo, o lana pologa na sola ese, ae le'i uma le totogiina o lana aitalafu. Ua talosaga atu ai Paulo ma lona loto maualo, ina ia toe alofagia Onesemo, lana auauna o le a toe fo'i atu ia te ia. Aua ua fai Onesemo ma uso ia Keriso, ina ua la feiloai ma liua o ia i le fale puipui, sa falepuipui ai o ia. O le mea lea ua tatalo atu ai Paulo ia Filemoni, ia fa'amagalo ia Onesemo. O le a lava ni sese sa ia Onesemo i le tuana'i, ia fa'amagalo atu, ma toe tu'u atu ia Onesemo se avanoa, e fai ma ona uso. Aua ua le toe ta'uina Onesemo o se pologa, ina ua avea o ia ma uso ia Keriso. Ma ua talosaga atu fo'i Paulo, ia ta'u atu ia te ia se aitalafu, po'o se mea ua leiloa, po ua gaoia e Onesemo i le tuana'i, faitalia lava ia ma toe totogi atu. E le'i manatu Paulo o ia o le Aposetolo e sili atu lona tulaga ia Filemoni na te ta'u atu i ai le mea e fai ona ia fai lea. Ae na ui atu Paulo i se auala maualo, ina ia talia e Filemoni lana talosaga, i lona loto malie. Aua o le tulafono fa'a Roma, e fa'asalaina le pologa e sola ese ma lona matai ae le'i uma ona totogiina lana aitalafu. O se a'oa'oga fo'i lea mo i tatou. O le Atua o le Atua fa'amagalo. O le tele ia o a tatou aitalafu i le Atua. Po'o le a lava lo tatou sese, ma lo tatou leaga, e alofa lava le Atua ia i tatou, ma fa'amagalo mai i tatou. A ia tatou iloa ona tatou salamo i a tatou agasala. Ma augani i le Atua, e fa'amagalo mai o tatou sese, e ala i le maluu ma le toetu manumalo o lo tatou Ali'i Fa'aola, o Iesu Keriso.

Tatalo: Fa'afetai tele le Atua mo le fa'amagaloga o a matou agasala. **Amene!**

Aso Gafua – Setema 28: “O se valaau ia tulaga tutusa ma tino e tasi”

Tusi Faitau – 1 Koronito 12:12-14 (*A call to radical equality and unity*)

Matua – ff. 12-13: *“Aua pei o le tino ua tasi ia, ma ona itu tino e tele, a o itu tino uma, e ui ina tele, o le tino e tasi lava ia e fa'apea lava Keriso. Aua fo'i o le Agaga e to'atasi na papatisoina ai i tatou uma i le tino e tasi, po o lutaia, po o Eleni, po o pologa, po o sa'oloto...”*

Ua tusi atu Paulo i le ekalesia i Koronito ia taumafai i latou e galulue fa'atasi, aua e tulaga tutusa i latou ma o i latou foi o le tino e tasi. Aua na papatisoina i latou i le Agaga Paia o le Atua. O le Agaga lava lena o le Atua ua tasi ai i latou ma fusia ai i latou i le tino e tasi. Pe lutaia pe Eleni pe pologa pe sa'oloto, e tutusa uma lava i latou i le silafaga a le Atua, aua ua tasi i latou i le Agaga o le Atua. O a lava mealofa fa'aleagaga ua latou maua, ia latou fa'aogaina mo le atinaeina o le galuega a le Atua. Ae aua ne'i

o latou fetaua'i po'o ai e sili atu le lelei o lana mealofa fa'aleagaga na aumai i le Atua, aua e tutusa uma mealofa fa'aleagaga na aumai i le Atua. E le sili atu le tautala i gagana eseese nai lo le agaalofo, e tutusa uma lava. A e aua ne'i fa'aseseina i latou i o latou talitonuga fa'apaupau sa latou faia ae le'i avea i latou ma Kerisiano. Aua o a latou tapuaiga fa'apaupau sa latou tautala ai i gagana eseese a'o latou tapuai atu ia a latou atua ese, e pei o Paala. O le fa'amalosia atu lea a Paulo i le ekalesia i Koronito ina ia latou galulue fa'atasi.

Tatalo: Fa'afetai tele Iesu i lou fa'amanatu mai. **Amene!**

Aso Lua – Setema 29: “Avea ma atali'i matua o le Atua”

Tusi Faitau – Kalatia 3:27-4:7 (*Becoming an adult child of God*)

Matua – ff. 6e, 7: “...o le mea lea ua auina mai ai e le Atua le Agaga o lona Alo i o tatou loto, o valaau, Ava le Tama e. O lea, ua le toe fai oe ma pologa, a o le atali'i; a e afai o le atali'i, o le suli fo'i, ona o le Atua.”

Fai mai Paulo, ua avea i tatou ma atali'i matua o le Atua, ina ua papatisoina i tatou ia Keriso. Ua oofu ai fo'i i tatou ia Keriso. Ua tasi ai i tatou uma ia Keriso. Ua le toe feeseesea'i ai i tatou, e le ese le Iutaia ma le Eleni, e le ese fo'i le pologa ma le sa'oloto, e ese fo'i le tane ma le fafine, a ua tasi i tatou uma ia Keriso Iesu. Ina ua i ai le Agaga o Keriso i totonu ia i tatou, ua avea ai i tatou ma atali'i ma afafine o le Atua. O lona uiga, afai o i tatou o atali'i ma afafine o le Atua, o i tatou fo'i o suli, e maua uma foi e i tatou fa'amanuiaa uma o le ulumatua. Ma maua uma ai foi e i tatou fa'amanuiaa a le Atua na tuu atu ia Aperaamo ma lana fanau aua ua avea fo'i i tatou ma fanau a Aperaamo. I le isi vaaiga, o e o lo'o ola i lalo o le tulafono, o tama iti i latou. A o e o lo'o ola ia Keriso, ua avea i latou ma atali'i matua o le Atua. O le mea lea ia aua ai ne'i fa'aseseina i latou i a'oa'oga sese a tagata Iutaia o lo'o fai mai, e tatau ona peritomeina tagata o nu'u ese i le tino, ona avea ai lea o i latou ma Kerisiano pe maua ai foi e i latou le fa'aolataga. Ia finau atu ai Paulo, e le o galuega a'o le fa'atuatua ia Iesu e fa'aolaina ai i latou.

Tatalo: Fa'afetai tele Iesu, i le fa'amalalamaina mai o lau fa'aolataga. **Amene!**

Aso Lulu – Setema 30: “O le a se a'oa'oga tatou te maua mai i le nofo pologa?”

Tusi Faitau – Efeso 6:5-9 (*What can we learn from slavery?*)

Matua – ff. 7-8: “ma le fiasia, o lo'o auuina atu ai i le Ali'i, a e le o tagata, o iloa e outou o le na te faia se mea lelei, e toe maua lea e ia mai le Ali'i, pe se nofo pologa o ia, po o se sa'oloto.”

Ua apoapoa'i atu Paulo i pologa o lo'o i le ekalesia i Efeso, o se aai i le malo Roma, i le vaitau o le seneturi 1. Ina ia latou auuina atu i o latou matai ma le fiasia i le Ali'i. Aua a latou auuina atu i o latou matai e pei ona latou auuina atu i le Ali'i, ona latou fiasia lea e fai uma galuega lelei. E le fa'afoliga i latou pe fa'atalitali se'i toe fo'i mai le matai ona fa'ato'a galulue lea. A ua apoapoi atu foi Paulo i matai, ina ia latou tausia fa'alelei pologa, aua ne'i o latou sauaina i latou. O pologa i le vaitau o Roma e mafai ona latou faigaluega i galuega lelei e pei o le foma'i, faiaoga, po'o le fau fale. E mafai fo'i e le pologa ona avea ma sitiseni Roma. E mafai foi e pologa ona fa'atau lo latou sa'olotoga. E le tutusa pologa i le vaitau o Roma ma pologa i Amerika i le tausaga 1619, aua ua na o tagata uli lava na fa'apologaina i Amerika. A e o le mea pito i taua lava i le apoapoi atu o Paulo, e tutusa tagata uma i le silafaga a le Atua, tusa lava pe pologa pe matai. E i ai le taimi e fa'amasinoina ai i tatou uma e le Atua pe a oo mai lana fa'amasinoga.

Tatalo: Viia lava oe le Atua i mea uma lava. **Amene!**

Aso Tofi – Oketopa 1: “O se tagata sa’oloto ua fai mo le Ali’i ”

Tusi Faitau – 1 Korinito 7: 17-24 *(A Freed Person belonging to the Lord)*

Matua – f. 22: *“Auā o le ua valaauina e le Ali’i ina o fai ma pologa, o le sa’oloto ia a le Ali’i; e faapea fo’i le ua val’auina ina o sa’oloto o le pologa ia o Keriso .”*

Ua fa’ailoa e Paulo e faapea, o lē sa vala’auina a o pologa, ua avea nei ma tagata sa’oloto a le Ali’i, ae o lē sa vala’auina a o sa’oloto, ua avea ma auauna a Keriso. O lona uiga, e lē toe fa’auigaina le tagata e tusa ai ma lona tulaga fa’aletino po o lona tulaga i le sosaiete, ae e tusa ai ma lona so’otaga ma Keriso. O le autu “O se tagata sa’oloto ua fai mo le Ali’i” e fa’amanatu mai ai e faapea, o le sa’olotoga moni e lē o le faia o mea e finagalo i ai le tagata lava ia, ae o le tuuina atu lea o le ola atoa e tautua ai le Ali’i. O lē ua sa’oloto i totonu o Keriso, ua le toe nofo pologa i le agasala po o mana’oga fa’aletino. Ae ua filifili e fai ma auauna ma le loto fiafia, ona o le alofa ma le fa’amaoni i le Ali’i. E fa’amalosia ai le tagata talitonu e fa’aogā lona sa’olotoga e auauna ai i isi, e fausia ai le filemu, ma e faailoa ai le alofa tunoa o le Atua i le lalolagi. O le autu o lenei aso, e avea ma molimau ola e fa’ailoa ai e sili atu le tāua o le fa’amaoni ia Keriso nai lo so’o se tulaga po o se tofi i le lalolagi.

Tatalo: Le Atua matou tatalo mo i latou o nofo pologa ma sauāina, ina ia fa’ailoa ai lou sa’olotoga mo i latou. **Amene!**

Aso Faraile – Oketopa 2: “Aua ne’i va’ai maualalo se tasi ia te oe ”

Tusi Faitau – Tito 2: 9-15 *(Let no one look down on You)*

Matua – ff. 9, 10 : *“Apoapoa’i atu i pologa ia usiusita’i i latou i o latou lava matai, ia latou taumafai ona faafiafia i ai i mea uma lava, aua ne’i faatau upu i ai. Aua ne’i latou gaoi, a ia faaalua e i latou ua faamaoni aiai, ina ia viia ai i mea uma lava ona o i latou le a’oa’oga a le Atua lo tatou Faaola.”*

O mafaufauga a le Aposetolo o Paulo e fa’amanatu mai ai, e oo lava i ē e manatu le lalolagi e maualalo lo latou tulaga, e mafai ona avea i latou ma avefe’au malosi o le tala lelei. Sa manatu Paulo e sili atu le tāua o le molimau lelei o le ekalesia i luma o tagata nai lo le finau fa’asolitulafono, ina ia aua ne’i tu’ua’ia le talalelei, ae ia tosina mai ai isi i le fa’atuatua. Pe a galue se tagata ma le usiusita’i, le onosa’i, ma le fa’amaoni, e lē gata e fa’aaloaloga ai e tagata, ae ua avea fo’i o ia ma fa’ata’ita’iga e fa’aalia ai le matagofie o a’oa’oga a le Atua. Auā e lē fa’alagolago le tāua o le tagata i le galuega po o le tulaga. Afai e atagia Keriso i lo tatou ola, e mafai ona suia ai le silasila mai a isi tagata. O le a avea ma ala e fa’atuatua ai ai le manatu maualalo i se tasi o lo’o savavali ma le fa’amaoni i luma o le Ali’i. O le finagalo o Paulo e fa’amanatu mai ai e leai se tasi e lē aogā. E masani ona filifilia e le Atua i latou e manatu fa’atauvaa i ai le lalolagi ina ia fa’aalia ai lona mamalu, auā o le malosi moni e lē sau mai le tagata, ae mai le Atua lava ia.

Tatalo: Fesoasoani le agaga o lau Afio ina ia puipua ai i matou mai le loto ita ma le faailoga tagata. **Amene!**

Aso Toona’i – Oketopa 3: “Te’ena le tala lelei silisili ”

Tusi Faitau – 1 Timoteo 1: 8-11 *(Opposing the glorious gospel)*

Matua – ff. 9-11: *“O lo’o iloa lenei mea, ua le fa’atuina mai le tulafono mo le ua amiotonu, ao e fa’aletaupulea ma e soli i tulafono, o e fa’alemata’u ma e agasala, o e amio leaga ma e ulavavale, o e fasioti tamā ma e fasioti tinā, o e fasioti tagata; o e faitaaga, o e fa’asotoma, o e gaoi tagata, o e tala pepelo, oe tauto pepelo, ma isi lava mea e fa’atu’iese ai i le mataupu e ola ai; e tusa ma le tala lelei silisili a le Atua manuia, ua tu’uina mai ia te a’u.”*

O le Tusi 1 Timoteo na tusia e le Aposetolo Paulo e fautuaina ai Timoteo i lona tiute e tausia ma puipui le ekalesia i Efeso mai a'oa'oga sesē. I lea a'ai, sa i ai nisi o loo fa'aaogā sesē le tulafono (le Tulafono a Mose), ma latou a'oa'oina mea e lē o faatasi ma le tala lelei a Keriso. I le fuaiupu e 9 e o'o i le 11, ua fa'amatala manino ai e Paulo, e lē faia le tulafono mo ē amiotonu, ae mo ē solitulafono ma ē fouvale, ma ua ia aumaia ai agasala ogaoga e fete'ena'i ma le finagalo o le Atua. Ona ia fa'ai'u ai lea i le faapea mai, o nei mea uma e "fete'ena'i ma le tala lelei silisili o le Atua manuia," o lona uiga, e lē gata o ni solitulafono, ae o ni amioga e te'ena ma fa'alumaina ai le tala lelei ua aumaia e Keriso. O le tala lelei moni e aumaia le suiga i le loto ma le olaga atoa o le tagata. Afai e lē suia amioga, ua faailoa ai e lē o malamalama pe talia moni le tala lelei. Ua vala'auina Timoteo e lē gata ia a'oa'o le upu moni, ae ia tete'e fo'i i mea uma e fa'alavelave ai i le fe'au faaola. O le puipuiga o le tala lelei silisili, o le puipuiga fo'i lea o le ola fa'aleagaga o le ekalesia.

Tatalo: Le Ali'i e, galueaina o matou loto ina ia mafai ona matou talia lau tala lelei e fai ma ta'iala i lo matou ola. **Amene!**

O LE EVAGELIA A MATAIO (5) – THE GOSPEL OF MATTHEW (5)

Malamalama'aga (Insights)

Aso Sā – Oketopa 4: "E leai se tuaoi o le Agalelei" (Generosity has no bounds)

Tusi Faitau – Mataio 20: 1-16

Matua – f. 14: *"Ina tago ia i lau mea, ma alu; o la'u pule lea e avatu lava i lenei na mulimuli e pei o a oe lava."*

O le fa'ataoto o tagata faigaluega i le tovine, e mafai ona malamalama i ai mai le itu o le valaauina ma le fa'ataua o le avanoa nai lo le tau. O loo fa'aalia ai e lē ana le tovine, le ta'ua o le saili ma valaau i tagata i taimi uma o le aso. E o'o lava i ē ua tuai ona taunu'u mai. E fa'amautinoa ai ua faamaoni o ia i lana folafolaga, ma ua fa'aalia ai lona loto agalelei e talia ma fa'ataua'ina tagata uma i se tulaga tutusa, e lē fua i le umi o le galuega po o le tala'aga. O le agalelei o le Atua e lē taofia pe fa'atapula'a e le tagata. Ae e taula'i i le fa'alauteleina o le avanoa, ma le faailoa atu e tutusa tagata uma i le silasila a le Atua. O lenei fe'au e valaau ai le ekalesia ma le nuu ia ola i le agaga lava lea e tasi, e lē tapunia faitoto'a, e lē fa'avasegaina le alofa, ae ia fa'aalia le agalelei e pei o le Atua, e tatala ma e aunoa ma ni tuaoi. O lona malo e fausia i le alofa tunoa, ae lē o le tau o galuega, ma o i latou uma e tali atu i le vala'au, e maua le avanoa e auai ai i lona malo.

Tatalo: Ia tatala o matou loto le Atua i lou agalelei fa'asoa mai, ina ia liligi mai au fa'amanuiaga mo i matou. **Amene!**

Aso Gafua – Oketopa 5: "O ala o le Atua o le auauna atu" (God's way is to serve)

Tusi Faitau – Mataio 20: 17-34

Matua – f. 28: *"E pei o le atali'i o le tagata e lei sau ia ina ia auauna mai tagata ia te ia, a ia auauna atu ia, ma foaiina atu lona ola e fai ma togiola e sui a'i tagata e to'atele."*

O a'oa'oga a Iesu, o loo atagia ai le uiga moni o le ta'ita'iga i le Malo o le Atua, ina ua finau so'o i le sailia o tulaga maualuluga ma le mamalu. I le malo o Roma, sa manatu o le pule ma le mamalu e fa'avae i le malosi ma le to'atele o auauna. Peita'i, na liliu e Iesu lenei manatu, na Ia fetalai ai, e lē ala ia o le Atua. E le'i afio mai le Atalii o le tagata e saili se tautua mai i tagata, ae na afio mai e tautua, ma fa'aalia lea tautua i le tu'uina atu ato'atoa o lona ola e fai ma togiola mo le lalolagi. O lona uiga, o le ala o le Atua e le o le sailia o le pule ma le viiga, ae o le loto maualalo, le tautua,

ma le taulaga mo le manuia o ona tagata. O le fa'aeaea i luma o le Atua e maua i le tautua, ae lē o le faatonu ma le pulea. O le mana o le Atua e galue e ala i le alofa, ae lē o le faato'ilaloina. I lo tatou olaga faa-ekalesia ma le aganu'u faa-Samoa, e taūa tele le tautua, ua toe fa'amanatu mai e Iesu e tatau ona sau mai le loto faamaoni, ae lē o le sailia ai o le tulaga po o le viiga. O le mulimuli ia Keriso e lē gata i le talitonu ma savavali i ona ala, aemaise le auaua atu ma le loto fa'amaoni.

Tatalo: Le Atua e, a'oa'o mai ina ia matou iloa ona ola i ou ala. **Amene!**

Aso Lua – Oketopa 6: “Upu Lu'itau ” (Challenging Words)

Tusi Faitau – Mataio 21: 17-22

Matua – f. 22: *“O mea uma fo'i tou te ole mai ai i le tatalo ua i ai le faatuatua, e maua lava e outou.”*

O le vaitaimi tāua o le galuega a Iesu i Ierusalem, i aso ua latalata i ona puapuaga, ina ua ia faailoa ai lana pule ma lona vala'auina fa'aleagaga i luma o le nuu ma ona soo. O le a'oa'oga leni e le'i afua mai i se tulaga filemu, ae i se si'osi'omaga o lu'itau ma fa'amasinoga, ma o le mea lea ua avea ai ana upu ma lu'itau mo le au soo. Ua fa'amamafa e Iesu e faapea, o le tatalo e lē o se faiga e fa'atonutonu ai le Atua, ae o se fa'ailoga o le fa'atuatua ua gaua'i i le Atua ma lona finagalo. O le fa'atuatua e tu i le ogatotonu o lu'itau, e fai ma fa'amalosi 'au, ina ia fa'aaauu pea ona tatou tatalo ma talitonu i le Atua e tusa lava po o ā faigata o loo tatou feagai ai. A o'o ina loloto tofotofoga o le olaga nei, tatou te tua lava i talosaga, e fai pea ma ala e fa'amalosia ai le loto, fa'afou ai manatu ma lagona, aemaise le ola taula'i i le Atua o lē e pule aoao. Pe a tatou tumau i le tatalo ma le fa'atuatua, o le a suia ai o tatou loto, ina ia atagia ai le finagalo o le Atua i o tatou ola.

Tatalo: Le Alii e, ia e fa'amalosia lo matou fa'atuatua e tali ai i faigata o le ola nei. **Amene!**

Aso Lulu – Oketopa 7: “O Atali'i ma le Atali'i ” (Sons and the Son)

Tusi Faitau – Mataio 21: 28-46

Matua – f. 42: *“Ua fetalai atu Iesu ia te i latou, “Tou te le i faitaulia lava ea i Tusi, O le maa na lafoaina e tufuga fai fale, ua fai lea ma ma'a tulimanu aupitoaluga; o le mea lea na faia e le Ali'i, tatou te ofo ai pe a va'ava'ai atu i ai?”*

Ua suia e Iesu le va'ai a tagata mai le to'atele i le to'atasi. E to'atele atali'i sa i ai i le tovine. O ē ua tofia e galulue ma tausia le fa'atoaga vine. Ua galo ia i latou le fa'amoemoe autū o lo latou vala'auina. Ina ua auina atu le Atali'i e to'atasi, sa lē talia o ia, auā sa manatu atali'i o le tovine e mafai ona latou pulea le fa'atoaga i lo latou lava malosia. Peita'i, e le o ala ia o le Atua, lea ua fa'aalia lona finagalo, e lē fa'alagolago lana galuega i le to'atele po o le maualuga o tulaga, ae o le Atali'i ua Ia filifilia. O le ma'a na teena e atali'i, ua avea ma ma'a tulimanu aupitoaluga. O lē na te'ena e tagata, ua avea ma fa'avae fou e tapena ai le ola galue ma le soifua auaua. O le talia o le Atali'i, o lona uiga o le tu'u atu lea o lo tatou malosia e galulue, ma tautua le finagalo o le Atua, ina ia fua mai ai le amiotonu ma le manuia e lē mo i tatou lava, ae mo lona malo.

Tatalo: Ia e a'oa'oina i matou e galulue ma auaua ma le loto maualalo, ina ia atagia lau amiotonu i o matou loto. **Amene!**

Aso Tofi – Oketopa 8: “Faamolemole talia le vala'aulia i le talisuaga”

Tusi Faitau – Mataio 22: 1-14 (Please accept the invitation to the feast)

Matua – ff. 9, 10 : *“O leni, ia outou o atu i ala tele, o i latou uma tou te iloa ai, tou te tala'i i ai le tausama'aga. Ona o atu ai lea o ia auaua i ala, ua latou faapotopoto uma*

e na latou iloa, o e leaga atoa ma e lelei; ona tumu ai lea o le mea na fai ai le tausama'aga i e na tao'oto e aai ai."

O le alofa tunoa o le Atua ua manino ma lautele ai le feau o le talalelei mo i tatou uma. O le fa'ataoto i le talisuaga na tu'uina mai i se vaitaimi a'o tetele finauga ma le tete'e atu o ta'ita'i lotu i le galuega a Iesu. E o le vala'au i le tulaga o le tagata, lona talaaga, po o lana amio i le vaai a tagata, ae ua taula'i i le talia o le vala'au mai le lotu. E lē na ona faalogo i ai, ae o se valaaulia e talia ma ulufale. O le talisuaga e fa'ailoa ai le amataga o se mafutaga ma le Atua, o le fiafia moni, ma le ola fa'atasi i lona malo. O le fe'au lenei mo le ekalesia ma le nu'u i aso nei: ia aua ne'i toe faatuai pe te'ena le vala'aulia, ae ia talia ma le lotu faafetai, ma ia avea fo'i i tatou ma meafaigaluega e faalautele atu ai le valaau i isi tagata, auā o le finagalo o le Atua ia fa'atumu lona fale i ē ua talia lana vala'au ma le lotu maualalo.

Tatalo: Ia e foa'i mai le lotu fa'afetai ma le lotu maualalo, ina ia matou talia ai ma le fa'amaoni lau valaau. **Amene!**

Aso Faraille – Oketopa 9: "O fesili tau faasesē" (Trick Questions)

Tusi Faitau – Mataio 22: 15 - 33

Matua – ff. 22: *"Ua latou fa'alogoa ai, ona latou tau faiaifo ai lea; ua latou tu'ua ia, ae o ese."*

O le au Faresaio ma ē lagolago iā Herota na taumafai lava e mailei Iesu i se fesili e uiga i le totogiina o lafoga iā Kaisara. Afai e tali Iesu "ioe," e i ai le avanoa e le fiafia ai tagata Iutaia; afai e tali i le "leai," e mafai ona molia o ia i luma o tagata Roma. Peita'i na tali Iesu "Ia avatua iā Kaisara mea a Kaisara, ae ia avatua i le Atua mea a le Atua". Ua faailoa ai le sesē o latou lotu, ma ua iloa ai le matafaioi fa'apolokiki ma le tau fa'aleaga. O le tali lea na faate'ia ai i latou, ma iloa ai e lē mafai ona maileia le upu moni i fesili tau faasesē. O le avanoa e toe fetu'una'i ai le mafaufau o le tagata poo ai e fa'amuumua i a latou filifiliga ma faai'uga. Tusa pe tatou te fetai'a'i ma le tele o le tau faasesē i lenei lalolagi, o le Atua tatou te to'omaga i ai, e maua ai lo tatou fesoasoani sili. O le soifua tautua ma le soifua auaua i tiute ma faiva ua vala'auina ai i tatou, ia manatua pea i o tatou lotu, o le Atua lo tatou faasinomaga.

Tatalo: Ia fa'amalamalama mai lou Agaga Paia i o matou ala, ina ia atagia i a matou upu ma galuega lou finagalo alofa. **Amene!**

Aso Toona'i – Oketopa 10: "O le poloa'iga sili" (Greatest commandment)

Tusi Faitau – Mataio 22: 34 - 46

Matua – ff. 37e-39: *"E te alofa atu i le Alii lou Atua ma lou lotu atoa, ma lou agaga atoa, ma lou manatu atoa. O le poloaiga muamua lena ma le sili. E faapena foi lona lua, e te alofa atu i le lua te tuaoi, ia pei o oe lava ia te oe."*

Ina ua tula'i mai se feese'esea'iga i le va o Iesu ma ta'ita'i o le lotu Iutaia, lea na fesiligia ai o ia e uiga i le poloa'iga sili i le tulafono. I lea vaitaimi, pe silia ma le 600 poloa'iga (O le Tulafono a Mose) sa masani ona finau ai le au a'oa'o tulafono po o fea e sili ona tāua. Ina ua fesiligia Iesu po o le a le poloaiga sili, na aofa'i faatasi e le Ali'i le tulafono i poloaiga e lua: ia e alofa i le Atua, ma ia e alofa i lou tua'oi. Ua silafia lelei e Iesu e le fa'amaoni le fesili na tuuina mai, ae ua na o se tofotofoga e saili ai se māfua'aga e tu'ua'ia ai o ia. O lo tatou talia o poloa'iga e aunoa ma se fesili, o le fa'ailoga mautinoa lea o lo tatou lotu naunau e mafuta ma Iesu Keriso. O le soifuaga faa-kerisiano e pulea i le alofa o le Atua, ae le o le tulafono. Le alofa lea o loo tuli mata'i i poloaiga e lua e pei ona fetalai ai le Alii.

Tatalo: Ia avea lo matou talia o au afioga ma fa'ailoga o lo matou naunau e savavali fa'atasi ma Iesu. **Amene!**

O LE EVAGELIA A MATAIO (5) – THE GOSPEL OF MATTHEW (5)

O Lapata'iga (Warnings)

Aso Sa Lotu Tamaiti

Aso Sā – Oketopa 11: “Lapata’iga i le leaga o le fa’afiaamiotonu”

Tusi Faitau – Mataio 23: 1-22 (*Warnings of the danger of hypocrisy*)

Matua – ff. 3e-4 : *“ae aua tou te fa’aa’oa’o ia latou amio; auā ua latou fai atu, ae latou te le faia. Auā ua latou saisai avega mamafa ma le avegata, mā latou fae’e i ua o tagata; ae latou te le mafafai ina fa’agaoioi ai i so latou tamatama’i lima.”*

O tusitusiga a Mataio e faasino i le vaitaimi o Iesu, sa maualuga le tulaga o le au Faresaio ma le au Tusiupu i le sosaiete Iutaia. O i latou nei sa tausia ma a’oa’oina le Tulafono a Mose. Sa manatu le to’atele o i latou o ni faata’ita’iga lelei o le amiotonu i luma o le Atua. Peita’i o a latou fa’atinoga ua amata ona liliu ese mai le lotu fa’amaoni i le Atua, ae ua aga’i i le fa’afiaamiotonu i luma o tagata. O loo manino lapata’iga a Iesu, aua ne’i avea le amiotonu ma fa’aaliga i fafo, ae ia amata mai i le lotu. O le tulafono e tatau ona ta’ita’i atu ai le tagata i le Atua, ae lē o se avega mamafa e faigata ona tau’ave. A o tatou i ai i le fa’amanatuina o le Aso Sa Pa’epa’e o le fanau, o se feau fa’amanatu mo matua ma le ekalesia atoa, ia a’oa’o fanau ina ia malamalama i le tāua o le ola faamaoni i tiute ma faiva ua tofia ai i latou. Aua ne’i avea le Aso Sa Pa’epa’e e faataūa ai le va’aiga faa-le-tagata, ae ia avea ma a’oa’oga o le ola faamaoni i le Atua. Aemaise le tapenaina o le ola fa’atuatua o le tama ma le teine i lona ola tuputupu a’e.

Tatalo: Ia tupu ma ola lau talalelei i lotu o fanau a le ekalesia ina ia tumau pea le so’otaga ma lau Afio. **Amene!**

Aso Gafua – Oketopa 12: “E taūa a tatou faatinoga” (*What we do matters*)

Tusi Faitau – Mataio 23: 23-39

Matua – f. 27: *“Oi talofa ia te outou tusiupu ma faresaio, tagata fa’afiaamiotonu! Auā e tutusa outou ma tu’ugamau ua fa’asinasinaina, o loo matagofie i fafo, a o totonu ua tumu i ivi o tagata oti, ma mea leaga uma.”*

O fetalaiiga tu’u sa’o a le Ali’i o Iesu i ta’ita’i o le lotu Iutaia, le au Tusiupu ma le au Faresaio. Ua fa’atusa e Iesu i tu’ugamau na ona matagofie mai i le itu i fafo, a’o totonu ua na o mea pala o loo i ai. I le aganu’u Faa-Iutaia, a o latalata mai le Paseka, sa masani ona vali pa’epa’e tuugamau ina ia iloa e tagata ma ‘alo’ese mai ai. O le lapata’iga lea a Iesu, ia aua ne’i avea a tatou faatinoga e faamalie ai le vaaiga i le itu i fafo, ae ia avea ma molimau o le galuega a le Atua o loo galue i totonu o tatou lotu. E mafai ona tatou tautatala i upu e mālīe i le fa’alogo, e mafai fo’i ona tatou faia se galuega e malie ato’atoa ai le vaai, ae a aunoa ma le lotu mamā, e leai se aoga o ia fa’atinoga. O le faamaoni o le Atua e amata mai i totonu, o i inā e galue ai le Agaga o le Atua i le lotu o le tagata. A mamā le lotu, e oo mai lava le matagofie i fafo e aunoa ma se fa’afoliga.

Tatalo: Le Ali’i e, mafutaina i matou e lou agaga ina ia atagia lau Afio i a matou fa’atinoga uma. **Amene!**

Aso Lua – Oketopa 13: “Ia faataūa fa’aילוilo”

Tusi Faitau – Mataio 24: 1-28 (*Signs need to be taken seriously*)

Matua – f. 3e: *“Pe se a fo’i le faailoga o lou maliu mai, ma le gata’aga o le lalolagi?”*

O le fesili a le au so’o ia Iesu a o latou i ai i le Mauga o Olive. Ua fetalai Iesu i le faatafunaina o le Malumalu i Ieruselema, ma na matuā ofo ai lotu o le au soo. O le tali a Iesu e le i tu’uina mai se aso po o se taimi, ae na taumafai e tata’i atu le au so’o i faailoilo. Na ia ta’ua perofeta pepelo, taua, oge, ma mafui’e. E lē o ni tala e fa’atupu

ai le fefe, ae o ni fa'ailoga e fa'amalosia ai le au so'o ma ia mataala i le mea o le a tupu. O le upu "fa'ailo" e faasino i mea e iloa ma e ao ona maitauina. O ni faamanatu e toe fafagu ai le loto o lē ua talitonu. E tāua le a'oa'oina o le tagata talitonu ia ola mataala ma saunia. E pei ona mataala le nuu i faailo o le tau, e faapena foi ona mataala le ekalesia i faailo o taimi. O lē e faatāuaina faailoilo, e le fa'atali se'ia o'o le aso, ae nofo tapena mo aso uma. O faailoilo e fafagu ai le faatuatua, faamalosalia ai le salamo, ma toe fa'atonu ai le ola i le finagalo o le Atua.

Tatalo: A'oa'o mai ina ia mataala i taimi uma, ina ia faamalosalia ai lo matou faatuatua i lau Afio. **Amene!**

Aso Lulu – Oketopa 14: “E matagofie le toe to manatu”

Tusi Faitau – Mataio 24: 29-51 (*Hindsight is a wonderful thing!*)

Matua – f. 44: *“O le mea lea ia outou nofo sauni ai; auā o le itu aso tou te le manatunatu ai, e sau ai le atali'i o le tagata.”*

Ua tali Iesu i fesili a le au so'o e uiga i fa'ailoga o aso e gata ai, ma lona toe afio mai. Sa latou fia iloa po'o afea, a'o a foi ni fa'ailoga e iloa ai. O le fetalaiga a Iesu o loo tuli mata'i le sauniuniga o le loto. Sa ia fa'aaogāina ata e pei o le gaioi i le pō, o mea e tutupu fa'afuase'i pe a lē mataala le tagata. E pei ona aumai e le autu o lenei aso “E matagofie le toe to manatu” ua fai ma lu'itau e tapena ai le loto ma le mafaufau o le tagata kerisiano. E le na ona nofo fa'atalitali, ae ia tatou iloa ma malamalama le gasologa o le olaga. O mea o lo'o tutupu i le taimi nei ma ona a'afiaga, ma mea o le a tutupu i le lumanā'i. O mea na tutupu i le tuana'i e fai lea ma a'oa'oga i le mafaufau ma fa'alelei atili ai le ola tapena o le tagata. O le toe to manatu, o le mautinoa lea i le tagata e nofo sauniuni. E le fa'apopoleina pe a tula'i mai fa'afitauli i so'o se taimi.

Tatalo: Le Ali'i e, tapena ia matou iloa le tāua o le nofo sauniuni, **Amene!**

Aso Tofi – Oketopa 15: “Ia nofo sauniuni” (Be Prepared)

Tusi Faitau – Mataio 25: 1-13

Matua – f. 10: *“Ua latou e fa'ataua, ona sau ai lea o le fa'atoafaiavā; o e ua saunia fo'i ua latou ulufale fa'atasi atu ma ia i le tausama'aga, ona pupuni ai lea o le faitoto'a.”*

O a'oa'oga a Iesu e fa'ataua i le saunia ma le mataala mo le o'o mai o le malo o le Atua, aemaise i lana lauga i le Mauga o Olive. O le fa'ataoto i taupou e to'asefulu, lea e fa'avae i tu ma aga fa'aipoipoga a Iutaia i aso anamua. Sa faatalitali taupou ma a latou lamepa e fa'afeiloai le fa'ato'āfaiavā i le po ma aga'i atu i le tausamiga. O taupou popoto e to'alima ua latou ave suau'u e fa'aleoleo, ae peita'i o isi taupou e to'alima ua latou manatu māmā i lea tulaga. Ina ua taunu'u fa'afuase'i le fa'ato'āfaiavā, sa ulufale atu i le tausamiga i latou sa saunia, ae tapunia le faitoto'a ma tu'ua ai i fafo i latou e lē'i saunia. O lenei tala'aga e faailoa manino ai tu ma aga o le ola fa'atalitali. Afai e lē mautinoa le taimi, ma o le tiute o le tagata lava ia o le nofo sauni. E pei ona fa'aaoga e Iesu lenei vaaiga e a'oa'o ai ona so'o i le ola mata'ala ma le nofo sauniuni, o le matafaiioi tausi a le tagata kerisiano o le ola tapena mo aso uma auā tatou te le iloa mea e tutupu.

Tatalo: Le Ali, fa'afetai i au a'oa'oga e ala ia Iesu Keriso fa'amanatu mai ai iā i matou le tāua o le nofo sauni ma le ola mataala. **Amene!**

Aso Faraille – Oketopa 16: “E faatāuaina faatinoga i mea ua tatou maua”

Tusi Faitau – Mataio 25: 14-30 (*It's what we do with what we have that count*)

Matua – f. 29: *“Auā o se ua i ai ni mea, e foai'ina atu ia te ia e atili tele ai ana mea; a o le ua leai ni mea, e faoa le mea ua i ai.”*

O le fa'amaoni e tupu ai le manuia, a o le paiē ma le lē galue, e i'u ai i le to'ilalo. O i latou e faaaogā lelei taleni ma agava'a ua tuuina atu i ai, e fa'alauteleina lo latou

tomai; a o i latou e fa'atūtū gatā, latou te leiloa le taūa o ia avanoa. O le fa'ataoto e faavae i gasologa masani o le olaga i aso anamua, lea na tuuina atu ai e se matai ana mea i auuana, e tausia ma fa'aaogā ma le tataua, a o toesea o ia. O le toe fo'i mai o le matai e fa'atua i se iloiloa fa'a-le-Atua, ma o le fua e lē faavae i le tele o mea na maua, a o le galuega na fai i mea na tuuina atu. E ese'ese tomai, taleni ma agava'a o tagata, ae o mea uma ia o meaaloa a le Atua e tatau ona fa'aaogā. E fa'amanuiaina i latou e fa'amaoni ma fa'aaoga tatau le tamā-o-aiga ua tu'uina atu e le Atua. E le o le manuia mo le tagata lava ia, a o o le manuia mo le nu'u ma lona aiga. E tupu le manuia pe a tatou galulue ma le loto tele, ma ia tumau lo tatou fa'atuatua i le Atua.

Tatalo: Ia fa'amalosia o matou tagata e galulue ma le fa'amaoni, ia maua le loto tele e fa'aaogaina ai taleni ma agava'a ua e foa'ina ia i matou. **Amene!**

Aso Toona'i – Oketopa 17: “Ola faapei ona tatou Ta'utino”

Tusi Faitau – Mataio 25: 31-46 (*Being who we claim to be*)

Matua – f. 40e: *“E moni, ou te fai atu ia te outou, auā na faia e outou i le tasi o e aupito itiiti o o'u uso nei, o a'u lea na outou faia i ai.”*

O fetalaiaga a le Alii o Iesu a'o tali atu i mana'oga o ē vaivai, ma ē le amana'ia i le va'aiga a le to'atele. I le fa'aaogāina e Iesu o le ata o mamoe ma 'oti, e lē na o le fa'ailoa o le mafua'aga e vaevaeina ai, ae o le fa'ailoaina o ni vaaiga taūa e lua. O ē tali atu i mana'oga o i latou o loo mana'omia le fesoasoani, ma i latou e lē amana'ia le ola fesoasoani mo isi. O le ola fa'apei ona tatou ta'utino e fua i le va'ai. Pe a suia le va'ai, ona suia lea o le loto, ma mulimuli mai ai galuega e feagai ma le ola fa'atuatua o le tagata. O le ata lea ua faaaogā e Iesu e fa'ailoa ai, e lē vave ona iloa le moni o le fa'atuatua i upu po o foliga va'aia, ae e iloa i galuega ma fa'atinoga e faia i le loto mauualo ma le loto malie. O le ola fesoasoani e fua i le loto fuatia ifo, faapei o a'oa'oga a Iesu Keriso, tatou te lē toe fesili pe “o ai lenei tagata?” ae ao ina tatou fesili pe “o le ā se mea e mafai ona ou faia?

Tatalo: Ia avea o matou tagata e fai ma fa'ata'ita'iga lelei o le fa'atuatua e galue pea, ina ia viia ai lau Afio i mea uma matou te faia. **Amene!**

TO'ATŪGĀ MA TOE FUATA'IGA – SET BACKS AND COME BACKS

Mafuaaga o Faamoemoea (Reason for Hope)

Aso Sā – Oketopa 18: “O Puapuaga” (Suffering)

Tusi Faitau – Iopu 1: 13-22

Matua – f. 21e: *“Na foai'ina mai e le Ali'i, ua ave'eseina fo'i e le Ali'i; ia fa'amanuina le suafa o le Ali'i.”*

O Iopu o le tagata amiotonu toe mata'u i le Atua. Tele lona tamā-o-aiga, ae na o'o lava i ai puapuaga o le olaga nei. E le o se to'asa po'o se fa'asalaga mai le Atua, ae o le tu'uina o Iopu i le ogatotonu o puapuaga, o le tofotofoina lea o lona fa'atuatua, ma ia tumau pea lona ola talitonu i le Atua. O puapuaga na feagai ma Iopu na manino ai e lē o mea faaletino lona faamoemoe, ae o le Atua lava ia. O se fa'amanatu e a'oa'o mai pea ia i tatou, e lē mafai ona tatou fuaina galuega a le Atua i lo tatou malamalama faa-le-tagata. O puapuaga e mafai ona lūlūina ai lo tatou fa'atuatua, ae e mafai fo'i ona faamalosi ai pe a tatou tu'uina atu mea uma i le Ali'i e maua ai se fa'amāmā avega. E ui o se tofotofoga, ae o se avanoa e iloa atili ai le loloto o lo tatou so'otaga ma le Atua. A tatou onosa'i ma tumau i le fa'atuatua, e fa'ailoa mai e le Atua lona alofa i le taimi tatau, ma fa'amaonia ai e sili atu lona finagalo nai lo ō tatou manatu.

Tatalo: Fesoasoani lau Afio ina ia tumau lo matou fa'atuatua e pei o Iopu, e tusa lava pe tele faigata o le ola. **Amene!**

Aso Gafua – Oketopa 19: “Toe Fuata’iga” (Restoration)

Tusi Faitau – Iopu 42: 10-17

Matua – f. 11e: *“Ua latou fa’amafanafana fo’i ia te ia, ma fa’amatalaloto ia te ia ona o mala uma na fa’ao’o mai e le Ali’i ia te ia. Ua foa’i mai fo’i ia te ia e i latou ta’ito’atasi le tupe e tasi, ta’ito’atasi fo’i ma le mama auro e tasi.”*

O ala na saunia e le Ali’i e toe soso’o ai le mafutaga a Iopu ma ona uso, tuafafine, faapea ana uo. O puapuga na feagai ma Iopu e le faigofie, ua pei o se tagata ua tu’ulafoa’ina. O le “toe fuata’iga” i totonu o lenei tala, o fuafuaga ia a le Atua mo lana auauna o Iopu. E le gata ua toe maua le mafutaga ma aiga faapea ma uo, ae o le mea e sili ona tāua, o le toe lalaga lea o lona so’otaga ma le Atua. Ua manino ma malamalama Iopu, e le o le tamā-o-aiga ma oloa faa-le-tino e faamoemoe i ai, a’o le Atua lava ia. O taimi o le Atua, ua na o le Atua e malamalama ai. E le au i ai se malamalama o se tagata. Fa’ato’a malamalama lava le tagata ina ua tutupu fitā ma faigatā o le olaga. O le Atua o le Toe Fuata’iga, o lē e toe fausia loto ua nutimomoia ma fa’amautu mafutaga ua leai se faamoemoe.

Tatalo: Le Ali’i e, ia ta’ita’ina pea i matou uma i ala o lau Afio, ae aua lava ne’i o matou fa’amoemoe i le tomai ma le iloa ua matou maua. **Amene!**

Aso Lua – Oketopa 20: “Toe fa’af’o’isia le mamalu” (Dignity Restored)

Tusi Faitau – Ioane 8: 1-11

Matua – f. 11: *“Ua fai mai o ia, “Le Ali’i e, e leai lava se tasi.” Ona fetalai atu lea o Iesu ia te ia, “Ou te le fa’asala fo’i ia te oe; alu ia oe, ‘aua e te toe agasala.”*

O taimi a’o feagai Iesu ma a’oa’oga i le malumalu. Na aumaia ai e le au tusiupu ma le au faresaio se fafine na maua i le solitulafono o le mulilua. E le’i aumaia o ia e saili se fa’amasinoga tonu, ae o se togafiti ina ia mafai ona latou pu’eina Iesu. Ua silafia e Iesu loto o le au faresaio ma le au tusiupu, le naunau lea i le fia faalogo i se tali mai le Ali’i. E ono avefa ma mailei e molia ai o Ia i le tulafono. Peita’i, fetalai Iesu “O so outou e leai sana agasala, ia lua’i togi se ma’a ia te ia”. O le tali na toe fo’i ai se manatu o le au faresaio ma le au tusiupu. E le mafai ona tatou faamasino atu auā e tofu lava le tagata ma ona sesē. Ina ua fetalai Iesu *“Ou te le fa’asalaina foi oe.”* O le amataga lea o suiga o loo atagia ai le alofa tunoa, ae le o le fa’ama-sinoga. O le fa’amagaloga a Iesu e lē na o le soloia o le sala; ae o se ta’iala mo le tagata ua salamō ma gaua’i i le Atua.

Tatalo: A’oa’o mai i matou ia savavali i le ala o le fa’amagaloga, ma ia avefa i matou ma molimau o lou alofa i le lalolagi. **Amene!**

Aso Lulu – Oketopa 21: “Fa’afitia” (Denial)

Tusi Faitau – Luka 22: 54-62

Matua – f. 61: *“Ona fāliu lea o le Ali’i, ua silasila atu ia Peteru. Ona manatu mai ai lea o Peteru i le fetalaiga a le Alii, na ia fetalai mai ia te ia, “E le vivini moa seia e fa’afiti faatolu mai ia te au.”*

Ina ua mae’a le tausamiga o le paseka, ona latou pu’e lea o Iesu ma ta’ita’i atu i le fale o le ositaulaga sili, a’o Peteru o loo mulimuli mamao atu o ia. A’o nofo i tafatafa o le afi fa’atasi ma isi tagata, sa fesiligia ai o ia “o lenei tagata fo’i sa faatasi ma ia”. Peita’i ua tali atu Peteru “ou te le iloa o ia”. E faatolu ona fesiligia, e faatolu fo’i ona faafiti Peteru. Ina ua vivini moa, ona ia toe manatua lea o le fetalaiga a le Alii “E le vivini moa seia e fa’afiti faatolu mai ia te a’u”. O le ola fa’afiti e mafai ona o’o i so’o se tagata. Aemaise pe a lofia i le fefe ma le lē mautonu. O lu’itau ia e tofotofoina ai le fa’atuatua o le tagata kerisiano. E moni e tofu le tagata ma ona vaivaiga, ae ao ona tatou faalagolago i le Agaga o le Alii e galueaina o tatou tagata. E pei o Peteru, na ia fa’afiti ia Iesu ina ia aua ne’i o’o le oti ia te ia. Ae le i avefa ma ala e tu’ulafoa’ina ai e Iesu.

Tatalo: 'Aua ne'i o matou faafiti i taimi o tofotofoga. **Amene!**

Aso Tofi – Oketopa 22: “Vala’auina” (*Commissioning*)

Tusi Faitau – Ioane 21: 15-19

Matua – f. 15: “*Ua uma ona latou aai, ona fetalai atu lea o Iesu ia Simona Peteru, Simona e, le atali’i o Ioane, pe sili mai lou alofa ia te a’u, i o latou nei? Ua fai mai o ia iā te ia, “Ioe, le Ali’i e, ua e silafia, ou te alofa ia te oe.” Ona fetalai atu lea o ia iā te ia, “Ia e fafaga i a’u tama’i mamoe.”*

“Pe moni ea e sili atu lou alofa ia te a’u nai lo latou nei?” O lea fesili e toe fa’amanatu mai ai le lototele o Peteru i lana ta’utinoga e faapea “E ui ina ta oti lava faatasi ma oe, ou te le fa’afiti lava ia te oe” (Mataio 26:35). E le i savali Peteru i ana folafolaga, ma i’u ai ina fa’afiti fa’atolu ia Iesu. O lea na fesili fa’atolu ai Iesu ia Peteru e ta’utino lona alofa ma lona fa’atuatua ia te Ia. Na manatu Peteru o ia ua le toe aoga i le galuega a le Atua. Ae peita’i, ua toe vala’auina e le Atua e fai ma leoleo mamoe. O le vala’au alofa e fa’avae i le loto ua salamō. O le toe fesiligia o Peteru o se fa’amanatu i lona vaivai, ae o se fa’ailoga o le alofa tunoa ma le fa’amagaloga a le Alii. O fesili e tolu a Iesu e le o ni fesili e fa’amasino ai, ae o ni fesili e toe fausia ai le loto ma fa’amalosia ai le fa’atuatua o le tagata ua salamō.

Tatalo: Le Alii e, afai ua matou fa’avaivai i lau galuega, ia e fa’amanatu mai iā i matou o lau vala’au e fa’avae i le alofa ma le salamō moni. **Amene!**

Aso Faraile – Oketopa 23: “Tu’ua’ia sesē Iosefa” (*Joseph falsely accused*)

Tusi Faitau – Kenese 39: 11-20

Matua – f. 20a: “*Ua tago atu lona alii ia Iosefa, ua tuu ia te ia i le falepuipui, o le mea ua fusifusia ai e ua fusifusia i le tupu”*

O Iosefa ua na o se taule’ale’a na fa’atauina atu e ona uso i Aikupito ia Potifara le auauna sili a Farao. E ui ina avea o ia ma pologa, ae sa fa’atasi le Atua ma ia. Sa maitauina e Potifara o Iosefa o se tagata amio lelei toe atamai. Ona o taleni ma agava’a na foa’ina e le Atua ia te ia, ua filifili ai Potifara e tuuina atu mea uma i le va’ava’aiga a Iosefa. Peita’i, o tofotofoga na ala mai i lana avā, e le’i taliaina i le mafaufau o Iosefa. Ina ua le tau le mana’o o le avā a Potifara, na mafua ai ona liliu le tala faasaga iā Iosefa ma tuua’ia sesē ai o ia, ma i’u ai ina falepuipui. Tatou te malamalama i le tigā o le tuua’ia sesē i totonu o aiga, nu’u, po o le ekalesia. O le soifua tautua ma le soifua auauna i so’o se galuega, e le gata ina fa’atino i le fa’amaoni, ma ia tatou manatua e le moe le fili. Tatou te fetai’i pea ma fa’afitauli e fai ma lu’itau i lo tatou ola galulue.

Tatalo: Fa’amalosi mai ia i matou i le auaunaga i totonu o le aiga, le nu’u, ma le ekalesia, ina ia matou tumau i le fa’amaoni ma le amiotonu. **Amene!**

Aso Toona’i – Oketopa 24: “Iosefa le ta’ita’i” (*Joseph the leader*)

Tusi Faitau – Kenese 41: 39-57

Matua – f. 39: “*Ona fai ai lea o Farao ia Iosefa, Ua faaali atu e le Atua lea mea uma ia te oe; o le mea lea e leai ai se tusa ma oe i le mafaufau ma le potu.”*

E le’i filifilia Iosefa ona o lona tulaga, ae ona o le agaga o le Atua sa lotolotoi faatasi ma ia. O lana ta’ita’iga sa amata mai i le loto faamaoni i taimi o puapuga. O le ta’ita’iga moni e amata i le loto usiusita’i ma le faalagolago i le Atua. O le ta’ita’i e nofo sauniuni, ma ua lava tapena e tali atu i fa’afitauli o lo’o futua’i mai. O le fa’amanuia a le Atua ia Iosefa ma lana ta’ita’iga ua lavea’ina ai Aikupito i le taimi o le oge. E le i saili manuia Iosefa mo ia lava, ae mo tagata lautele. Ua molimau le tupu o Farao, o le potu ma le tomai o Iosefa, o le mealofa foa’i fua mai le Atua. E ui ina feagai ma tofotofoga,

ae na auala mai ai lona valaauina. O ala o le Atua e le malamalama ai le tagata, a e ua na o le Atua lava.

Tatalo: Ia e saunia o matou loto, ina ia matou nofo tapena ma sauni e tali atu i soo se fa'afitauli o le olaga nei. **Amene!**

TO'ATŪGĀ MA TOE FUATA'IGA – SET BACKS AND COME BACKS

Faasesēina faamoemoega (Confounding Expectation)

Aso Sa – Oketopa 25: “Olioli o le toe fo'i mai” (A Joyful comeback)

Tusi Faitau – Luka 15: 11-32

Matua – ff. 31- 32: *“Ua fai atu o ia ia te ia, Tā e, ta te nonofo pea ma oe, o a'u mea uma fo'i, o āu ia. Ua tatau fo'i ona tatou fiafia ma olioli, auā o lou uso lenā na oti, a ua ola mai, na le iloa fo'i, a ua maua.”*

O le fa'afitauli o le atalii matua e le o le leai o se fa'amanuiaga mo ia, ae o le le iloa o lona manuia. Sa latalata o ia i le tamā i le tino, ae ua mamao lona loto. O le olioli o le tamā e afua mai ina ua toe foi mai lona atali'i la'ititi i le aiga. Le atali'i na manatu ua tonu ma sa'o le filifiliga na ia faia. A'o lea ua lagona lona salamō ma toe fo'i ai i lona aiga. E pei ona fetalai Iesu “e tāua i le Atua tagata ua leiloa, ma e tele le olioli i le lagi pe a toe foi mai se tasi”. E le'i fa'alilolilo le fiafia o le tamā, auā o le mea lea e finagalo i ai le Atua. Ia tatou fiafia fa'atasi ma talia se ua toe fo'i mai. E ui i le lē fiafia o le uso matua, ae le i tu'ua ai le alofa o le tamā i lona atali'i ua toe fo'i mai i le aiga. E fa'amanatu mai ai se feau tāua, o i tatou uma o totino o le aiga o le Atua. Ia tatou maua le ola faamagalalo, o le loto maualalo e talia ai le tagata ua salamō moni ona o filifiliga ma faai'uga ua sesē ona fai.

Tatalo: Fa'afouina i matou i lou Agaga Pa'ia, ina ia matou savavali i le ala o le alofa ma le fa'amagaloga i aso uma o lo matou ola. **Amene!**

Aso Gafua – Oketopa 26: “Mo se taimi faapenei” (For such a time as this)

Tusi Faitau – Eseta 4: 4 – 14

Matua – f. 14: *“Auā afai e te matuā faalologo i nei ona po, e tupu mai le tuusaunoaina ma le lavea'iina o sa lutā ma se tasi mea; a o oe, ma le aiga o lou tamā e fano outou; e iloa foi e ai po ua fai oe ma masiofo ona o se aso faapenei?”*

E le'i tupu fa'afuase'i le ave a Eseta ma masiofo. E ui sa foliga mai o se filifiliga a le tupu, ae sa lotolotoi faatasi ai ma fuafuaga lilo a le Atua. O le tulaga o le masiofo na mafai ai e Eseta ona fa'alatalata atu i le tupu ma le talosaga, ina ia faasaoina le ola o lona nu'u. O le valauina o Eseta, atonu e le o se taimi faigofie i le va'aiga faa-le-tagata, ae o tua atu o loo atagia ai le filemu o le Atua. Ua tofia Eseta e fai meafaigaluega e ta'iala ai le filemu o le Atua mo sa Iutā. E tofu le tagata ma lona valaauina mai le Atua. E i ai foi taimi e auala mai ai i tofotofoga le ola valaauina o le tagata, e mana'omia ai le lototele ma le onosa'i. O tofotofoga e lē o ni fa'ailoga o le tu'ulafoa'iina, ae o ni avanoa e faailoa ai le fa'amaoni ma le fa'atuatua. O le fesili tāua: pe tatou te lototele ea e tali atu, pe a o'o mai o tatou “taimi faapitoo”?

Tatalo: A o'o mai tofotofoga ma taimi faigata, ia matou maua pea le loto tele ma le onosa'i e fa'atino lo matou ola vala'auina. **Amene!**

Aso Lua – Oketopa 27: “I tua atu o vaaiga” (Behind the scenes)

Tusi Faitau – Eseta 7: 1-10

Matua – ff. 1-2: *“Ua o atu le tupu ma Hamanu e taumamafa faatasi ma le masiofo o Eseta. Ona fai atu lea o le tupu ia Eseta i lena aso e lua, a'o fai le taumafataga o le uaina,*

Le Masiofo e, Eseta, se a le mea e te ole mai ai? e avatua lava ia te oe; pe se a foi le mea e te faatoga mai ai? e oo lava i le vaeluaina o le malo e faia lava.”

O le taumafataga ua na o se fa’atasiga masani e talatalanoa ma fa’asoa ai i le va o le tupu, le masiofo o Eseta, ma le tagata malosi o Hamanu. O le vala’aulia patino i se taumafataga sa avea ma fa’ailoga o le fa’aaloalo maualuga i totonu o Peresia. O le taumafataga na auai fa’atasi ai ma le Atua, na afua ai le fa’aolataga o le nuu o Isaraelu. Eseta na fa’alototeleina e le Atua ina ua fa’aleo lona mana’o i le tupu e lavea’ina lona nu’u. Hamanu na naunau ina ia pasia le tulafono e faa’o ai le oti i tagata sa lutā. O le Atua e lilo ana galuega mai le vaaiga a le tagata. Na ia liliuina le lotu o le tupu, ma gaua’i atu ia Eseta ma lona mana’o. O le Atua na fa’agaganaina Eseta i le taimi o le taumafataga, ma fa’amalamalama ai o Hamanu o le fili o tagata lutaia. O le soifua tautua ma le soifua galulue o ō tatou tagata, e le mafai ona moe le fili ia tatou fuafuaga fai. Ia tatou mataala i taimi uma, aua ne’i o tatou fa’amoemoe i le malosi ma le tomai ua tatou maua, a ia fai pea le Atua ma ta’iala sili i lo tatou ola.

Tatalo: Ia e fa’atumauiina lo matou mata’ala ma lo matou fa’amaoni, ma ia avea pea Oe ma ta’iala sili i a matou filifiliga ma fa’ai’uga fai. **Amene!**

Aso Lulu – Oketopa 28: “Malamalama o le lalolagi” (*Light of the world*)

Tusi Faitau – Ioane 9: 1-12

Matua – ff. 3-5: *“Ua tali atu Iesu, “E lei agasala lenei tagata, poo ona matua; ae peita’i ina ia fa’aalia ai o galuega a le Atua ia te ia. E tatau ona ou faia galuega a le ua auina mai a’u, manū o ao; e o’o i le po, e le mafai e se tasi ona galue ai. Manū o o’u i ai i le lalolagi, o a’u o le malamalama o le lalolagi.”*

O le fa’apupulaina e Iesu o le tauaso na la fetai’i i le ala, o loo fai pea ma molimau i lana galuega fa’amalolō. O manatu na liliu e Iesu, e le o puapuaga ma ma’i uma o le tino e afua mai ona o le agasala. E ui e le i taliaina i lotu ma mafaufau o le au faresaio, ae ua avea le fa’amalologa o le tauaso ma ala e susulu atu ai le malamalama o le Atua i le lalolagi. Pe a tatou feagai ma faigata, e ao ona tatou manatua e lē o se fa’ailoga o le tu’ulafoa’iina e le Atua, ae atonu o se avanoa e fa’aalia ai lona alofa lavea’i mo le tagata. Ia tatou talitonu ma fa’amoemoe pea i le Ali’i, aua o Ia o le puna o le malamalama moni ma le fa’amalologa o le agaga ma le tino. O vavega na faia e Iesu ua aumai ai le malamalama fa’aleagaga i tagata uma o loo leiloa pea i le agasala.

Tatalo: Ia avea i matou ma molimau o lou alofa tunoa i le lalolagi, ina ia susulu atu i nisi o lo’o mana’omia. **Amene!**

Aso Tofi – Oketopa 29: “O le lavea’i o faigauō ma le fa’amalosi ‘au”

Tusi Faitau – 1 Samuelu 23: 7-20 (*Lifeline of friendship and encouragement*)

Matua – ff. 16-17a: *“Ona tula’i lea o Ionatana le atali’i o Saulo, ua alu atu ia Tavita i le vao matua, ua faamalosi ia te ia i la le Atua; ua fai mai fo’i ia te ia, aua le fefe, auā e le maua oe e le lima o Saulo lo’u tamā; ae fai oe ma tupu o Isaraelu, o a’u fo’i ou te aupito atu ia te oe”*

O le so’otaga o Tavita ma Ionatana e le na o se faauō e pei ona masani ai le to’atele, ae o se feagaiga i luma o le Atua. O le feagaiga sa avea ma molimau o le alofa e lē suia i taimi o faigatā. Ionatana le atali’i o Saulo, sa le tatau ea ona avea Tavita ma ona fili? Ina ua sola Tavita i le vao ona o le sauā o Saulo, o le lotu fuatia ifo o Ionatana na alu ai e saili ma fa’amalosi ia Tavita i ona mafatiaga. E le mafai ona tatou taofia le fotua’i mai o faigatā o lenei olaga, tatou te leiloa fo’i le taimi e tupu ai. Ae mafai ona tatou faia se galuega fa’amalosi ‘au e lavea’i ai se tagata ua fa’avaivai ona o le lē maotonu. O le faigauō e taula i le Atua lona faavae, o se mafutaga e fafia ma e fa’aaau

pea. E tumau lona matagofie, ma e le mafai e le fili ona fa'ato'ilalo. Amuia se mafutaga o loo lotolotoi ai se faigauō e pei o Tavita ma Ionatana.

Tatalo: Ia avea i matou ma uō e fa'atupu leleiga i le vā o tagata, ina ia atagia ai lou finagalo alofa mo i matou. **Amene!**

Aso Faraile – Oketopa 30: “O se taunu’uga ua fa’aato’atoaina”

Tusi Faitau – 2 Samuēlu 5: 1-5 (*Destiny fulfilled*)

Matua – f. 4: *“Sa tolu sefulu o tausaga o Tavita ina ua fai o ia ma tupu; e fa sefulu o tausaga sa fai ai o ia ma tupu.”*

Ina ua fa'au'uina Tavita e avea ma tupu i lona olaga talavou, e le'i vave ona o'o i le nofoālii. Sa ia feagai muamua ma sauaga a le tupu o Saulo, le olaga faigatā i le vao, ma le tele o luitau na a'oa'oina ai lona loto ma tapena ai lona fa'atuatua. Tavita na amata i le tausi fanua ma le leoleo mamoe. O se taule'ale'a e talavou ma e fa'atauva'a i le vaai a tagata, ae na taūa i le silasila a le Atua. Filifilia e avea ma tupu ina ua atoa le tolu sefulu o ona tausaga. O le taimi lea ua fa'aato'atoaina ai le folafolaga a le Atua e tusa ma lona valaauina. O le fa sefulu tausaga o le nofoaiga ua atagia ai faamanuigiaga a le Atua ia Tavita. O le taimi o le Atua e mana'omia ai le loto onosa'i ma le ola faatalitali o le tagata. O le taimi o le nofo tatalo ina ia fa'amalosia ai le loto, fa'amausali ai le fa'atuatua, ma a'oa'o ai le tagata e fa'alagolago atoatoa i le Atua.

Tatalo: E pei ona e ta'ita'ia Tavita i ona tausaga o le fa'atalitali ma le onosa'i, ia e ta'ita'iina fo'i i matou i taimi o tofotofoga ma lu'itau. **Amene!**

Aso Toona'i – Oketopa 31: “Ave’ese ofu o le tu’ugamau”

Tusi Faitau – Ioane 11: 38-44 (*Takeoff the grave clothes*)

Matua – ff. 43-44: *“Ua ia fetalai atu ia upu, ona alaga lea o ia ua leo tele, “Lasalo e, ina sau ia i fafo.” Ona alu ai lea i fafo o le na oti, ua fusifusia ona vae ma ona lima i fusi, ua fusi foi ona mata i le solosolo. Ona fetalai atu lea o Iesu ia te i latou, “Tatala ia ia te ia, ina tu'u atu ia e alu.”*

O le upu a le Atua e auala mai ai le mana faaola, e tusa lava po ua leai se faamoemoe i le vaaiga a le tagata. Lasalo na toe fa'aolaina e Iesu mai le oti, e le gata ua tali ai mana'oga o Maria ma Mareta, ao se fa'amanatu tāua lea mo i tatou, e leai se mea e faigata i le Atua. Fetalai Iesu “O a'u nei o le toetu ma le ola; o lē faatuatua mai ia te a'u, e ui lava ina oti, ae ola lava ia.” (Mataio 11:25) O le toetu o Iesu Keriso, ua saunia ai le fa'aolataga mo tagata uma. Faapei o Lasalo, afai ua toe fa'aolaina mai le oti, o le avanoa lea e tatala uma ai noanoataga mai le olaga tuai. O ala o le Atua, e le o ala ia o le tagata. O le silisili ese o le Atua e le mafai e se tasi ona fa'amatalatalaina. E mafai e le Atua ona toe faafouina le tagata agasala, faamalolō le loto ua nutimomoia, ma toe fausia se aiga ua le o toe maopo'opo.

Tatalo: Fa'afetai ona o Iesu Keriso le Toetū, ua aumaia le fa'amoemoe e lē uma ma le ola e faavavau. **Amene!**

FAITAUGA I LE ROMA (3) – Readings in Romans (3)

1 Alofa ma le fealofani (*1 Love and harmony*)

Aso Sā – Novema 1: “O se vaega ua totoe ua filifilia e le alofa tunoa”

Tusi Faitau – Roma 11: 1-12 (*A remnant chosen by grace*)

Matua – ff. 5, 6: *“O lenei, e fa'apea fo'i i nei ona po, ua i ai e ua totoe e tusa ma le filifiliga o le alofa tunoa. Afai fo'i o le alofa tunoa, ua le o galuega; ana fa'apea, po ua le toe ta'ualofatunoaina le alofa tunoa.”*

Ua tatou ola i se lalolagi sa'oloto ma le tele o filifiliga. O le tagata ma lana aiā tatau ua faia ai ana filifiliga sa'oloto. Peita'i, o a tatou filifiliga uma ua i ai ona taunu'uga. E le gata i filifiliga sa'oloto a le tagata, a e ua fa'apea fo'i i mālō ta'ita'itasi. Ua fa'atagaina e le Atua tagata ma mālō ia faia filifiliga e fete'ena'i ai ma lona finagalo, auā ua ia silafia taunu'uga uma o a tatou filifiliga. O lana fa'atōfāla'iga mo le lalolagi, ia ola sa'oloto i lona alofa tunoa. Ua ia lalaga ai i lona alofa tunoa, se fa'amoemoe taua mo tatou filifiliga ma ona taunu'uga.

O a tatou filifiliga e ese'ese uma ona taunu'uga. O nisi e taunu'u manuia, a o nisi ua lē manuia. A o le Atua ma lona alofa tunoa, ua fai ma ta'ita'itama i le tatou savaliga i lenei lalolagi. O a lava faigata e fetaia'i ma i tatou i le ala, e lē tu'ulafoai'ina e le Atua ona tagata. Ua ia i tatou lona lava alofa tunoa e mafai ai so'o se mea. O le fa'aolataga e ala iā Iesu Keriso, ua fa'amau fa'ailogaina i lea fa'amoemoe lelei lona alofa tunoa mo le lalolagi. Ina ia lē fano se tasi ua fa'atuatua iā te ia, a ia tatou maua le ola i lona mālō e fa'avavau.

Tatalo: Le Atua e, fa'afetai tele i lou alofa tunoa mo le lalolagi. **Amene!**

Aso Gafua – Novema 2: “Fa’apipi’i’ina i totonu o le nu’u o le Atua”

Tusi Faitau – Roma 11: 13-24 (*Grafted into God's people*)

Matua – ff. 17, 18: *“Afai fo’i na gauī ese nisi ona la, a o oe o le olive vao, ua fa’apipi’iina oe ia fa’atasi ma i latou, ma ua tofu fa’atasi ma i latou i le pogai ma le sua o le olive, aua e te fa’asiasia i ona la; afai fo’i e te fa’asiasia, ia e manatu ua le ola le pogai ia te oe, a ua e ola i le pogai.”*

Ua fa'amatala auili'ili e Paulo le to'ilalo o Isaraelu, e fai ma fa'amanuiaga i nu'u na vala'auina i latou e le Atua. Peita'i, ua fa'aaogaina e le Atua isi nu'u e avea mafa'amanuiaga ia Isaraelu; ina ia latou auai fa'atasi i le fa'aolataga ua faia e Iesu. O le taula'iga o le fa'asoa a le Aposetolo, ia loto maualalo ma ia taula'i atu i le Atua agalelei; a e le'o vāivāiga o isi. E pei o le fa'aaogaina e le Atua o isi nu'u e fai ma fa'amanuiaga ia Isaraelu, ua fa'apea fo'i lona finagalo mo i tatou uma. Ua iā i tatou lona alofa tunoa e ala i le fa'aolataga Iesu Keriso.

Ia tatou fa'aילוa atu lea alofa tunoa i totonu o mafutaga ua fevaevae'i, ina ia toe maua le maopopoga ma le le fealofani. O a fo'i vāivāiga o nisi tagata, ia lē va'ai maualalo a e ia ofoina le fesoasoani mo e o mafatia. O Iesu Keriso o lē na faia le leleiga i le vā o le tagata ma le Atua. Na ia fa'amaualalo i lona tulaga mamalu, a e afio mai e auauna i tagata ma ia aumaia le sa'olotoga i le lalolagi. Ia fa'apea fo'i ona atagia lea fa'ata'ita'iga lelei, i lo tatou ola o aso uma

Tatalo: Le Ali'i e, a'oa'o mai ina ia taula'i la matou va'ai i lou agalelei ma ia fai i matou ma leleiga i vā o tagata ma lau Afio. **Amene!**

Aso Lua – Novema 3: “O le mea lilo o le fa’aolataga o Isaraelu”

Tusi Faitau – Roma 11: 25-36 (*The mystery of Israel's salvation*)

Matua – ff. 32, 33: *“Auā ua punitia e le Atua tagata uma lava i le lē fa'alogi, ina ia alofaina e ia tagata uma lava. Auē! Le loloto o le tamaoauga o le poto atoa ma le silafaga a le Atua. E le mas'esu'eina ana fa'amasinoga; e le mafai fo'i ona iloa ona ala.”*

O le Atua alofa tunoa, e fa'aali i le tagata i mea lilo. O le Atua osi feagaiga ma e tausī feagaiga, ina ia fa'atumauiina pea le matagofie o mafutaga ma ona tagata. O Paulo ua matua lona soifua i le galuega a le Atua. Ua manino ia te ia le finagalo fa'aali mai o le Atua, mo le Ekalesia i Roma. O Iesu Keriso ua fai ma lavea'i mo le nu'u o le Atua, a e ua fa'apeaina fo'i ona aofia ai le lalolagi uma. O le alofa tunoa o le Atua ua lē fa'apito manū ia tasi, a e ua fa'asafua mo tagata uma ina ia fa'aolaina. E ui ina te'ena ma fa'ataligatuli le lalolagi i lana Tala Lelei, a e ua lē avea lea ma ala e muta ai lona alofa

mai. Ia manino la ta va'ai i le Atua ma lona fa'aali mai i so'o se ala. O le Atua, e sa'ili mai i le ala e fa'atauva'a ma maualalo. O lea fa'amoemoe, e lu'itauina ai le tagata e saili'ili manino i le fa'aali mai o le Atua. Iesu Keriso o ia o le mea'alofa lilo a le lagi, na foai'ina mo le lalolagi ina ia tatou maua le ola atali.

Tatalo: Le Atua e, fa'afetai mo le mea'alofa lilo e ala ia Iesu Keriso; ua fa'aolaina ai le lalolagi uma. **Amene!**

Aso Lulu – Novema 4: “O le taulaga ola” (A living sacrifice)

Tusi Faitau – Roma 12: 1-8

Matua – ff. 1, 2: *“O lenei, le au uso e, ou te aioi atu ia te outou, ona o le alofa mutimutiva vale o le Atua, ia outou tu'uina atu o outou tino i le Atua, o le taulaga ola, ma le paia, ma le mālīe, o le mea lea e tatau ai ona outou faia. Aua fo'i tou te amio fa'atasi ma lenei lalolagi, a e peita'i ia liliuina i le toe fuataina o outou loto, ina ia outou su'esu'e pe se a le finagalo o le Atua, o mea ua lelei, ma le mālīe, ma le atoatoa.”*

O le fai taulaga i le Atua, o faiva alofilima o so'o se Kerisiano. O le tautua e fai ma fa'ailoga, o le tatou lea auunaga mo le Atua ma lana Tala Lelei. E tele meaalofoa a le Atua ua fa'amanuia ai i le lalolagi. Ua tatou tufi taufao ai i le tele o ona manuia ua tatou maua. O lona alofa tele mai i le lalolagi, na afio mai ai lona lava Alo pele e to'atasi ma mafuta ma le tagata agasala. O le fesili, o le a se tatou tali atu i le Atua ma lona agalelei? Ua tatou 'ae'ae lea manu ua ulu i le tele o manuia o le Atua ua i o tatou lima. O le ola fai taulaga, o la ta tautua o aso uma. O mea ua tatou foai' mo le Atua ma lana galuega, e fai ma taulaga e vi'ia ai lona suafa mamalu. O le taulaga sili ona taua i le Atua, o le ofoina lea o tatou tagata atoa e tautua lona finagalo. Ia atagia i lo tatou ola le finagalo alofa o le Atua, ina ia uigā ai lo ta ola fai taulaga mo lana Tala Lelei. O lona uiga, e mana'omia ona suia o tatou mafaufauga tuai; a e talia suiga fou ua saunia e le Atua mo i tatou. I le ma lea, ia tatou salamō mai le faia o le agasala. O i'ina, e manino ai la ta va'ai i le Atua ma lona fa'aali mai i lo tatou ola.

Tatalo: Iesu e le taulaga sili, fa'afetai i lou soifua ofoina mo le lalolagi ua togiloina ai agasala uma. **Amene!**

Aso Tofi – Novema 5: “Fa'ailoga o le Kerisiano moni” (Marks of the true Christian)

Tusi Faitau – Roma 12: 9-31

Matua – ff. 14, 17: *“Ia fa'amanuia atu i e fa'asua mai ia te outou, ia fa'amanuia lava, a e aua le fetu'u. Ia outou olioli fa'atasi ma e ua olioli, ia outou tagi fo'i fa'atasi ma e ua fetagisi. Ia gatasitasi o outou manatu; aua le manatu i mea silisili, a ia feoa'i ma e ua fa'amaulalo; aua le fa'afiapopoto. Aua le tau i le leaga i le leaga i se tasi; ia sauniuni mea e tusa i luma o tagata uma lava.”*

O le avea ma auuna e tautua le Atua ma lona finagalo, o le auunaga e ofoina atoa ai le ola e galue ai. E le'o se galuega fo'i e faigofie lona fa'atinoina, auā e tele pea lu'itau e feagai ma le tagata. O le fa'ailoga o le Kerisiano ua i le Atua lona fa'atuatua, o ia fo'i o le alofa mutimutiva. O le fa'asoa manino a le Aposetolo ia aua ne'i tau i le leaga i le leaga, a e ia tau i le alofa. O le fesili e fa'atupu manatu, o a ni mea e iloga ai le Kerisiano moni? Ua avea i tatou ma Kerisiano, o e ua fa'atuatua ma talitonu i le Atua. O Iesu le fa'ata'ita'iga sili mo le lalolagi, e ala i lana fa'aolataga ua ia saunia. O le tauaveina o fa'ailoga o Iesu, e fa'ailoa ai i le lalolagi o i tatou o tagata Kerisiano. O lona maluu ma lona toe tū manumālō, ua avea ai i tatou uma ma tagata i le li'o o le aiga o le Atua.

Tatalo: Le Ali'i e, ia matou fa'ailoa atu le fa'aolataga a Iesu Keriso i tagata ua pogisa i lau Tala Lelei. **Amene!**

Aso Faraile – Novema 6: “Usiusita’i i pule’aga” (*Submission to authorities*)

Tusi Faitau – Roma 13: 1-7

Matua – ff. 1, 3: *“Ia usiusita’i tagata uma i faipule silisili; auā e leai se pule pe a le mai le Atua; o pule uma lava o lo’o fai nei, ua fa’atuina e le Atua. O lenei, o le na te tete’e i le pule, ua tete’e e ia le sauniga a le Atua; o e tete’e fo’i e sala i latou. Auā o ali’i, e le se fa’amata’u i latou i e amio lelei, na o e amio leaga. O lou mana’o ea, ia e le fefe i le pule? Ia e amio lelei, ona ta’uleleia mai lea o oe e ia.”*

O upu ua masani ai le fa’alogo, o le ala i le pule o le tautua. O le tomai o tua’ā ua fa’ilagi le folauga, e tapena ai le ola o le tagata Samoa. O le Atua, e ou mea uma lava ma le pule silisili. O le pule a le tagata e lē mafai ona o’o atu i isi mea o le lalolagi. Peita’i, o le pule a le Atua ua tu’uina ia i latou ua fai ma ta’ita’i; o lona lea finagalo ua fa’aaogaina ai le tagata. Ua tele pule ese’ese i nei ona aso ua tatou i ai. O nisi ua avea le avanoa e fai ai ma ta’ita’i i totonu o o mafutaga, ua manatu ai ua iā te ia le pule e faia ai so’o se mea. O nisi fo’i ua avea le tele o tamaoiga, ua manatu fa’amauaia ai ma leiloa le vā feso’ota’i ma nisi. O ia vaivaiga, ua fai pea ma fa’afitauli o aso uma i le ola o le tagata. Ua fai pea ma tu’oi mautū i le vā o tagata ua i ai tofiga ma tagata lautele. Fai mai se tasi o manatu, e lelei le fia pule; a e leaga le gaupule. Ua fa’amanatu mai le Tala Lelei, ia usita’ia i latou ua auala mai ai le pule a le Atua. Auā o pule uma lava e mai le Atua ia, o se fo’i na te tete’e i le pule; ua tete’e e ia le finagalo o le Atua. O a lava tofiga ua fa’aaogaina ai lo tatou ola, ia fai lena ma vi’iga o le Atua i aso uma. O lana pule aoao, e faia ai lana fa’amasinoga tonu mo tatou

Tatalo: Le Atua pule aoao, fa’asino mai e lau afio ou ala ina ia tonu ai ona matou faia lau pule ua tu’uina mai. **Amene!**

Aso To’ona’i – Novema 7: “Fa’ataunu’uina o le Tulafono e ala i le alofa”

Tusi Faitau – Roma 13: 8-4 (*Fulfilling the Law through love*)

Matua – ff. 9e, 12a: *“Ia e alofa atu i lē lua te tuaoi, ia pei o oe lava ia te oe. E le agaleaga atu le alofa i lē la te tuaoi; o lenei, o le alofa o le atoatoa lea o le tulafono. Ia fa’apea fo’i, ina ua tatou iloa ona po, ua o’o i le itu po e ala ai e na momoe; auā ua latalata nei ia te i tatou le ola, sa mamao ina o tatou ulua’i fa’atuatua. Ua leva le po, ua lata mai le ao.”*

So’o se galuega lava, ua i ai ona tulafono e ta’iala ai le gasologa o galuega fa’atino. E ese’ese uma fo’i galuega ma ona tulafono. O tulafono e tausia le ola saogalemu o tagata galulue, ma tapula’a ai le fa’atinoina o galuega. Ua fa’apea fo’i le vā feagai o tagata ma le Atua. O tulafono a le Atua, ua fai ma ta’iala i le ola taumafai o tagata. Ua i ai fo’i aiaiga o ia tulafono ma lona tau pe a usita’ia. Ua tatou manino ma malamalama i uiga o tulafono a le Atua na tu’uina mai. Ua a’oa’oina ma tu’ufa’asolo mai, i lea augā tupulaga ma lea augā tupulaga. Ua fai ma falea’oga atamai i lo tatou ola, ma ia filifili ai ma le tatau i mea e tatau ona tatou faia. O se fafagu lelei lea mo le Ekalesia ma le ‘au Kerisiano uma. E pei ona i ai le tatou autū, fa’ataunu’uina o le Tulafono e ala i le alofa. A fa’apea ona faia e tagata, ona tatou lagona lea o lo tatou latalata i le Atua. O lona finagalo mo le lalolagi, ia lolofa i o tatou tuāoi; ina ia atagia ai lona alofa tunoa mo tagata uma.

Tatalo: Le Atua e, ia atagia lou alofa i mea lelei ua matou faia mo isi. **Amene!**

FAITAUGA I LE ROMA (3) – Readings in Romans (3)

2 Fefa’aaloaloa’i (2 Respect one another)

Aso Sā – Novema 8: “Aua le fa’amasino atu i isi” (*Do not judge another*)

Tusi Faitau – Roma 14: 1-12

Matua – f. 3: *“Aua ne’i ta’ufa’ata’uva’aina lē ‘ai i le le ‘ai, ma le ua le ‘ai, auā ne’i fa’asala o ia i le ua ‘ai; auā ua talia o ia e le Atua.”*

Tasi nei o a’oa’oga a Iesu Keriso ua fai ma falea’oga atamai i le tagata. O le lalolagi ua tatou ola ai, e lu’itauina pea i tatou i fa’afitauli ese’ese o le ola. E faitioina pea i tatou, i so’o se galuega tatou te fa’atino. A o nisi nei o vaivaiga o lo’o feagai pea ma le ‘au fa’atuatua i nei aso. Ua manatu lava i tatou mo so tatou lava lelei, a e ua tu’ua’i le leaga i nisi tagata. O le toe fa’amanatu mai a le Tala Lelei mo i tatou uma, ia lē fa’amasino atu i nisi tagata ma lē vā’ava’ai masei. Aua fo’i le tulia lo tatou sa’o i o tatou manatu ma lagona. O i’ina e tupu ai fa’afitauli, ma le ola fa’amasino atu i nisi tagata ona o mea e tutupu. Ua tatou manatu ua sa’o ma tonu i tatou, ina ia ta’uleleia ai mea ua tatou faia. Ua fai lea ma ala ua lē maua ai se nonofo lelei, a e ua fa’atupulaia ai pea le faitaga’i i vā o tagata. O le Atua, o ia le fa’amasino sili i lo tatou ola ma mea uma ua tatou faia. E leai fo’i sesi e tonu ma sa’o i aso uma. O lona uiga, aua ne’i o tatou fa’amasino atu ina ne’i fa’amasinoina mai i tatou.

Tatalo: Le Ali’i e, fesoasoani mai i lo matou ola fa’amasino atu i nisi o lau fanau; ina ia faia pea lou finagalo a e le’o matou loto. **Amene!**

Aso Gafua – Novema 9: “Aua ne’i fa’atupuina se mea e tausuai ai i lona uso”

Tusi Faitau – Roma 14: 13-23 *(Do not cause another to stumble)*

Matua – f. 13: *“O lenei, aua ne’i tatou toe fefa’amasinoa’i a e lelei ina ia manatu i lenei lava mea, aua ne’i tu’u ane e se tasi se mea e tausua’i ai, po o se mea e tautevateva ai lona uso.”*

O le tausia o le fealofani i le vā o tagata, o le fa’atinoga e tatau mo aso uma. A lelei ona tausia le vā o tagata, ona atagia lea o le **‘Fefa’aaloaloa’i**. O se tasi lea o fa’afitauli o lo’o feagai pea ma le ‘au Kerisiano. Ua faigata ona maua le nonofo filemu, ona o le malosi o pule’aga a Roma. E lē gata i lena, ua tele tala’iga sesē ua taumafai e fa’asesēina ai le talitonuga o tagata Kerisiano. O upu ua fai ma matua, ua aumai ai se fa’atonuga e tatau mo tagata uma. Ua fa’atauaina ai le ola e tatau ma le tagata, ina ia lelei le vā feso’ota’i ma isi a e le’o le vevesi. Ia lē fa’atupuina ai fo’i le fefa’amasinoa’i, ma taumafai i se leaga mo le isi tagata. O le aganu’u Samoa, e mamalu mea uma i le fa’aaloalo. Fai mai le autū o le vaiaso, **‘Fefa’aaloaloa’i**. Ua talafeagai fo’i ma le autū mo lenei lava aso. Ia lē fa’atupuina se mea e tausua’i ai i lona uso, a e ia fefa’aaloaloa’i. O le finagalo filemu o le Atua mo le tagata, ia tu’u ‘ese le ola fefa’amasinoa’i ona e tupu ai vesiga. E ui i le pule’aga sauā a Roma i lena vaitau, e le’i mafai ai ona taofia le fe’au o le Tala Lelei mo le ‘au Kerisiano. O le tausia o le filemu, o le tatou galuega fai fa’atasi. O le finagalo o le Atua, ia nonofo fealofani ona tagata i lana Tala Lelei. Ia tausia le filemu ina ia maopoopo ai mafutaga.

Tatalo: Le Atua e, ia avea i matou ma leleiga i le vā ma tagata; a e le’o le fa’amasino atu. **Amene!**

Aso Lua – Novema 10: “O le fa’ata’ita’iga a Keiso”

Tusi Faitau – Roma 15: 1-13 *(The example Of Christ)*

Matua – f. 7: *“O lea ia outou talia ai le tasi e le tasi, fa’apei o Keriso fo’i ona talia o i tatou, e o’o ai le vi’iga i le Atua.”*

O le afio mai o Keriso i le lalolagi, na ia fa’amanino mea uma e uiga i le Tala Lelei. E o’o lava i le ola o lo’o tatou i ai nei, o ia lava le fa’ata’ita’iga sili. Ua fai lea ma lu’itau i le tagata, e saili’ili manino ai i uiga o le ola ia Keriso. E ui i vaivaiga o le tagata, e le’i te’ena e le Ali’i o Iesu le tagata. O lona alofa e lē fa’atuāoia, a e ua fa’asalafa lea mo le lalolagi uma. Ua avea ai le tala o lenei aso, e fai ma fa’amanatu a o tatou aga atu mo le Kerisimasi. O le vaitau e toe mafuta ai matua ma fanau, a e fa’apea fo’i aiga. O lona

alofa mo tagata uma, e leai sona tuāoi. O le alofa ua maualuga lea i lona finagalo, ina ia lagona e le lalolagi uma lo tatou taua. Ua ia finagalo fo'i, e tataui i le tagata ona ola i ana i le olaga fa'a-Keriso i aso uma. O le upu moni, e lē faigofie i le tagata soifua ona faia lea fa'atinoga. O le a fo'i so tatou taumafai mo se lelei, o i tatou lava o tagata e fa'atauva'a ma agasala pea. O ia lava o le fa'ata'ita'iga sili, na afio mai i le lalolagi ona o lona alofa tunoa mo le tagata agasala. Ua fa'aolaina ai i tatou uma, ma ua tatou maua ai le ola e fa'avavau fa'avavau lava.

Tatalo: Le Atua o le alofa tunoa e, fa'asino mai e lou agaga le ala tonu e tataui ona matou ola ai; ina ia atagia ai lau afio i a matou fa'atinoga. **Amene!**

Aso Lulu – Novema 11: “O le galuega a Paulo mo Nu'u Ese”

Tusi Faitau – Roma 15: 14-21 *(Paul's ministry to the Gentiles)*

Matua – f. 21: *“A e peita'i e fa'apei ona tusia, E va'ava'ai i latou o e na talai'ina i ai le tala ia te ia; e lagona e i latou o e na le fa'alogo atu i ai.”*

E le'i faigofie le feagai ai o le Aposetolo Paulo, ma tagata i lana galuega tala'i. E tele lu'itau na feagai ma ia, a e le'i fa'avaivai ai lana auaua i le ta'ai'ina lea o le finagalo o le Atua. O lana auaua ma le fa'amaoni, ua iloga ai o ia o le auaua ua sili lona latalata i le Atua. O lana galuega mo nu'u 'ese e ui ina faigata, a e na ia manumālō lava mai fa'afitauli o lana galuega. Ua vala'uina i tatou i so'o faiva ma so'o se tiute e galulue ai. E i ai taimi e tutupu ai faigata i lo tatou ola galulue, ona fa'avaivai lea o la tatou auaua i o tatou tiute. O le fa'amanatu a le Tala Lelei, ia maua le loto tele e feagai ai ma fa'afitauli o so'o se galuega. Mau pea le to'ovae i le Atua, e maua ai lo tatou malosi e fa'auau ai la ta auaua i so'o se ala.

Tatalo: Ia matou maua le loto tele e tali ai i faigata o le ola. **Amene!**

Aso Tofi – Novema 12: “Ua fuafua Paulo e asiasi i Roma”

Tusi Faitau – Roma 15: 22-33 *(Paul's plan to visit Rome)*

Matua – f. 22: *“O lea fo'i e tele mea sa le mafai ai ia te a'u ona alu atu ia te outou.”*

Ua latalata i le fa'aiuga o le tusi umi a Paulo i Kerisiano i Roma. Ua ia fa'atoa fa'a'ailoa mai ai, o lana misiona mai le Atua o le aveina lea o le Tala Lelei i tagata e le'i fa'alogo lava ia Keriso. O lana sailiga fa'apitoa o le fa'a'ailoa atu lea o le talalelei i itulagi e le'i talai'ina ai lava Keriso. O le ala lea, na va'ai ai Paulo i lana galuega o se fa'ataunu'uga o valoaga anamua. O lenei tautinoga muamua i lana galuega, o le mafua'aga lea o lo'o ta'ua ai e Paulo i lenei fuaiupu. O le mafua'aga lea ua ia tusia ai, e le'i mafai ai ona ia malaga i Roma e asiasi i Kerisiano. Sa fa'auau pea ona ia sailia ni teritori fou i lona vaega o le lalolagi lea e le'i talai'ina ai le Tala Lelei. Sa tatau ona ia fa'ataunu'uina lana misiona e fa'a'ailoa atu ia Keriso i itulagi taitasi. O le mea lea na fa'alavelaveina ai o ia mai le malaga atu i Roma, auā ua uma ona fa'atuina ai se vaega o tagata talitonu i Roma ona o galuega a isi

Tatalo: Le Ali'i e, ia e fa'asino mai auala e faigofie ai ona matou fa'a'ailoa atu lau Tala Lelei i le lalolagi uma. **Amene!**

Aso Faraile – Novema 13: “Fa'afetai i le 'au paia i Roma”

Tusi Faitau – Roma 16: 1-16 *(Greetings to the saints in Rome)*

Matua – ff. 5, 7: *“Ua ou alofa atu fo'i i le ekalesia o i lo laua fale. Ua ou alofa atu ia Epaineto, o le pele a a'u, o le fa'apolopolu o ia ia Keriso i Akaia. Ua ou alofa atu ia Maria, o le na galue tele mo outou. Ua ou alofa atu ia Aneroniko ma Iunia, o o'u aiga, sa matou fa'atasi ma a'u i le fale puipui; ua logoleleia i laua e aposetolo, sa la i ai ia Keriso na muamua ia te a'u.”*

O Paulo o le siamupigi i le galuega tala'i a le Atua. O lona agaga fa'afetai ia i latou na galulue fa'atasi ma ia, ina ua tupu ma ola le galuega a le Atua. O lona agaga fa'afetai tele, o i latou na fesoasoani mo ia i le talai'ina o le finagalo o le Atua. O le galuega fa'atala'i, e fetaia'i pea ma faigata. Pei fo'i ona vala'auina ai i tatou e galulue ma tautua le Atua i so'o ala. E le fesiligia le tele o lu'itau e feagai pea ma i tatou. O a lava faigata e feagai ma i tatou o le galuega, ia le avea ia fa'afitauli e fa'avaivai ai lo tatou ola galulue. Ia taula pea i le Atua lo tatou fa'atuatua, o ia na te aumaia le malosi i lo tatou ola auauna mo lona finagalo.

Tatalo: Ia fa'amalosia pea i matou e auauna i lau afio ma lau galuega ua e vala'auina ai matou. **Amene!**

Aso To'ona'i – Novema 14: “Lapataiga i tagata fa'atupu fevaevaeaiga”

Tusi Faitau – Roma 16: 17-37 (*Warning against divisive people*)

Matua – f. 17: “*Ou te aioi atu fo'i ia te outou, le au uso e, ia outou va'ava'ai i e fa'atupu fevaevaeaiga, ma mea e tausua'i ai; o mea ia e le tusa ma le mataupu ua o'oa'oina ai outou; ia outou liliu ese fo'i ia te i latou.*”

O nei fa'atonuga e amata i se lapata'iga e faasaga i fevaevaea'iga i le va o tagata talitonu. Ua matuā popole Paulo, ina ia tumau pea le autasi o i latou uma o lo'o ia Keriso o se tino e tasi. O lo'o ia fa'atatauina nisi o gagana sili ona matutui i lana tusi e fa'asaga i tagata o fa'atupuina fevaevaea'iga, aemaise lava i latou e faia lea mea e ala i a'oa'oga sese. Ua aioi atu Paulo i Kerisiano i Roma ia mataala pea i so'o se tasi e aufaatasi ma i latou, ae amata ona a'oa'o atu ni manatu e ese mai mea ua uma ona ia talai'ina atu.

Tatalo: Puipui mai lau afio mai le 'au tau fa'asese, ina ia matou mataala pea i le fili ma ana mailei. **Amene!**

'OA TAUA – Treasure

Aso Sā – Novema 15: “Usiusita'i ia te Ia ma ola ai” (*Obey Him and live*)

Tusi Faitau – Teuterenome 26: 16-19

Matua – f. 17: “*Ua e matuā fai mai i le aso nei o le Ali'i o lou Atua ia; e te savali fo'i i ona ala, ma e tausi i ana tulafono, ma ana poloaiga, ma ana fa'amasinoga, ma e fa'alogi i lona si'ufofoga.*”

O tulafona a le Atua, na tu'uina mo lona nu'u ina ia ola ma savavali ai. O le fa'amoemoe, e fai ma ta'iala i le ola o Isaraelu ina ia manuia le lumana'i. Ua manino ma malamalama le mafutaga a Isaraelu ma le Atua. E ui i le faigata o lagona o le nu'u, a e tumau pea le alofa o le Atua ia i latou. O se fa'amanatu taua fo'i lea mo le Ekalesia i lenei vaitau. Ua lē toe faigofie nei aso ua tatou i ai. Tele suiga fou o le ola ua a'afia ai le lalolagi ma lona gasologa masani. O a lava mea e tutupu ma a'afia ai lo tatou ola, ia tumau pea i le Atua ma usita'i i lona finagalo fa'aali mai. E ala ese'ese lava lona fa'aali mai i lo tatou ola. Ia tausisi i ana tulafono, ma ia tausia lelei lo tatou va feagai ai. O le 'oa sili lea ona taua, ia tatou maua le nofo fealofani ma le ola felagolagoma'i. O lona lea finagalo mo i tatou o lana fanau.

Tatalo: Foa'i mai le loto fou, ina ia matou tausia ai au poloa'iga uma e pei ona tu'uina mai. **Amene!**

Aso Gafua – Novema 16: “Puipui lou loto mai le matape'ape'a”

Tusi Faitau – Luka 12: 15-21 (*Guard your heart against greed*)

Matua – f. 21: “*O lo'o fa'apea fo'i lē fa'aputu oa ia te ia, a e le mauoa i le Atua.*”

O le loto, o le pogai o mea leaga ma mea lelei uma. E sili fo'i le toa na te pulea i lona loto, nai lo le toa e a'ea le 'olo. O tala ua masani ai le tatou fa'alogo, pe a o'o ina tutupu fa'afitauli i lo tatou ola. A o se tasi lea o vaivaiga o lo'o feagai pea ma le tagata i nei aso. O lo tatou mana'o tele i le 'oa o le lalolagi. Ua agasala pea o tatou loto, ina ua tele manuia ua maua e nisi nai lo tatou. A o le autu o lenei aso, puipui lou loto mai le matape'ape'a. E tofu lava i tatou ma manuia ua fa'amanuaina ai tatou e le Atua. O lona uiga, e leaga lo tatou mana'o i manuia o isi tagata. E taua ai la ia i tatou, ona puipui o tatou loto mai le matape'ape'a. A e ia o tatou sa'ili muamua le 'oa o le lagi, i le tausia lelei lea o le va feagai ai ma isi tagata. Ia tatou alolofa atu i e o mana'omia le fesoasoani ina ia atagia ai le 'oa sili i le lagi. O le finagalo lea o le Atua e tatau ona tatou faia. Ina ia iloga ai, ua tatou puipuia i o tatou loto mai le mana'o tele.

Tatalo: Ia puipui o matou loto mai le matape'ape'a. **Amene!**

Aso Lua – Novema 17: “Limafoa'i: vaila'au e tete'e ai le matape'ape'a”

Tusi Faitau – Iakopo 5: 1-6 (*Generosity: the antidote to greed*)

Matua – f. 2: *“Ua pala la outou oloa, ua atitia o outou ofu i mogamoga.”*

O le Iakopo 5:1–6, e fa'avae i luga o le faitauga o ananafi e uiga i le mata-pe'ape'a. O lo'o fa'amamafaina ai se tasi o vaivaiga sili o se tagata matape'ape'a. E fiafia le tagata matape'ape'a e taofi mau i mea, a e ua faigata ona latou totogi a latou aitalfu i tagata. O le mea lea ua lapata'i mai ai Iakopo, ia e limafoa'i i soo se mea ua ia te oe. Afai ua ia i tatou le tele o tamaoaiga o le Atua, ia fa'aaoga na fa'amanuia e si'itia ai isi. O le limafoa'i, e tupu ai pea mea e avea ona ua tatou tufa manuia o le Atua ua tatou maua.

Tatalo: Fa'afetai Tamā i le tele o fa'amanuiaiga ua matou maua. **Amene!**

Aso Lulu – Novema 18: “O le alofa i tupe” (*The love of money*)

Tusi Faitau – 1 Timoteo 6: 6-11

Matua – ff. 7, 8: *“Auā tatou te le'i au mai lava se mea e tasi i le lalolagi, ua mautinoa fo'i tatou te lē mafai ona ave ese ai o se mea. Afai ua maua e i tatou o mea e a'ai ai ma mea e o'ofu ai, ia gata ai o tatou mana'o.”*

O nisi ia o tamaoaiga o le Atua ua foa'i mai mo le tagata, ina ia tausia ai le ola i la le tino. O lona alofa tunoa, ina ia tali le mana'o ma fa'amalieina lagona o le tagata soifua. O tupe, o le 'oa o le lalolagi e sa'ili i ai le tagata ina ia maua. O nisi o taimi, ua avea le tupe ma fa'afitali i lo tatou ola taumafai. A e o le fe'au a le Tala Lelei, o a mea ua tatou maua ia gata ina lo tatou mana'o. E leaga le mana'o tele, auā e tupu ai vesiga i le va o tagata. Tasi nei o vaivaiga o lo'o feagai pea ma tagata i nei aso. Ua naunau i le 'oa, a e ua fai ma ala ua lē maua ai se nonofo fealofani ma nisi. Ua tele lo tatou mana'o ia fa'ateleina o tatou tamaoaiga, a e ua faigata ona tatou fa'asoa le alofa mai o le Atua. O le toe fa'amanatu a le Tala Lelei, o a mea ua tatou maua ia fa'afetaia le Atua. Ia tatou opegi ma fiafia i ona manuia ua ia foa'i mai mo i tatou. O ia lava na te foa'i mai mea e tatau i lea aso ma lea aso.

Tatalo: Fa'afetai tele le Atua, i lou tamaoaiga fa'asoa mai. **Amene!**

Aso Tofi – Novema 19: “O se 'oa taua e lē mafa'atauina” (*A treasure beyond price*)

Tusi Faitau – Iopu 28: 12-19

Matua – f. 18: *“E le ta'ua le ramuta ma le kapesa, auā a maua le poto e sili lea i penina.”*

O le mata'u i le Ali'i, e lē o le fefe iā te ia po o le fefe i le faia o mea sese ona o le fefe i le fa'asalaga. E fa'atatau i le migao po o ai o Ia; ma le fa'aioaina o ona ala uma e lelei. Ua fa'atatau i le fa'aaluina o le taimi e mafaufau ai i ala o le Atua, ma lona poto ua fausiaina i totonu o le tagata. O le mafaufau loloto i le valea o tatou ala, ma le leaga i le taimi ua tuana'i. O le uiga o le loto ma le mafaufau, e atiina a'e e ta'ita'ia ai i

fa'ai'uga potou auā e fa'avae i luga o ala o le Atua ua tatou fa'atauaina. O le 'oa sili lea ona lelei ma taua, o le potou mai le Atua ma le mafaufau lelei ua ia fa'atupuina i totonu o tatou loto.

Tatalo: Ia foa'i mai le potou ma le loto matala, ina ia faia fa'ai'uga sa'o ua e finagalo ai. **Amene!**

Aso Faraile – Novema 20: “O se ‘oa taua i le lagi” *(A treasure in heaven)*

Tusi Faitau – Luka 12: 22-34

Matua – f. 33: *“Ia outou fa'atau atu i a outou mea, tou te avatu ai e fai ma mea alofa; ia fai e outou ni a outou taga e anagata, o le oa i le lagi e le uma lava, e le taitai ane i ai se gaoui, e le atia fo'i e se mogamoga.”*

O le 'oa o le lagi, e fa'avavau lea. O mea uma ua tatou maua i le lalolagi, e pala ia. O lona uiga, e tatau ona tatou tufa ma fa'asoa tamaoaiga ua tatou maua i le lalolagi, ina ia atagia ai le alofa tunoa o le Atua. O a mea ua tatou maua ma ua fa'amanuiaina ai i tatou e le Atua, ia fa'asoa atu i nisi o lo'o mana'omia. A tatou faia lea mea, ona tatou tamaoaiga lea i le 'oa sili i le lagi.

Tatalo: Ia matou ola fa'asoa i ou manuia i nisi o mana'omia. **Amene!**

Aso To'ona'i – Novema 21: “O se ‘oa taua i totonu o fagu ‘ele”

Tusi Faitau – 2 Korinito 4: 4-10 *(A treasure in clay jars)*

Matua – f. 7: *“A ua ia te i matou lenei oa i ipu omea, ina ia i le Atua le matua tele o le mana, a e le mai ia te i matou.”*

O fa'amanuiaga uma ua i o tatou lima, o manuia mai le Atua. Ia lē galo fo'i ona tatou fa'afetai i le Atua, ona o lona alofa tunoa e mavae mo i tatou. O mea uma ua tatou maua, ia tatou fa'asoa ma tufa i o tatou tuāoi. E le gata i lea, o mea taua na tatou ole ai i le Atua; ia faia ma le fa'autauta. Aua ma le ola fa'atautala i ona manuia ua ia foa'i mai mo i tatou. O le ala lea o le mativa, pe a fai tatou te fa'atautala i ona manuia ua ia tu'uina mai. Ia fa'afetaia pea le Atua ma lona alofa mai, ona o manuia ua tatou 'ae'ae ai i lenei lalolagi.

Tatalo: Fa'afetai, fa'afetai tele le Atua mo au fa'amanuiaga ua matou tufi taufoa ai i lenei lalolagi. **Amene!**

FAITAUGA I LE TESALONIA 1 & 2

Readings in 1 & 2 Thessalonians

Aso Sā – Novema 22: “O se fa'ata'ita'iga i le 'au fa'atuatua uma”

Tusi Faitau – 1 Tesalonia 1: 1-10 *(An example to all the believers)*

Matua – ff. 2, 3: *“Matou te fa'afetai pea lava i le Atua, ona o outou uma lava, o lo'o ta'uta'ua outou i a matou tatalo, e le aunoa ona matou mānatua i luma o le Atua o lo tatou Tamā lea, la outou galuega i le fa'atuatua, ma le fa'amalosi i le alofa, ma le tumau pea i le fa'amoemoe i lo tatou Ali'i o Iesu Keriso.”*

O le galuega a le Aposetolo o Paulo, na mafai ona fa'aolaina ai agaga o tagata o nu'u 'ese ma fa'amalosia ai lagona o e ua fa'atuatua; ma talitonu i le Atua ma lana Tala Lelei. O le agaga fa'afetai o le Aposetolo, ina ua tumau le fa'atuatua i Tesalonia i le Atua ma lana Tala Lelei e pei ona ia folafola atu. O lea tala fiafia, ua fai ma fe'au o lenei fo'i vaiaso mo le 'au Kerisiano uma o ē ua fa'atuatua i le Atua. O le tatalo, o le aupega sili mo so'o se Kerisiano. E pei ona iai le tatou matua, ona o le nofo tatalo o le 'au fa'atuatua i Tesalonia mo Paulo ma lana galuega tala'i. Ua aumai ai se fa'amanatu taua mo i tatou uma, le taua o le tatalo mo isi tagata. O le galuega lea fa'a Kerisiano, ia tatalo mo isi tagata. Ia tatala la tatou va'ai ma manatua ai nisi, o lo'o feagai ma so'o se

mafatiaga i lenei soifuaga. O le faia o lea mea, ua iloga ai o i tatou o le fanau ua fa'atuatua ma talitonu moni i le Atua soifua.

Tatalo: Ia avea i matou ma fa'ata'ita'iga sili i la le fa'atuatua. **Amene!**

Aso Gafua – Novema 23: “Tala fou fa’afeiloa’i” *(Welcome news)*

Tusi Faitau – 1 Tesalonia 2: 17-3: 13

Matua – f.9: *“Se a fo’i se fa’afetai matou te mafaia ona tu’uina atu i le Atua ona o outou, auā o le olioli uma lava matou te olioli ai i luma o lo tatou Atua ona o outou.”*

O le agaga fa’afetai e tatau i le Atua. O lona alofa tausii mai ua manuia ai la tatou savaliga umi o lenei fo’i tausaga. Lea ua tatou aulia mai le masina 11 ona o lona alofa ma lona agalelei silisili. E ao i le tagata ona lē galo ona vi’ia ma fa’afetaia le Atua, ona o mea uma ua ia faia. O lona alofa tunoa, e tatau ma onomea ia te ia le fa’afetai e lē uma. E lē mavae fo’i lona fa’aali mai i so’o se ala, fa’atasi ai ma mea fou ua mafai ona tatou molimauina. Ia tatou olioli ia te ia e lē aunoa, auā ua ia faia lava mea silisili mo lo tatou ola. O tala fou ia o lona agalelei, ua fa’afouina pea lo tatou malosi lea ua tatou aulia manuia ai le fa’ai’uga o lenei fo’i tausaga i feau ma galuega. Ia tu’uina atu la ia te ia o tatou loto, e fai ma tatou taulaga fa’afetai ona o lona alofa ma lona agalelei i lo tatou ola. Fa’afetai, fa’afetai tele le Atua!

Tatalo: Fa’amanūina lau afio, ona o lou alofa ua silisili lea. **Amene!**

Aso Lua – Novema 24: “O le olaga lelei (1)” *(The good life (1))*

Tusi Faitau – 1 Tesalonia 4: 1-12

Matua – ff. 9, 10: *“A e le aoga ona ou tusi atu ia te outou e uiga i le alofa i le au uso; auā ua a’oa’oina outou lava e le Atua ia fealofani. Auā fo’i ua fa’apea lava ona outou faia i le au uso uma lava o i Maketonia atoa uma. A e matou te apoapoai atu ia te outou le au uso e, ia fa’asilisili pea i ai.”*

O le va fetausia’i lelei o tagata, e iloa ai mafutaga maopoopo. A le lelei le vā feso’ota’i, e faigata ona maua se maopoopoga i mafutaga. Peita’i ua molimauina e Paulo, le fealofani ua tupu pea i le ‘au fa’atuatua i Tsealonia. O le agaga fa’afetai o le Aposetolo, ona o lo’o fa’aauu pea e i latou tala’iga na ia folafola atu. E fa’apea fo’i se fesoasoani mo le Ekalesia, a o tatou aga atu i le Kerisimasi. O a ni mea na ese’ese ai o tatou manatu ma nisi tagata, ia tausii pea le fealofani ina ia maopo-opo tatou mafutaga. Ia tatou alolofa fo’i i nisi o lo’o mafatia ma mana’omia le fesoasoani. O le uiga moni lena o le Kerisimasi, o le fa’amaopopo ma ia fealolofaa’i.

Tatalo: Fa’atupu le nonofo fealofani e maua ai le maopoopoga. **Amene!**

Aso Lulu – Novema 25: “Pouliuli ma le malamalama” *(Darkness and light)*

Tusi Faitau – 1 Tesalonia 4: 13-5: 11

Matua – ff. MT 5: 5-8: *“O tagata o le malamalama outou uma lava, ma tagata o le ao; tatou te le o i le po ma le pouliuli. A o i tatou nei o e o le ao, ia fa’autauta i tatou, ia tatou o’ofu i le ufifatafata o le fa’atuatua ma le alofa, ma le puloutau o le fa’amoemoe i le fa’aolataga.”*

E tutusa le pouliuli ma le malamalama i le silafaga a le Atua. Ua fasino i tatou o le fanau a le malamalama, ona o lona alofa tunoa i lo tatou ola. Na o tatou ola i se lalolagi pouliuli, peita’i o Iesu Keriso o ia o le malamalama i lo tatou ola. Silafia e Paulo nisi o fa’afitauli o lo’i feagai ma le ‘au Kerisiano i Tesalonia, lea na ia toe fa’amanatu ai o i latou o le fanau a le malamalama. E fa’apea fo’i lenei vaitau ua tatou i ai. E i ai taimi ua tatou faia ai mea i le pouliuli, ona ua sesē la tatou fa’amuamua. Peita’i o le fa’amanatu a Paulo, o i tatou ua ola i le ao, ia fa’atuatua ma ia o’ofu i le ufifatafata o le fa’atuatua ma le alofa. O mea ia e iloa ai o i tatou a le fanau a le malamalama. O lo

tatou ola, ua auamaia e le Atua mai le pouliuli ina ua faia e Iesu Keriso le fa'aolataga mo le lalolagi uma.

Tatalo: Vi'ia lau afio le Atua, ona o lou alofa tunoa ua fai ai i matou ma fanau o le malamalama ina ua e fa'aolaina mai le pouliuli. **Amene!**

Aso Tofi – Novema 26: “O le olaga lelei (2)” (*The good life (2)*)

Tusi Faitau – 1 Tesalonia 5: 12-28

Matua – ff. 16, 18: *“Ia outou saga olioli pea lava; ia tatalo e le aunoa; ia outou fa'afetai i mea uma lava, auā o le finagalo lea o le Atua ia te outou, ia Keriso Iesu.”*

Ua tatou i ai i le vaitau o faiga meaalofa, ma mafutaga fesaga'i i totonu o tatou aiga. Lea fo'i ua tali le alofa o le Atua i lo tatou ola, ma la tatou savaliga o lenei fo'i tausaga. Ina ua a'e manuia faiva ma tiute, sa feagai ai ma i tatou o lana fanau. E ui i le tele o lu'itau ese'ese na feagai ai ma i tatou, a e ua lē avea ia mea ma ala e liliu ai lona alofa mai i lo tatou ola. Ia fa'afo'i pea i le Atua lona lava vi'iga, ona ua tatou manuia i lana leoleoga ma lana tausiga. Fa'afetai ai i le Atua, ona o lona alofa e lē aunoa i lo tatou ola i aso uma.

Tatalo: Fa'afetai i lou alofa ma lou agalelei, ua matou manuia ai. **Amene!**

Aso Faraile – Novema 27: “Pepelo, pepelo uma” (*Lies, all lies*)

Tusi Faitau – 2 Tesalonia 2: 1-12

Matua – ff. 1, 3: *“O lenei, matou te aioi atu ia te outou, le au uso e, e uiga i le afio mai o lo tatou Ali'i o Iesu Keriso, ma lo tatou fa'apotopotoina ia te ia; ina ne'i vave luluina o outou loto, pe fa'aatuavaleina i se agaga, po o se upu, po o se tusi, peiseai nai ia i matou, peiseai ua o'o mai le aso o le Ali'i. Aua ne'i fa'asese se tasi ia te outou i se togafiti e tasi; auā e le o'o mai lena aso, seia mua'i ona taunu'u o le tete'a ese, ma ia fa'aalia mai o le tagata o le amio leaga, o le tagata lea o le malaia.”*

O le tusi lona 2 a Paulo i Tesalonia, e lē faigofie ona malamalama i ai le 'au faitau. O lo'o fa'atalanoaina ai nisi o fesili e sili ona faigata, ae fa'avae i le fa'atuatua Kerisiano. O le ā le amioleaga? O le ā le ese'esega ua faia e le satauro o Keriso i le lalolagi? O le ā ma o afea le aso o le Ali'i? E ese'ese tali a tagata, ae o le mea moni tatou te le iloa. O le taimi nei ma le lumana'i, o lo'o i 'a'ao o le Atua. O lo'o fa'aauau pea fo'i ona i ai le amioleaga i le lalolagi. Na fa'aumatia lena mea i luga o le satauro, i le fa'aolataga na saunia e Iesu Keriso. O le amioleaga, e taumafai e vavae'ese mai tatou ma le mafutaga ma le Atua. O lona uiga, e mafai ona tatou filifili e fa'atumauina pea le mafutaga ma le Atua, a e tu'u'ese le amioleaga. Pau le ta galuega, ia fa'alagolago ma fa'atuatua i le Atua, e tali mai i le aso ma lona taimi tatau mo i tatou.

Tatalo: Le Ali'i e, puipui ma lavea'i mai i matou mai le fili ma faigata o le lalolagi nei. **Amene!**

Aso To'ona'i – Novema 28: “Galuega ma le paiē” (*Work and idleness*)

Tusi Faitau – 2 Tesalonia 3: 6-18

Matua – ff. 7e, 8: *“Auā sa matou le amio fa'atalanoa ina o ia te outou. Matou te le'i a'ai fua fo'i se mea e 'ai a se tasi, a ua matou galulue i le galuega mamafa ma le tiga i le po ma le ao, ina ne'i mafatia so outou.”*

I lenei fuaiupu, ua fa'amanatu atu ai e Paulo i tagata Tesalonia, e le'i lagona se paie o ia ma ana uo faigaluega a o latou i ai i Tesalonia. Ua ia aioi atu i tagata Tesalonia, ina ia fa'ata'ita'i i ana uo faigaluega ma ia lava i le taimi a'o ia i latou i le galuega. Atonu o nisi o tagata o le ekalesia i Tesalonia, na manatu e tatau ona latou tu'ua a latou galuega, ma nonofo filemu, ma fa'atalitali mo le toe afio mai o le Alii. O amioga a Paulo, sa matua ese lava mai le ola paie ma le augata. Sa ofoina lona ola e galue mo le galuega

a le Atua, ia a o faatalitali mo le toe afio mai o le Ali'i. E i ai taimi e lagona ai fo'i lo tatou vaivai, ona tatou fa'atuana'i lea o le galuega a le Atua ua tatou galulue ai. Peita'i o le fa'amanatu a Paulo, ia le na'o le fa'atalitali i le Ali'i, a e ia faia galuega ma fa'atalitali i lona toe afio mai. O i'ina, e iloga ai o i tatou o so'o moni o le Tala Lelei.

Tatalo: Ia e fa'atupu le augofie i o matou loto, ina ia matou galulue fiafia ai mo lau galuega ma lau Tala Lelei. **Amene!**

FA'AILOGA O LE ATIVENI – Symbols of Advent

1 Na valoia mai i aso anamua (*1 Foreshadowed from ancient times*)

Aso Sā – Novema 29: “Aperaamo ma Isaako” (*Abraham and Isaac*)

Tusi Faitau – Kenese 22: 1-19

Matua – ff. 8a, 17a: *“Ona tali mai lea o Aperaamo, Lo’u atali’i e, e au mai e le Atua se tama’i mamoe māna e fai a’i le taulaga mu; o le mea lea ou te matuā fa’amanuia ai ia te oe, ma ou matuā fa’ato’ateleina lava lau fanau e pei o fetu o le lagi, e pei o le oneone fo’i i le matafaga.”*

Ua iloga Apera’amo ma ona tala i le Tusi Paia, ona o lona fa’atuatua ua moni i le Atua. O le malelega a le Atua, na te ave lona atali’i e osi ai le taulaga i le Atua. Na te le’i fesiligia le Atua ma lona fetalai mai, a e na ia tula’i ma ave lona atali’i e to’atasi. O upu ua fai ma matua, ua iloga ai se fa’atuatua uiga ‘ese. E ui ina pele ia te ia lona atali’i, a e ua ia faia lava le finagalo o le Atua. A o le tau i lona fa’atuatua, ua laveai’ia ai lona atali’i ma ua fa’ato’ateleina ai lana fanau ona o lona usita’i i le Atua. Ua fai lea tala ma a’oa’oga taua mo i tatou i lenei fo’i vaitau. E iai taimi e vala’auina ai i tatou e le Atua i le faia o lona finagalo, peita’i ua tatou lē manatu mamafa i ai. O nisi fo’i o taimi ua tatou fa’agalo mea taua, a e ua fa’amalie muamua o tatou mana’o. Ia ave la ta fa’amuamua i mea e tatau i ai le fa’amuamua. O a lava fo’i tofiga ua vala’auina ai tatou, ia faia ma le fa’atuatua i le Atua. O ia, na te tauia lo tatou tautiga.

Tatalo: Ia e fa’atupuina pea le fa’atuatua ia i matou, ina ia matou faia ai lou finagalo u vala’auina ai matou. **Amene!**

Aso Gafua – Novema 30: “Ua ou sau i lalo” (*I have come down*)

Tusi Faitau – Esoto 3: 7-14

Matua – ff. 13, 14a: *“Ua fai atu Mose i le Atua, Fa’auta, pe a a’u alu i le fanauga a Isaraelu, ma a’u fai atu ia i latou, Ua auina mai a’u ia te outou e le Atua o outou tamā; ona latou fai mai lea ia te a’u, O ai ea lona suafa? Se a ea sa’u e fai atu ai ia i latou? Ona fetalai mai lea o le Atua ia Mose, O A’U O LE OLA, O LO’O OLA LAVA.”*

Ina ua faailoa mai e le Atua O A’U O LE OLA, O LO’O OLA LAVA, na Ia fetalai mai, e tusa lava po o afea pe o fea fo’i, o loo i ai o Ia i so’o se mea. E tutusa lava ma le faaupuga o le Feagaiga Fou i le Faaaliga 1:8, *“O a’u nei o le Alefa ma le Omeka,’ ua fetalai mai ai le Alii le Atua, o loo i ai, o le na soifua, o le a afio mai, o le Silisiliese.”* O A’U o lo’o folafola atu e fa’asa’olotoina i latou, ma e mafai ona latou fa’alagolago ia te Ia! O le Atua ua afio mai e fai ma fa’aolataga mo Isaraelu. E pei o lona finagalo na fa’aali ia Mose, na te alu e aumai lona nu’u. O le fa’atonuga o lo’o i ai le mana silisili’ese o le Atua ma le fa’amoemoe ola mo le tagata. Aua ‘O A’U O LE OLA, O LO’O OLA LAVA.’

Tatalo: Ia e fa’atupu le loto tele ia i matou, e feagai ai ma taimi e lagona ai lo matou le mautonu ona o mea e tutupu i lo matou ola. **Amene!**

Aso Lua – Tesema 1: “Alofa mausalī” (*Steadfast love*)

Tusi Faitau – Auega 3: 21-30

Matua – ff. 22, 24: *“O le alofa o le Ali’i ua le fa’aumatia ai i tatou, ona ua le mavae o lona alofa mutimutivale; e fou mai ia i taeao uma; e tele lou fa’amaoni. Ua fa’apea ifo lo’u loto, O lo’u tofi o le Ali’i lea, o le mea lea ou te fa’amoemoe ai ia te ia.”*

O le alofa o le Atua, e silisili lea i lo tatou ola. E pei ona i ai le talitonuga o tagata Samoa i le upu ALOFA. O lona uiga, o itu e 4 o le fale, o lo’o fealoaloa’i. O le fa’ailoga o le alofa ua maopopo i totonu o so’o se mafutaga, a e maise lava i totonu o tatou aiga. E fa’apea fo’i le alofa o le Atua ua fa’aalia i lo tatou ola i aso uma. Ua tatou i ai i le vaitau o suiga fou o le olaga, i le tele o mea e tutupu ma ua a’afia ai lo tatou ola. Peita’i, e ui i suiga fou o le ola ua o’o mai; e le’o suia ai le alofa ma le agalelei tele o le Atua ia i tatou. O lo’o fou pea lona fa’aali mai i le tatou ola i aso uma. Tatou te lagonaina fo’i lona mafanafana ma lona filemu i taimi e fesouaina ai i tatou i fa’afitauli o le ola. Ia tumau pea lo tatou talitonu i le Atua, na te fesoasoani i o tatou mafatiaga i aso uma. Ona tatou lagonaina lea o mea fou ua ia faia mo lo tatou ola.

Tatalo: Ia e fesoasoani mai i taimi o matou mafatiaga, ina ia matou lagonaina mea fou ua e faia i lo matou ola. **Amene!**

Aso Lulu – Tesema 2: “O le leoleo mamoe lelei” *(The good shepherd)*

Tusi Faitau – Esekielu 34: 20-31

Matua – ff. 23, 24: *“Ou te fa’atuina fo’i le leoleo mamoe e tasi ia te i latou, na te fagaina i latou, o la’u auuana o Tavita; o ia na te fagaina i latou, e fai fo’i o ia ma leoleo mamoe ia te i latou; o a’u nei fo’i o le Ali’i e fai a’u mo latou Atua, o la’u auuana fo’i o Tavita e fai o ia ma ali’i sili ia te i latou; o a’u o le Ali’i ua ou fai atu ai.”*

O le avea ma leoleo mamoe, o se galuega e lē faigofie lona fa’atinoina. Na filifilia Tavita e fai ma ta’ita’i o Isaraelu, e tusa ai ma le finagalo o le Atua. O Tavita, o le atali’i ia o Iese le sa leoleo mamoe a lona tamā. Ua lava lona tomā i le galuega leoleo lafu mamoe. O le finagalo o le Atua, lea fo’i na avea ai o ia ma ta’ita’i mo Isaraelu. Na te fagaina lona nu’u, ma ia puipui lo latou ola mai le fili. O le tala o lenei aso, o se fa’amanatu mo tatou uma o le ‘au Kerisiano. O le avea ma ta’ita’i, o se tofiga e agava’a ai tagata uma. Fa’apei o Tavita, e ui na i ai ona vaivaiga; a e na filifilia lava e le Atua e fai ma tupu. O le Atua ma ana tofiga, e silasila le Atua i o tatou loto. O a lava fo’i tofiga ua vala’auina ai tatou, ia faia ma le loto atu i le Atua. O Iesu Keriso, o ia o le leoleo mamoe lelei, na te tausia mamoe ma ia mautinoa lo latou saogalemu.

Tatalo: Ia fai i matou ma leoleo mamoe lelei, ina ia atagia ai lou soifua i le olaga nei. **Amene!**

Aso Tofi – Tesema 3: “Pule, mamalu ma pulega tupu”

Tusi Faitau – Tanielu 7: 9-10; 13-14 *(Dominion, glory and kingship)*

Matua – ff. 13e, 14a: *“Ua afio mai i ao o le lagi Lē e pei o le Atali’i o le tagata. Ua foai’ina atu ia te ia le pule, ma le vi’iga, ma le mālō, ina ia auuana ia te ia o nu’u uma, ma atu nu’u, ma gagana ese’ese.”*

O le afio mai o Keriso i le lalolagi, na ia momoli mai le malamalama ma le finagalo alofa o lona tama. O lona malosi’aga tele, na fa’alagolago lea i le Atua, ina ia manino ai le va’ai a le tagata i lona afio mai. O le ua afio mai i ao o le lagi, na afio mai fo’i o ia ma le pule, ma le vi’iga, ma le malo; ina ia auuana ia te ia o nu’u uma ma atunu’u uma o le lalolagi. E le gata i lea, na ia faia galuega alofa mo tagata uma o lo’o feagai pea ma mafatiaga o le ola. O lona afio mai, na ia faia ai le finagalo alofa o lona tama e pei ona auina mai ai o ia i le lalolagi nei.

Tatalo: Fa’afetai Iesu mo lou alofa fesoasoani mo i matou. **Amene!**

Aso Faraile – Tesema 4: “Savali i le malamalama o le Ali’i”

Tusi Faitau – Isaia 2: 2-5 (*Walk in the light of the Lord*)

Matua – ff. 2, 5: *“O aso e gata ai, e o’o ina fa’atumauiina ai o le mauga o i ai le fale o le Ali’i i tumutumu o atu mauga, e fa’amaualugaina fo’i e sili i mauga, ona gasolo ane ai lea o nu’u uma i ai. Le aiga o Iakopo e, omai ia ina tatou savavali i le malamalama o le Ali’i.”*

O le “savali i le malamalama” o se fa’atusa masani i le aganu’u Kerisiano. E masani ona fa’auigaina o le faia o le mea sa’o po’o le ola i se olaga mama. Peita’i i le Tusi Pa’ia, o le fuaitau o lo’o i ai le manatu o le tu’ua o le agasala e ala i le mulimuli ia Iesu. I le Feagaiga Fou, o le “savali i le malamalama” e feso’ota’i tonu lava ma le mulimuli ia Iesu, o lē na fetalai, “O a’u nei o le malamalama o le lalolagi. O lē mulimuli mai ia te a’u, e lē savali o ia i le pouliuli, a e ia te ia le malamalama o le ola” (Ioane 8:12). E ui e lē o fai sa’o mai lenei fuaiupu, “Savali i le malalama-lama, o lona uiga, o Iesu,” ae o loo lapata’i sa’o mai e uiga i le faia o le mea sa’o. O le mea lea, o i latou uma ua mulimuli ia Iesu, o loo “savavali i le malamalama.”

Tatalo: Iesu e le Ali’i o le malamalama, fa’atonu mai ou ala e tatau ona matou savavali i ai. **Amene!**

Aso To’ona’i – Tesema 5: “O le Atua o lo’u fa’aolataga” (*God is my salvation*)

Tusi Faitau – Isaia 12: 1-6

Matua – ff. 4, 5: *“O lea aso fo’i tou te fa’apea atu ai, ia outou vivi’i atu i le Ali’i, ina vala’au atu ia i lona suafa; ia outou fa’ailoa atu i nu’u o ana galuega; ia outou ta’uta’u atu ua vi’ia lona suafa. Pepese atu ia i le Ali’i, auā ua faia e ia mea silisili ese’ ina fa’ailoa atu ia o lea mea i le lalolagi.”*

I le aso e faatuina ai e lo latou tupu, le Mesia, Lana pule i le lalolagi atoa, o le a latou tautino atu ma le olioli le faafetai ia te Ia. O le a latou olioli foi i Lana faaolataga alofa (**Isaia 12:3**). O lea ua ia faamamafa mai ai o le a latou liliu atu foi ma folafola atu Lona viiga i luma o le lalolagi. O le a latou valaau atu i tagata uma e auai faatasi ma i latou. O le a le nanaina e le nuu o le Alii la latou tapuaiga; o le a latou mananao i le lalolagi e auai faatasi ma vivii atu i le suafa o le Atua. O le uiga lea o so’o se Kerisiano ua fa’atuatua i le Atua, ia le aunoa ona fa’afetaia le Atua ona o lona alofa tunoa. Ua fai o ia ma o tatou mapusaga o le na faia le fa’aolataga mo i tatou uma.

Tatalo: Fa’afetai i lau Afio ona o Iesu lo matou Fa’aola. **Amene!**

FA’AILOGA O LE ATIVENI – Symbols of Advent

2. Upu a le perofeta (*2 Words of the prophet*)

Aso Sā – Tesema 6: “O le a afio mai o ia” (*He will come*)

Tusi Faitau – Isaia 35: 1-10

Matua – ff. 3, 4: *“Ia outou fa’amalosi i lima ua gagase, ia outou fa’amalosi fo’i i tulivae ua vaivai. Fai atu ia i e ua loto vaivai, ia outou fa’amalolosi, aua tou te fefefe; fa’auta, o lo outou Atua; o le a o’o mai le taui ma sui, o le taui lava mai le Atua; e afio mai lava o ia ma fa’aola ia te outou.”*

O valo’aga a Perofeta e uiga i le Mesia, o ia o le ua afio mai e fa’aola i le lalolagi uma. O le fa’aolataga ua ia saunia ma le so’otaga mausali o tagata uma ua fa’atuatua iā te ia. O lana galuega fa’aola mo tagata uma, a o lona finagalo alofa lea o le Atua. Le totonugalemu lea ma le atoaga o lona afio mai, ina ia fa’aolaina le lalolagi uma mai le agasala. Auā ua ua fa’apea lava ona alofa mai o le Atua i le lalolagi, na ia aumai ai lona atali’i pele to’atasi; ina ia lē fano se tasi e fa’atuatua iā te ia, a ia maua le ola e fa’avavau.

Tatalo: Iesu Keriso e, fa’afetai tele i le taulaga na e afio mai e fa’atino mo le lalolagi ina ia fa’aolaina i matou uma. **Amene!**

Aso Gafua – Tesema 7: “O lou Atua lenei” (*Here is your God*)

Tusi Faitau – Isaia 40: 1-11

Matua – f. 9: *“Alu ae i le mauga maualuga, o oe lē au mai le tala lelei ia Siona; ia matuā leo tele, o oe lē au mai le tala lelei ia Ierusalem; ia leo tele, aua le fefe; fai atu i a’ai o Iuta, Fa’auta i lo outou Atua.”*

O tala o le afio mai o le Keriso, le fa’aola o le lalolagi uma. O valo’aga a Perofeta anamua, e uiga le afio mai o le Mesia. O le Atua ua liutino tagata e ala ia Iesu Keriso, o le afio mai e mafuta ma le tagata i le lalolagi. O lo tatou Atua o le ua afio mai. E pei ona i ai upu o le tatou matua, ua auala mai i ana auauna lona finagalo, ina ia fa’ailoa i le lalolagi uma lona afio mai. O ia o le Atua, o le aumaia le Tala Lelei ma le fa’aolataga mo tagata uma.

Tatalo: Vi’ia lau Afio le Atua, ina ua e afio mai i le lalolagi. **Amene!**

Aso Lua – Tesema 8: “O lē ua ou filifilia” (*My chosen*)

Tusi Faitau – Isaia 42: 1-4

Matua – f. 1: *“Fa’auta i la’u auauna, ou te taofia o ia i luga; o le na a’u filifilia ua fiafia i ai lo’u loto; ua ou tu’uina atu lo’u Agaga i ona luga; na te avatua le fa’amasinoga mo nu’u ese.”*

Ua tatou i ai i le masina mulimuli o lenei tausaga. Ua fa’ai’u fo’i galuega ma faiva ese’ese na feagai ma i tatou. Ua tatou savalia fo’i le masina o le aso soifua o lo tatou Ali’i o Iesu Keriso. O le ua filifilia e le Atua, e momoli mai lona finagalo alofa mo le lalolagi. O le tama o le filemu, o le fai ma fa’aolataga mo tagata uma. O lona afio mai, na te tatala noanoataga o lo’o saisaitia ai le tagata ona o mea e tutupu i le lalolagi. O ia fo’i na te faia le fa’amasinoga mo nu’u 'ese, o i latou ua fesiligia le Atua ma lona finagalo. O Iesu Keriso, o ia o le sui va’aia o le Atua i le lalolagi. Ua ia te ia fo’i le pule silisili, e na te faia ai so’o se mea e tusa ma le finagalo o lo tatou Atua.

Tatalo: Famanuina lau afio ona o Iesu lo matou fa’aola ua e aumaia. **Amene!**

Aso Lulu – Tesema 9: “O la’u auauna” (*My servant*)

Tusi Faitau – Isaia 49: 1-3

Matua – f. 1: *“Fa’alogo mai ia ia te a’u, outou nu’u tu matafaga e; ua’i mai ia o outou taliga outou nu’u mamao e; ua vala’auina a’u e le Ali’i talu mai le manava; ua na ta’ua lo’u igoa talu mai le manava o lo’u tinā.”*

E le’i afio mai Iesu e fa’amasino i le lalolagi. O lona afio mai, na ia tatala ai noataga o faigata o feagai ma le tagata. E ui o ia o le Mesia, ae na fai o ia ma auauna i tagata o lo’o mana’omia le fesoasoani. O lona alofa tunoa, na i loga ai le uiga moni o le finagalo o le Atua. Na fai o ia ma auauna fa’amaoni i le Atua ma le talai’ina o lona finagalo. Lona alofa lea ua toe maua ai le tataou mafutaga ma le Atua, i lona mālō e fa’avavau. E ui ina tulaga maualalo le avea ma auauna atu i nisi, peita’i na savalia lava e Iesu ina ia ta maua le ola atālī. Ia avea i tatou ma auauna i isi, ina ia atagia ai le soifuaga o Keriso.

Tatalo: Ia fai i matou ma auauna i isi, e pei ona faata’ita’i mai e Iesu. **Amene!**

Aso Tofi – Tesema 10: “O le toe afio mai o le Ali’i” (*The return of the Lord*)

Tusi Faitau – Isaia 52: 7-10

Matua – f. 7: *“E matuā matagofie i luga o mauga o vae o le ua fai mai le tala lelei, o lē logologo mai le manuia, ua tala mai le tala lelei; ua fa’ailoa mai le olataga; ua fai mai ia Siona, O lo’o pule le Atua.”*

Sa faaaogā e Isaia se gagana fa’afatusolo e fa’amatala ai vae o e avefe’au i le matagofie pe manaia fo’i. O le upu matagofie, e tauaveina le manatu o le fuga o le fugala’au i le taeao po. Sa malolosi nei vae ma osooso i luga o mauga o Ierusalem, i

le saosasoa e pei o tama'i 'aila (*Pese a Solomona 2:17; 8:14*). O le matagofie o vae, e fa'amamafa ai le vave o le sau o le avefe'au e uiga i lana Tala Lelei. O se va'aiga matagofie na matuā ofoofogia mo luta, le va'aia o nei vae o taufetuli atu ia i latou i luga o mauga! O nei vae na tauaveina ni avefeau o tala lelei o le olioli, o folafola atu le filemu, le fa'aolataga ma le fa'asilasilaga o le pule aoao a le Atua!

Tatalo: Ia fa'aaogaina o matou vae, ma ave fe'au e tala'i atu lau Tala Lelei i le lalolagi uma. **Amene!**

Aso Faraile – Tesema 11: “Mo a tatou solitulafono” (*For our transgressions*)

Tusi Faitau – Isaia 53: 1-12

Matua – f. 6: *“O i tatou uma ua sē i tatou e pei o mamoe, ua ta'itasi ma fa'asaga i lona lava ala; a ua fa'ao'o ia te ia e le Ali'i le amio leaga o i tatou uma.”*

I le totonugalemu o se tasi o fuaitau sili ona matagofie ma aumaia ai le fa'amoemoe e uiga i le Mesia, o lo'o i ai le fa'amatalaga e fa'asalaina ai tagata uma e fa'apea, "ua sē i tatou uma e pei o mamoe." E pei o mamoe ua tatou liliu uma lava i o tatou lava ala, nai lo le mulimuli fa'amaoni i lo tatou Leoleo Mamoe. Ona o lea vaivaiga tele, ua tatou mana'omia ai se Fa'aola, ma i le alofa tunoa o le Atua ua totogi ai e Keriso le sala mo a tatou agasalsa. E ui ina se 'ese i tatou mai lo tatou mulimuli atu i lo tatou leoleo mamoe lelei, o lo'o tumau pea le alofa taumulimuli o lo tatou leoleo mamoe ia i tatou uma.

Tatalo: Fa'afetai tele le Atua, ina ua e le tu'ulafoa'i lo matou ola a e ua e sa'ili mai pea e ala ia Iesu Keriso. **Amene!**

Aso To'ona'i – Tesema 12: “O le afi a le tagata fa'amamā” (*The refiner's fire*)

Tusi Faitau – Malaki 3: 1-4

Matua – f. 3: *“E nofo o ia, o lē tunu ma fa'amamā i le ario; na te fa'amamāina le fanauga a Levi, na te fa'ate'a ese fo'i le ele'ele ia te i latou e pei o le auro ma le ario; latou te avatu ai i le Ali'i le taulaga e fai i le amiotonu.”*

O le afi a le tagata fa'amama, o le faiga lea e fa'aaogaina e aveese ai mea leaga mai u'amea taua. O le vevela e mana'omia e fa'amalū ai le siliva ma le auro, e lava lea e fa'aumatia ai isi meafaitino, o le metotia lea e fa'aaogaina e gaosia ai ni u'amea e sili atu ona mama. O i'inei o lo'o fa'aaogaina ai lena fa'ata'ita'iga, i le faiva o ositaulaga a Isaraelu. Sa tuuina atu i le ituaiga o Levi le tiute e tausia le malumalu, ma e na o Levi e mafai ona avea ma faitaulaga. Peita'i, e le'i atoa lo latou auauanga i le Atua. Ua finagalo ai le Atua, o le a fa'amamaina i latou i le afi. Ina ia fufulueseina ai mea ua ele'elea ma ia fa'amamaina ai i latou.

Tatalo: Ia e alofa ma fa'amamaina ni mea ua ela ai la matou auauanga i lau afio ma lau galuega. **Amene!**

O FA'AILOGA E FAASINO IA KERISO

Ssymbols pointing to Christ

Aso Sā – Tesema 13: “Le Poto” (*O Wisdom*)

Tusi Faitau – 1 Korinito 1: 26-31

Matua – ff. 30, 31: *“Ua afua mai ia te ia lo outou ola ia Keriso Iesu, o le ua tu'uina mai e le Atua e fai mo tatou poto, o lo tatou amiotonu ia; o le ua fa'apaiaina mai; o lo tatou togiola fo'i ia: ina ia fa'apei ona tusia, O le mitamita, ia mitamita o ia i le Ali'i.”*

O le poto o la le Ali'i ia. O Iesu le Mesia na valo'ia, o ia o le poto o le lalolagi. O lona afio, ina ia matala le tatou va'ai ma ia o tatou malamalama i le uiga moni o le finagalo o lona Tamā. E pei o le fa'amanatu a le Aposetolo i Korinito o e ua fa'atuatua, ua

tu'uina mai Iesu Keriso e fai mo tatou potō; o lo tatou amiotonu ia. O le ua fa'apa'iaina mai, o lo tatou toggiola fo'i ia; o le mitamita ia mitamita ia i le Ali'i. O Iesu le Mesia, o le na faia le fa'aolataga mo le lalolagi uma. Ia tatou mitamita i le Ali'i, ma ia tatou fa'ailoa atu lona alofa tunoa i le lalolagi uma e ala i Iesu Keriso. Ia fai o ia ma fa'avae o le potō ua tatou maua.

Tatalo: Fa'afetai le Atua, i le potō ma le atamai ua e foa'i ia i matou ua faigofie ai le fa'atinoina o matou galuega. **Amene!**

Aso Gafua – Tesema 14: “Le Ali'i” (O Adonai)

Tusi Faitau – Esoto 3: 1-6

Matua – f. 6: *“Ua ia fa'apea mai fo'i, O a'u o le Atua o lou tamā, o le Atua o Aperamo, o le Atua o Isaako, o le Atua fo'i o Iakopo. Ona ufitia lea e Mose o ona mata, auā ua fefe i va'ai atu i le Atua.”*

O lea feagaiga o lo'o tau'ave mai pea i nei ona aso. O le Atua na osi feagaiga ma Isaraelu i le amataga. E pei ona fa'aali le Atua ia Mose i le la'au talatala, na lagona ai e Mose lona fefe e va'ai atu i le Atua. A o lea fa'aaliga na ia vala'auina ai Mose e alu e aumai lona nu'u mai Aikupito. O lo latou fa'aolataga e auala mai i lana auuina, o le na fai ma o latou ta'ita'i. O le Atua o latou tama, o le Atua ia o Aperamo, o le Atua o Isaako, ma le Atua fo'i o Iakopo. O lea fe'au o le Tala Lelei, o lo'o aoga pea i aso uma o lo tatou ola. E iai taimi e fesouaina ai i tatou i faigata ma lu'itau o le ola, ona lagona ai lea o le fefe ma le maotonu. A e peita'i, o le Ali'i lo tatou Atua na te le'o tu'ulagoai'ina lo tatou ola. O lo'o i ai pea o ia ma i tatou uma i la tatou savaliga i lenei lalolagi.

Tatalo: Vi'ia lau Afio, ona o lou alofa mai mo i matou o lau fanau. **Amene!**

Aso Lua – Tesema 15: “Tupu'aga o Iese” (O Root of Jesse)

Tusi Faitau – Isaia 11: 1-10

Matua – ff. 1, 2, 3a: *“A e tupu mai le la'au i le pogai o Iese, e tupu a'e fo'i le tatupu i ona a'a. E afio mau ia te ia le Agaga o le Ali'i; o le Agaga o le potō ma le mafau'au; o le agaga o le fa'atonuga ma le malos; o le Agaga o le malamalama ma le mata'u i le Ali'i. E fiafia fo'i o ia i le mata'u i le Ali'i.”*

O Iese o tama ia o Tavita, o le gafa lea o lo tatou Ali'i o Iesu Keriso. E 3 ni mea taua o lo'o aumaia i le matua o lenei aso. Muamua, o le Agaga o le potō ma le mafau'au. O le ata o le fa'aolataga na saunia e le Atua, na auala mai i le aiga o Tavita. O lana fa'atofala'iga, e ui mai i se ala e maualalo. Lona lua, o le agaga o le fa'atonuga ma le malos. O lona malos silisili 'ese, o lana lea pule aoao i le tagata ma le lalolagi uma. Ua ia te lava le fa'asinoga mo le tagata ua fa'atuatua ia te ia. Lona tolu, o le malamalama ma le mata'u i le Ali'i. O Iesu Keriso o lo tatou malamalama ia. O le mata'u fo'i i le Atua, o le amataga lea i mea lelei uma. Ua tupu mai i le aiga o Iese le gafa o le Atua ma ua fai ma fa'asinomaga i le lalolagi. Ua fa'apea fo'i ona aofia ai tagata uma i lona alofa tunoa, ma ua ave ai i tatou ma suli o le aiga o le Atua.

Tatalo: Vi'ia oe Tama ina ua fai i matou ma suli i la le fa'atuatua. **Amene!**

Aso Lulu – Tesema 16: “Le Ki a Tavita” (O Key of David)

Tusi Faitau – Luka 1: 68-79

Matua – ff. 78, 79: *“Ona ua mutimutivale le alofa o lo tatou Atua, ua asiasi mai ai le malamalama mai luga, e fa'amalamalama ai i e nonofo i le pouliuli ma le ata o le oti, e ta'ita'i i o tatou vae i le ala o le manuia.”*

O le alofa o le Atua ua fa'asafua lea moe tagata uma. Ua tatou talia le fanau mai o le pepe o le Kerisimasi, o le fa'ailoga o le Atua ua alofa mai. O lona alofa mutimutivale, ua ia asiasi mai ai i le tagata. O le tama o le fanau mai, e na te tatala noataga o faigata

o lo'o feagai pea ma le tagata i aso uma. O le Ali'i ia o le filemu, ua i lona ua fo'i le mālō ma le malosilisi 'ese. O lona fa'amoemoe, ina ia manino le tatou va'i i manuia o le Atua mo tatou i le lumana'i.

Tatalo: Vi'ia lau afio ona o lou alofa mutimutivale. **Amene!**

Aso Tofi – Tesema 17: “Le Tautotogo o le taeao” (*O Dayspring*)

Tusi Faitau – Isaia 9: 2-7

Matua – f. 2: *“O le nu'u sa savavali i le pouliuli, ua latou iloa le malamalama tele; o e sa nonofo i le nu'u o le ata o le oti, ua pupula mai ia te i latou le malamalama.”*

O lenei fuaiupu o lo'o fa'amatalaina ai le suiga i le lumana'i. O lo'o ta'ua e Isaia nei mea na tutupu i le tuana'i, e ui lava o le a le tutupu se'ia o'o ina afio mai Iesu le Mesia. O le a fa'amanoinoina i le Feagaiga Fou, o le malamalama na afio mai ai Iesu e momoli mai i le lalolagi. O i latou o lo'o nonofo i Isaraelu i le taimi lea, o le a latou molimauina le faia'ina o le pouliuli i lona malamalama tele. O nisi o le a filifilia pea le pouliuli: “O le fa'amasinoga fo'i lenei, ua oo mai le malamalama i le lalolagi, a ua sili lo latou fiafia i le pouliuli i lo le malamalama, auā e leaga a latou amio. Auā o i latou uma o ē fai mea leaga e 'ino'ino i le malamalama, e lē o mai fo'i i le malamalama, ne'i fa'a'iloa a latou amio. A o lē fai mea moni e sau i le malamalama, ina ia fa'aalia manino ai ua faia ana galuega i le Atua.”

Tatalo: Lo matou tama e o i le lagi, ia avea i matou ma fanau e fiafia i le malamalama a e le'o le pouliuli. **Amene!**

Aso Faraile – Tesema 18: “Le Tupu o Atunu'u” (*O King of the Nations*)

Tusi Faitau – Efeso 2: 14-20

Matua – ff. 19, 20: *“O lenei, e le toe tagata ese outou, po o e ua āumau, a ua nu'u fa'atasi ma le au paia, o le aiga fo'i o le Atua; o lo'o ua ati'ina a'e i luga o le fa'avae o le 'au apositolo, atoa ma le 'au perofeta, o le ma'a tulimanu o Keriso Iesu lava lea.”*

Ua ofoina mai e Paulo ni mea le lelei se lua e tutusa ma ni mea lelei se lua i lenei fuaiupu. A o le'i o'o i le Mesia, o ē na faitau i le tusi a Paulo e uiga i Nu'u Ese, sa le iloa i latou lava. Sa leai so latou so'otaga ma le Atua, auā ua oti i latou i la le agaga, ma e le o se vaega o lona nu'u filifilia o Isaraelu. O nei mea sese, sa mafai ona suia i fa'amanuiaga i le taimi o le fa'aolataga. O tagatanuu o se atunu'u, e iai a latou aia tatau ma fa'amanuiaga e lē maua e tagata e lē o ni tagatanu'u. E mafai ona fanau mai se tagata o se tagatanu'u pe mafai foi ona maua se tagatanu'u i se tau. E ala i le fa'aolataga ia Iesu, o nei tagata o Nu'u Ese ua avea nei ma tagatanu'u i le aiga o le Atua. Lua, ua avea nei i latou ma tagata o le aiga. E ui o le upu Eleni mo le aiga e mafai ona fa'asino i tagata o le aiga ma auaua o le aiga a e o le taula'iga, o le avea ma se tagata taua o le aiga. O tagata o Nu'u Ese ua fa'aolaina, ua avea nei ma tagatanu'u aloaia o le malo o le Atua; ma o ni tagata o lona aiga e tutusa ma isi tagata ua fa'atuatua ia te ia.

Tatalo: Vi'ia oe tama, ina ua avea i matou o tagata nu'u ma tagata o le li'o i lou aiga o le 'au fa'atuatua. **Amene!**

Aso To'ona'i – Tesema 19: “Le Emanuel” (*O Emmanuel*)

Tusi Faitau – Isaia 7: 10-17

Matua – f. 14: *“O le mea lea e tu'uina mai e le Ali'i lava le fa'a'iloa ia te outou; fa'auta, e to le taupou; ma fanau mai se tama tane; na te fa'aigoa fo'i ia te ia o Emanuelu.”*

O le finagalo faito'atasi o le Atua, ua ala mai lea ia Maria ina ia fai ma tinā o le Mesia, Le Emanuelu. Ua ia te i tatou le Ali'i! O le pepe o le Kerisimasi, ua fai lea ma fa'a'iloa i tausaga uma i le vā o le lagi ma le lalolagi. O le meaalofa sili a le lagi, ua tōina mo le lalolagi. A o se aso ua fai ma fa'amanatu i totonu o mafutaga, ina ia omai

fa'atasi e olioli i lona fanau mai. O faiga a le Atua i le vā feagai ma le tagata, na ia fa'aalia ai lona alofa tunoa tele mo i tatou uma. O Iesu Keriso le Mesia, o le Emanuelu ia ua fanau mai!

Tatalo: Fa'afetai le Atua, mo le Emanuelu ua e foa'i i le lalolagi. **Amene!**

LE FA'AOLA UA AFIO MAI: TALA I EVAGELIA

A saviour comes: gospel stories

Aso Sā – Tesema 20: “Ua liu tino tagata le Upu” (*The word became flesh*)

Tusi Faitau – Ioane 1: 1-14

Matua – ff. 4, 5, 14: *“Sa ia te ia le ola; o le ola fo'i o le malamalama lea o tagata. Ua pupula mai fo'i le malamalama i le pouliuli, a e lei manumalo i ai le pouliuli. Ua liu tino tagata le Upu, sa mau fo'i o ia ma i tatou, na matou matamata i lona mamalu; o le mamalu lava lea o le Alo e to'atasi o le Tamā, ua tumu o ia i le alofa tunoa ma le fa'amaoni.”*

Ua tatou tulata i le fa'amanatuina o le fanau mai o le pepe fou. O ia o le tama na valo'ia e Perofeta anamua. O le tama ia o le filemu, o le tupu silisili ia i le lalolagi uma. O le Upu ua liutino tagata e ala ia Iesu Keriso, o le alofa tunoa lea o le Atua mo i tatou uma. Ua fa'aalia ai lona alofa naunau tele ina ia fa'aola i le tagata ua agasala. O le Upu na i le amataga, ua afio ifo i le lalolagi ma mafuta ma le tagata fa'atauva'a. O lona alofa tunoa, ina ia tatou mau le fa'aolataga ma le mafutaga i le malo e fa'avavau. O ia o le malamalama o le lalolagi uma, ua sulugia i lona malamalama uiga ese. E le mafai fo'i e le pouliuli ona manumalo ai. Lea ua fa'aalia lona alofa e ala ia Iesu Keriso, na afio mai ma mafuta fa'atasi ma le tagata.

Tatalo: Fa'afetai Tama i lou agalelei, ina ua e foa'i mai Iesu Keriso e fai ma fa'aola mo le lalolagi uma. **Amene!**

Aso Gafua – Tesema 21: “Fa'aaliga” (*Annunciation*)

Tusi Faitau – Luka 1: 26-38

Matua – ff. 35, 38a: *“Ua tali mai le agelu ia te ia, “E afio ifo le Agaga Paia i luga ia te oe, e fa'amalumalu ifo fo'i ia te oe le mana o le Silisili ese; o le mea lea e ta'ua ai le tama paia e fanau mai, o le Alo o le Atua.” Ua fai atu Maria, “Fa'auta, o a'u nei o le auauna a le Ali'i; ia faia ia te a'u e tusa ma lau fetalaiga.”*

O lagona fa'ale tagata na o'o ia Maria, ina ua fa'aali le agelu o le ia fanauina le Alo o le Atua. O se fa'aaliga na faia i le finagalo fai to'atasi o le Atua, i lona filifilia ai o Maria e fai ma tina o Iesu. O fa'aaliga a le Atua e le malamalama i ai le tagata, o le ua vala'auina mo lona finagalo. E ui i lagona popole o Maria, a e na ia talitonu ma fa'atuatua i le Atua soifua. E i ai taimi e o'o mai ai le vala'au a le Atua i lo tatou ola, ina ia fa'aaogaina i tatou mo lana feau ma lana galuega. Ua fafagu mai le Tala Lelei, o lea lava le vala'auina o i tatou ua finagalo ai le Atua, ia mau pea lo tatou fa'atuatua i le Atua soifua. Ia le fa'agae'etia pe maua fo'i ni lagona popole, a e ia tumau i le Atua e manuia ai mea uma.

Tatalo: Fa'afetai i lau vala'auina ua aoga ai lo matou ola.. **Amene!**

Aso Lua – Tesema 22: “O le miti a Iosefa” (*Joseph's dream*)

Tusi Faitau – Mataio 1: 18-25

Matua – ff. 20e, 21: *“Ua fa'aali mai ia te ia le agelu a le Ali'i i le miti, ua fa'apea mai, “Iosefa e, le atali'i o Tavita, aua e te fefe ina au mai ia te oe o Maria lau avā; auā o lana to mai le Agaga Paia lea. E fanau mai e ia le tama tane, e te fa'aigoa fo'i ia te ia o Iesu; auā e fa'aola e ia lona nu'u ai a latou agasala.”*

Ua vala'auina e le Atua Iosefa e ala i le miti, e avea o ia ma Maria e fai ma matua o Iesu. Ua fa'aogaina e le Atua Iosefa le kamuta, e maualalo lona tulaga i le va'ai a tagata. O le Atua e ui mai i le ala maualalo, ina ia fa'aalia ai lona mata'utia ma lona silisili'ese. O nisi nei o auala e fa'aalia ai le finagalo o le Atua mo i tatou, e ala lea i le miti. E ui ina fa'atauva'a Iosefa, a e ua fa'aali i ai le Atua ma lona finagalo i le avea ma tama o le fa'aola. O le a lava lo tatou fa'atauva'a ma so tatou vaivai, e amana'iaina pea i tatou e le Atua e faia lana galuega. Ia fa'ataua lo tatou vala'auina, ina ia atagia ai le finagalo o le Atua mo i tatou uma i lenei lalolagi.

Tatalo: Le Atua o le alofa tunoa e, vi'ia lau afio ona o lau vala'auina i lo matou ola. **Amene!**

Aso Lulu – Tesema 23: “Maria ma Elisapeta” (*Mary and Elizabeth*)

Tusi Faitau – Luka 1: 39-45

Matua – ff. 43, 45: *“Pe fa’apefea fo’i lenei mea, ina ua sau le tinā o lo’u Ali’i ia te a’u nei? Fa’auta fo’i, ua o’o mai le leo o lou alofa i o’u taliga, ona oso’oso ai lea o le tama i lo’u manava ma le olioli. E manuia fo’i le fafine e talitonu, e taunu’u mea ua fetalai mai ai le Ali’i ia te ia.”*

O le tala fiafia ina ua asiasi atu Maria ia Elisapeta, ua ia silafia o lo'o tau'ave e Maria lona fa'aolataga. Ona oso'oso ai lea o le tama i lona manava, ina ua fa'amanuiaina e le Atua. O Elisapeta o le tina ia o Ioane. O le e muamua mai e teuteu le ala o le Ali'i o le a fanau mai. O le leo o le alaga i le vao, ina teuteu ia le ala o le Ali'i. O nei tina ua filifilia e le Atua, e fanaua ni tama tane e tu mati'e o laua tala i le Tala Lelei. E fa'apea fo'i ona filifilia e le Atua i tatou, e fai ma meafaigaluega mo lana Tala Lelei. O le a lava tofiga ua vala'auina ai tatou, ia fai ma vi'iga o le Atua. Ia fai la tatou auaunaga ma le loto atu i le Atua, ona tatou maua lea o mea sili i lo tatou ola galulue.

Tatalo: Fa'afetai i lou amana'iaina o i matou e avea ma au mea faigaluega mo lau Tala Lelei. **Amene!**

Aso Tofi – Tesema 24: “O le Vi’iga” (*The Magnificat*)

Tusi Faitau – Luka 1: 46-55

Matua – ff. 46e, 47, 52, 53: *“Ua vivi’i atu lo’u loto i le Ali’i, ua olioli fo’i lo’u agaga i le Atua lo’u Fa’aola. Ua tului ifo e ia o ali’i nai o latou nofoāli’i, a ua fa’aeaina e ia o e fa’amaulalo. Ua fagaina e ia i mea lelei e sa fia a’ai, a o e mau mea ua aufuaina atu e ia.”*

Ua tatou masani i le pese a le fafine ua olioli lona loto i le Ali'i, ona ua fa'aeaina e ua fa'amaualaloina. O upu ua fai ma matua, o lagona o le fa'afetai i le Atua, ina ua alofaina e ia le fa'atauva'a o le tagata. Na ia faia ai mea sili mo le tagata, ina ua ia fa'amanuia e fanauina le fa'aolataga mo le lalolagi. O le Tala Lelei o lo'o tatou molimauina pea i nei aso. Lea fo'i ua tatou sauni e talia lona fanau mai i lenei tausaga. O lea aso taua, ua fai lea ma oliolisaga i le tagata ua fa'atuatua ma avea ma Kerisiano. Ia fa'amaulalo o tatou loto, ma talia le afio mai o le pepe o le Kerisimasi; ina ia nofotupu i o tatou loto.

Tatalo: Ia e fa'atupu se loto fou i totonu ia i matou, e afio ai le pepe o le Kerisimasi ua fanau mai. **Amene!**

Aso Faraile – Tesema 25: “O le fanau mai o Iesu” (*The birth of Jesus*)

Tusi Faitau – Luka 2: 1-7

Matua – ff. 6, 7: *“Sa i ai laua, ona o’o lea i ona po e fanau ai o ia. Ua fanau e ia lana tama ulumatua, ua ia aui ia te ia i le ‘ie, ma fa’ataoto ia te ia i le fale manu, auā latou te le ofi i le fale e tali ai malo.”*

O se auala e maualalo ma le fa'atauva'a, na afio mai ai Iesu i le lalolagi. O le finagalo o le Atua, ia iloa e le lalolagi uma ua fanau mai le tama o le fa'aolataga o le sa valo'ia. O le aso taua lea mo le 'au Kerisiano uma, ina ia tatou fa'amanatu ai lona afio mai i le lalolagi. O le tama o le folafolaga, o le na te aumai le filemu ma le malamalama mo tagata uma. O le pepe o le Kerisimasi ua fanau mai, e fai ma fa'aolataga mo le lalolagi uma. Ua tatou fa'amanatuina pea lea aso taua, e fa'ailoa ai lo tatou agaga fa'afetai i le Atua, ona o lona alofa tunoa mo i tatou. Ia manuia le fanau mai o le pepe o le Kerisimasi!

Tatalo: Matou te aleluia ma osana i le fanau mai o le pepe o le fa'aolataga ua matou maua ai se Kerisimasi manuia. **Amene!**

Aso To'ona'i – Tesema 26: “Leoleo mamoe ma agelu” (*Shepherds and angels*)

Tusi Faitau – Luka 2: 8-12

Matua – ff.10e, 12: *‘Aua tou te matata’u; auā fa’auta, ou te ‘au mai ia te outou le tala lelei o le olioli tele e o’o mai i le nu’u uma; auā o le aso nei ua fanau ai ia te outou i le a’ai a Tavita le Fa’aola, o ia o Keriso le Ali’i. O le fa’ailoga lenei ia te outou, e iloa e outou le tama meamea ua aui i le ‘ie, o lo’o taoto i le fale manu.’*

O leoleo mamoe na mua'i fa'aali ai le Atua, ua fanau mai le tama o le fa'aolataga. Na o latou leoleo i o latou mamoe i vao, a e ua fa'aali ai le agelu ma fa'ailoa i ai lea Tala Lelei. O le Keriso ua fanau mai, o ia o le fa'aola mo le lalolagi uma. Ua fa'ailoa ai fo'i ia i latou, le mea o lo'o ta'oto ai le fa'aolataga, e ala lea i le fetu i sasa'e; ma o lo'o ta'oto o ia i le fale o manu. E ui ina fa'atauva'a le ala na afio mai ai o ia, a e ua silisili lea i le Atua lona alofa i le lalolagi.

Tatalo: Le Atua fa'avavau e, ia matou lagonaina le taua o le fanau mai o le Keriso i se ala maualalo e fa'aalia ai lou silisili'ese. **Amene!**

O Mea Totoe – Leftovers!

Aso Sā – Tesema 27: “Tatalo mo le filemu” (*Pray for peace*)

Tusi Faitau – Salamo 122

Matua – ff. 6e, 7: *“E manuia i latou o e alolofa ia te oe. Ia i ai le manuia i totonu o ou pa, o le manuia i totonu o ou maota.”*

O le Salamo 122, e tumu i le fiafia i le fa'alatalata atu i Ierusalem: o le totonugalemu o le tapua'iga i le Atua, ma le nofoa'iga o le pule a Isaraelu e feso'ota'i ma le fa'atonuga na fuafuaina e le Atua e ala i le aiga o Tavita. O le saogalemu ma le filemu o Ierusalem, e taua tele mo le soifua manuia o tagata o lo'o fa'apotopoto ma tapua'i ai. Po o ā lava faigata o le tausaga ua mavae, e mafai ona maua le olioli ma le malutaga i Ierusalem. O le tatalo, o le aupega sili lea i so'o se tagata fa'atuatua. Ia fa'aauau pea le tatalo, ina ia fa'atupuina ai pea lona filemu ma ona manuia mo i tatou uma o lana fanau.

Tatalo: Ia matou fiafia pea e mafuta i lau afio i talosaga, ina ia manuia matou fuafuaga uma. **Amene!**

Aso Gafua – Tesema 28: “Mea sili” (*Great things*)

Tusi Faitau – Salamo 126

Matua – f. 5: *“O e lulu saito ma loimata, latou te seleseleina ma le alaga fiafia.”*

Ua tatou i ai i le fa'aiuga o lenei fo'i tausaga i feau ma galuega. E ui lava i le tele o faigata na feagai ma i tatou i le ala, a e na fa'aalia lava le agalelei mai o le Atua i la tatou savaliga. E tatlitonu fo'i, e tele lava o tatou mana'oga na tu'u atu i le Atua, ma o tatou lulu le fatu ina ia tupu ma ola. A fa'apea na o tatou lulu ma le le fa'amaoni, e

faigata fo'i ona tatou maua se tali mautinoa mo i tatou. A e ua fa'amanatu mai le Tala Lelei, o e na lulu ma loimata e selesese fo'i ma le fiafia. O mea sili ia e fai ma vi'iga o le Atua, ina ua manuia o tatou fa'amoemoega uma na tatou fuafua. O le Atua, o ia na te faia mea sili mo lo tatou ola.

Tatalo: Fa'afetai tele le Atua, ina ua e faia mea sili ma tali i o matou mana'oga o aso uma. **Amene!**

Aso Lua – Tesema 29: “O le ala lelei” (*The good way*)

Tusi Faitau – Ieremia 6: 13-19

Matua – f. 16: *“O lo’o fa’apea mai le Ali’i, Ia outou tutū i ala, ma va’ava’ai, ma fesili i ala o le vavau, po o i fea le ala lelei, ma ia outou savavali ai, ona maua lea e outou o le malologa mo outou agaga. A ua latou fai mai, Matou te le savavali i ai.”*

O le afio mai o Iesu Keriso i le lalolagi, o ia lea o le ala lelei e ao ina savalia e le tagata Kerisiano. O le tatou matua, ua aumaia ai le finagalo o le Atua; peita’i ua faigata ona talia e le tagata. A o lona finagalo alofa, ina ia laveai’ina ai le ola o le tagata mai le lalolagi ma ona faigata. Ua fa’amanatu mai mo i tatou le Tala Lelei, ia filifili i ala tonu o le Atua. O le tatou savalia o ala lelei o le Atua, ona maua lea o le malologa mo tatou agaga. Ia tatou filifili e savavali i ala tonu o le Atua, ona manuia lea o la ta savaliga mo le lumana’i.

Tatalo: Le Ali’i e, fa’asino mai ou ala tonu ina ia matou savavali ai mo le manuia i le lumana’i. **Amene!**

Aso Lulu – Tesema 30: “Va’ai ma fa’atali” (*Watch and wait*)

Tusi Faitau – Mareko 13: 26-37

Matua – f. 33: *“Ia outou, ina mataala ia, auā tou te lē iloa pe o’o mai afea ia aso.”*

O faailoga na faamatalaina muamua i lenei mataupu e foliga mai o loo i ai nei: taua, perofeta pepelo, mafui’e ma le oge. Pe na lagona ea e tupulaga uma lena lagona? O le fuaiupu 30 ua fenumiai ai le au faamatala: o lo’o fai mai e le mavae atu lava lenei tupulaga seia o’o ina tutupu nei mea uma, ae o lo’o fa’amanino mai fo’i i lea fuaitau; e na o le Atua lava e silafia le taimi talafeagai e le iloa e le tagata. O lo’o manino lava le fa’atonuga e pei ona fai ma matua, ia nofo sauni i taimi uma. E taua lo tatou nofo ma fa’atalitali i taimi uma. Ia saunia lelei ai la tatou savaliga mo lena fo’i tausaga fou. O le mea mautinoa, e tutupu pea fa’afitauli i la ta savaliga. A e ia tatou nofo ma fa’atalitali, ona leai lea o se mea tatou te popole ai pe a tutupu faigata o le ola.

Tatalo: Tapenaina e lau afio i matou, ina ia saunia lelei ma ia fa’atalitali i mea e tutupu o lenei soifuaga. **Amene!**

Aso Tofi – Tesema 31: “Fa’amanuiaga” (*Blessing*)

Tusi Faitau – Eperu 13: 17-21

Matua – ff. 20, 21: *“A o le Atua e ona le manuia, o le na toe fa’atuina mai nai e ua oti le Leoleo mamoe sili, o lo tatou Ali’i o Iesu, ona o le toto o le feagaiga fa’avavau, ia fa’aatoatoaina outou e ia i galuega lelei uma lava, ina ia outou faia lona finagalo, ia galue o ia i totonu ia te outou le mea e mālīe i ona luma, ona o Iesu Keriso; ia ia te ia le vi’iga e fa’avavau fa’avavau lava. Amene.”*

O manuia ua i o tatou lima, o le alofa fa’asafua o le Atua ua ia fa’amanuia ai lo tatou ola. Pe a o tatou manatu i lenei tausaga, e lē fesiligia le tele o lu’itau sa feagai ma i tatou. O fa’anoanoaga i totonu o so’o se mafutaga, ona o mafua’aga ese’ese. O nisi o fa’afitauli ua a’afia ai fanau ona o suiga fou o le ola ua tatou i ai nei. Peita’i, e ui i le tele o ia fa’afitauli; a e le’i taofia ai lona alofa tausi mai mo lo tatou ola. O le mea lea e ao ai lava ona tatou fa’afetai i le Atua, ona o ana fa’amanuiaga ua ia aumaia. O lona

manuia sili, lea na ia foa'i mai ai Iesu Keriso mo le lalolagi. Le pepe o le Kerisimasi, na ia aumaia le filemu ma le fa'aolataga mo lo tatou ola e fa'avavau, fa'avavau lava, Amene!

Tatalo: Le Atua e, ia tumau mai lou manuia ma lou filemu ia i matou uma, le alofa silisili o Iesu Keriso ma le mafutaga malou Agaga Paia. **Amene!**



TAUTUA PRINTING PRESS
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkas.org>